

近代中國史料叢刊續編第七十六輯  
沈雲龍主編

故都變遷紀略  
余棨昌編

文海出版社  
有限公司  
印行

故都變遷記略

故都變遷  
記略

孫庚澤題



## 自序

予於清光緒壬午生於京師忽忽六十年予既衰老都城亦非昔日之舊良時不再此固無可如何者矣予家僑居於京師者三世予復狃於小人懷土之私鮮事遠游雖幼時侍先夫人省覲先外王母於臺灣因依先舅維卿先生讀書於臺南北官署者數年弱冠游學日本者又數年然自壯歲服官京曹即未出國門一步前後四十餘年中更庚子辛亥之變凡建置之興廢名蹟之存亡道路里巷之變更無一不目覩而心識之在今日事過境遷人皆淡忘獨予於往日之舊京猶惓惓於懷而不能忍置焉夫以聲明文物綿延六百餘年之古都予幸生其間既見其盛旋見其衰復見其陵夷以至於今日而予猶偷息於此此予之悲咽而不能自己者也近見報章有徵求街巷舊名者故老凋零能知往事者蓋已寡矣更百數十年此莊嚴闕麗之故都其遺蹟或至湮沒而莫可稽考不亦大可慨乎爰不揣謏陋就平日所見聞撰次故都變遷記略不敢妄逞臆說而務求翔實亦不敢徵引繁瑣而務求簡明庶志故都者有所考鏡訪古者便於瀏覽云爾

民國三十年歲在辛巳七月廿四日怡園老人記於積水潭濯夢樓



目錄

卷一

名稱

城垣

卷二

舊皇城一

卷三

舊皇城二

卷四

內城一

卷五

內城二

卷六

內城三

卷七

內城四

卷八

外城一

卷九

外城二

卷十

郊坳

附錄

## 例言

一 本記略以記變遷爲主惟所謂變遷者爲自清末光緒庚子變亂後以至民國廿六年蘆溝橋事變時止之變遷而言其以前以後皆不載

一 昔日胡同之名雖不能皆有原起但皆有所依附民國以來頗多改竄有沿其音訛者如江米巷爲交民巷猪市口爲珠市口之類有因名不雅馴而改者如臭皮胡同改爲授璧胡同臭水河改爲浸水河之類亦有無意識而改者如茗帚胡同改爲桃竹胡同井兒胡同改爲警爾胡同之類甚至本有故實而妄改者如奶子府改爲迺茲府靈清宮改爲靈境之類本記略均於現在名稱下注明舊名某以存其真

一 故都寺觀甚多本記略僅就其曾見著錄者記其存廢其雖係古刹不見著錄及新建而無大關係者皆不載

一 風景名勝之區古人多有詩紀之本記略多擇錄近人詩於其後以曠其變遷古詩未能盡載

一 忠孝節義之事與其坊巷有關者無論何代一律記載



近代名人宅第寓居見於本人或他人詩歌者亦一律記載并載其詩歌或雖無詩歌而有遺聞佚事者亦同

會館除各行業者外本爲各省來京鄉會試士子寄寓而設清末科舉既廢而今國都又遷幾全失其存立之目的故除數處與歷史有關係者外其他皆略而不載

本記略關於皇城內宮殿亭臺之方向名稱用途建修年月一以故宮博物院所輯之清宮述聞爲主其他衙署寺觀等則以宸垣識略爲主他書與之有歧異者則附註於下調查所得有不同者亦全

# 故都變遷記略卷一

紹興余榮昌戟門氏編

吳縣陳克明秋水校勘

## 名稱

北平爲禹貢冀州之域而建爲國都則實始於遼遼太宗會同元年以幽州爲南京又曰燕京名析津府註一宋約金伐遼宣和五年金人歸燕六州宋改名燕山府註二七年復入於金仍稱燕京貞元四年金主亮幸燕以爲中都號大興府註三元太祖十年克燕改爲燕京路世祖至元四年始於金舊中都之北三里築城定爲京邑註四九年改號大都明洪武初改大都路爲北平府註五永樂元年燕王篡立升爲北京改名順天府註六正統六年改稱京師註七清世祖入關定都燕京因明之舊仍稱京師名順天府民國肇興革命政府北移亦沿稱北京而改順天府爲京兆十七年南北統一復以南京爲首都而廢北京稱北平特別市除城郊外京兆舊屬各縣均改隸於河北省焉

註一順天府志遠之故城即因唐壽安城之舊其地在今城西偏及郊外地今琉璃廠在正陽門外乾隆年

間得李內真墓志稱其地爲燕京東門外之海王村又今黑密廠在永定門內慈悲庵而今存遼壽昌慈智大師石幢亦稱京東北盟登編郭藥師龕遼由固安渡盧水奪迎春門陣於憫忠寺前是遼東門在憫忠寺之東慈悲庵之西界址規模略可想見

註二 宸垣志略宋燕山府城周週二十七里樓台高四十尺樓計九百一十座池甃三重城開八門 又考按此條燕京舊城周二十七里至金天德三年展築三里見析津志所引金蔡珪大覺寺記合計共周三十里此皆指都城言之 又長元按燕山府之名係宋宣和五年金人來歸燕京六州時所改遼析津府城三十六里此云二十七里豈去其西南之大內而言耶遼城門八大內門三今祇言八門其無大內可知

註三 宸垣志略金貞元四年金主幸燕遂以爲中都府曰大興定京邑焉都城周圍凡七十五里城門十二每一面分三門其正門四旁又設兩門正東曰宣耀陽春施仁正西曰灑華耀澤彰義正南曰豐宜景風端禮正北曰通元會城崇智 順天府志金天德三年東南二面展築三里與四子城相屬外城包之廣七十五里

註四 宸垣志略元世祖至元四年始定鼎于中都之北三里築城圍六十里九年改爲大都 又京城方六十里里二百四十步分十一門正南曰麗正左曰文明右曰順承正東曰崇仁東之南曰齊化東之北曰光熙正西曰和義西之南曰平則西之北曰肅清北之西曰健德北之東曰安貞

註五 宸垣志略明洪武初改大都路爲北平府縮其城之北五里廢東西之北光熙肅清二門其九門俱仍

舊 又大將軍徐達命指揮華雲龍經理故元都新築城垣南北取徑直東西長一千八百九十丈又令指揮張煥計度故元皇城周圍一千二百六丈又令指揮葉國珍計度南城周圍五千三百二十八丈南城故金時舊基也改故元都安貞門爲安定門健德門爲德勝門

註六 宸垣志略永樂中定都北京改北平爲順天府建築京城周圍四十里爲九門南曰麗正文明順承東曰齊化東直西曰平則西直北曰安定德勝

註七 日下舊聞引英宗實錄六年八月浙江甯波府知府鄭瑤曾國家肇建兩京合於古制自太宗皇帝定鼎北京以來四聖相承正南面而朝萬方四十年於茲矣而諸司文移印章尙仍行在之稱名實未嘗請正名京師南京諸司宜改曰南京某府某部爲得是年十一月上御奉天殿大赦改給南京文武衙門印北京諸衙門去行在二字南京諸衙門增南京二字

### 城垣

內城舊名京城周四十里高三丈五尺五寸門九南曰正陽南之左曰崇文南之右曰宣武北

之東曰安定北之西曰德勝東之北曰東直東之南曰朝陽西之北曰西直西之南曰阜成環內城南面爲池東至東便西至西便俗稱護城河

外城包京城南面抱東西角樓計長二十八里高二丈門七南曰永定南之東曰左安南之西曰右安東曰廣渠西曰廣安東北隅曰東便西北隅曰西便皆北向

內外兩城各城門有清一代殆無變動惟德宗光緒廿七年辛丑和議成後京津火車直達正陽門外城城垣遂鑿數洞子門以通車而正陽崇文之間於御河水出城處亦開一門以便使館界內往來行旅然皆無名

民國三年撤正陽門月城於正門左右兩側各開二門爲車馬通行之路正門設而不用十五年復在正陽宣武二門間開兩洞子門名曰和平而宣武門甕城旋亦撤毀餘則一仍勝朝之舊無所改易

按故都在唐爲幽州遼爲南京析津府宋約金伐遼宣和五年金人歸燕京六州宋遂改稱燕山府金貞元四年金主亮幸燕以爲中都稱大興府其城址大約在今故都之西南至元世祖至元四年於中都之北三里築京城號大都始移而東北明洪武初改大都路爲北平府大將軍徐達就元故都新築城垣縮其城之北五里廢其東西之光熙肅清兩門其城址較前爲狹小燕王篡立定都北京改北平爲順天府永樂十四年建築京城周圍四十里爲九門南曰麗正文明順承東曰齊化東直西曰平則西直北曰安定德勝正統初更麗正爲正陽文明爲崇文順承爲宣武齊化爲朝陽平則爲阜成今土人尤稱宣武爲順治朝陽爲齊化阜成爲平則蓋沿永樂

之舊城南一面長一千二百九十五丈九尺三寸北一千二百三十二丈四尺五寸東一千七百八十六丈九尺三寸西一千五百六十四丈五尺二寸高三丈五尺五寸堦口五尺八寸基厚六丈二尺頂收五丈清則一仍其舊卽今故都之內城也元大都在遼金舊都之東北而稱舊都爲南城猶之外城也明嘉靖二十三年始築重城包京城南面轉抱東西角樓止長二十八里爲七門南曰永定左安右安東曰廣渠東便西曰廣寧清避帝諱改爲廣安西便城南一面長二千四百五十四丈四尺七寸東一千八十五丈一尺西一千九十三丈二尺高二丈堦口四尺基厚二丈頂收一丈四尺四十二年增修各門甕城而爲包京城之外城故亦名外羅門清亦仍之卽今故都之外城也

內外城之警備有清一代由步軍統領及巡城御史司之分五城八旗以定其轄地德宗末年始廢舊制施行警察制度在內外城各設一巡警總廳分地面爲二十二區正陽門大街以東分五區曰外左某區正陽門大街以西分五區曰外右某區地安門大街以東爲五區曰內左某區地安門大街以西分五區曰內右某區皇城除大內外南半面爲中一區北半面爲中二區民國肇興沿而未改十七年國都南遷改北京城爲北

平特別市始更定其區劃外城正陽門大街以東崇文門大街以西北起東河沿南迄東珠市口以至東柳樹井爲外一區珠寶市糧食店以西宣武門大街以東北起西河沿南迄西珠市口以至菜市口爲外二區花市以東廣渠門以西北起後河南迄左安門爲外三區宣武門大街西達智橋東口菓子巷內大吉巷東口及南橫街穿堂門以西廣安門以東北起上斜街南迄右安門爲外四區珠市口以南永定門以北東起磁器口天壇西迄菓子巷以至龍泉寺爲外五區內城崇文門以北朝陽門大街猪市大街以南東起朝陽門西迄東皇城根西折以至棋盤街爲內一區正陽門內順城街以北西單牌樓粉子胡同以南西起關帝廟呂祖宮地藏菴以至太平湖東迄西皇城根府右街東折以至西皮市爲內二區朝陽門大街街北各巷以至翠花胡同以北安定門東城根以南東起東直門城根西迄安定門大街以至東皇城根爲內三區缸瓦市豐盛胡同以北德勝門西城根以南西起西直門南順城街東迄西海西河沿東折以至西皇城根爲內四區地安門以北直達安定德勝兩門西起羅兒胡同棉花胡同東迄安定門大街交道口南大街街西各巷東口爲內五區南自中華門起北迄地安門東至東安門今門已拆西至西安門則爲內六區

按明制城之下復分坊鋪坊有專名

中城曰南薰坊澄濟坊仁壽坊明照坊保泰坊大時雍坊小  
時雍坊安福坊積慶坊東城曰明時坊黃華坊思誠坊居賢

坊朝陽坊南城曰正東坊正西坊正南坊宣南坊宣北坊崇南坊崇北坊西城曰阜財坊鳴玉坊朝天  
坊河漕西坊關外坊北城曰崇教坊昭回坊靖恭坊靈榕坊發祥坊金台坊教忠坊日中坊關外坊 鋪則

以數計之如南薰坊十鋪之類清制於城下有司坊司設兵馬指揮副指揮各一員

坊設吏目俗名坊官

惟坊名  
久廢

旗下設佐領以數計之如某處至某處為某旗第幾佐

領所轄外城屬司坊內城屬旗





# 故都變遷記略卷二

## 舊皇城一

皇城在內城內周十八里有奇正南曰中華門少北左曰東三座門舊名長安左門右曰西三座

門舊名長安右門東曰東安門廢西曰西安門北曰地安門中華門之內曰天安門天安門之

內曰端門端門之內東曰闕左門西曰闕右門正中曰午門午門為紫禁城正門門以

內為舊大內中華門南對正陽門識緯家謂故都京城正面三門東曰崇文為明亡於崇禎之讖西曰宣武為清亡於宣統之讖皇城正門易名中華其前為正陽門適符

蔣介石先生之名為蔣氏代興之兆梁昌則謂蔣公興而北京之國都廢乃為廢都之讖也

按中華門明名大明門清名大清門民國二年始改今名

舊皇城廣袤三千六百五十六丈五尺高一丈八尺下廣六尺五寸上廣五尺二寸

舊皇城城垣民國以後逐漸拆毀長安左右門自民國初元即已拆去僅餘門闕今稱三座

門清乾隆時所增築之圍牆亦於是時改修即今天安門前花牆式之圍牆是也同年

又於西面闢灰廠一門以為國務院直達西長安街之路三年天安門左右東關南池

子街門西關南長街街門住居地安門內外者可由此兩路直達前門不必再繞行東

西安兩門矣嗣後又於東面關翠花胡同一門以通馬神廟北京大學北署對面一門以通德勝門皆取捷徑也民國六年合肥段芝泉上將討張穴東安門南段城垣以攻其住宅亂定後其一帶皇城盡拆同年又拆西宮一帶以迄灰廠豁口皇城以其磚石移修大明濠十三年復拆東西一段而北面皇城爲最後拆至是藩籬盡撤都亦遂廢詎非先兆乎

中華門三闕上爲飛檐重脊前地正方名棋盤街中爲中華門通正陽門甬道以石欄形如棋盤故名民國初元東西穿石欄開一通路與甬道成十字木於欄中盡失舊狀闕前左右石獅二下馬牌各一今尙存

棋盤街舊又稱天街翫月最爲清曠查嗣鍊雜詠詩云棋盤街闊靜無塵遊戲陳向夜月明真似海參差宮殿湧金銀足見當時光景今則車馬行人驚不堪非復曩時景象

門之左右本有崇垣周之民國初朱啟鈴長內務時改砌而低作花墻式明正統間作公生門於左右長安門之外南向以通五府六部清仍之民磚牌樓東曰履中西曰蹈和

門內東西折而之北本各有千步廊一百四十四間其外東爲戶部米倉西爲工部木倉均久廢東西三座門之中南向爲

天安門

明曰承天門

五闕上覆重樓九間爲舊皇城正門前環金水河跨石梁七爲外金水橋

橋前立華表二門內立華表二爲帝制時代頒詔之處註

註 宸垣志略凡頒詔設金鳳朵雲於天安門上堦口正中宣詔官朝服領耆老咸集行禮奉詔承朵雲由金

鳳銜下

門內東西兩廡各二十六間兩廡正中各有門昔爲通太廟社稷街門今皆扃而不開兩廡之北正中南向爲

端門門制與天安門同

門之內東西兩廡各五間其北東有廟右門西有社左門今皆扃而不開迤北兩廡各四十二間舊爲朝房又北東出者曰闕左門西出者曰闕右門又北復有兩廡各三間舊爲王公朝集之所正中南向爲午門

天安門午門之間左爲太廟右爲社稷始於明清沿之民國廢爲公園社稷於民國三年改爲公園名中央公園太廟直至民國十五年始改而無名俗即稱爲太廟公園兩

園皆各於天安門城垣鑿一門爲公園正門

太廟公園中之舊太廟南向朱門黃瓦周以崇垣大門三左右門各一戟門五間前殿十有一間昔爲合祀列祖帝后之堂中殿九間爲寢殿同堂異室後殿九間爲祧廟殿中几席枕帳俱存今仍陳列以供遊人觀覽前殿兩廡各十五間昔爲配饗諸王公功臣之位中殿後殿兩廡各五間爲藏庋祭器之所現廟前後皆招商設茶肆但僅於柏樹陰下設茶座而已布置較中央公園爲簡陋

中央公園中之社稷壇制方北向二成高四尺上成方五丈二成方五丈三尺四出陛各四級內壇方七十六丈四尺高四尺甃以四色琉璃磚前後左右門各一柱及楹闕皆白玉石舊有扉今無存壇北祭殿拜殿各五間民國三年廢爲公園後均改爲堂壇外周以崇垣東西南三面各一門北面則三門廢爲公園後移建舊禮部習禮亭於南門外與門相值壇垣外東側築廳五間頗軒廠名來今雨軒軒前數十步有屋一區爲行健會會所軒後築一亭名投壺亭軒左有屋數楹爲董事會會所西側鑿池引御河水以注之池南築一榭名曰水榭池北爲溫室室前滿列花木沿西垣一帶築廊舍多間爲繪影樓春明館上林春民國六年對德宣戰八年拆克林德石坊移建園內名公理

戰勝坊其後復沿東西爲走廊若干間東起來今雨軒西迄水榭栽種牡丹於來今雨軒前溫室後約數十池花開時繽紛燦爛如錦繡今推爲市中牡丹最勝處惟園中古柏受天牛蟲災歲有枯死當者事拘於禁令不敢伐除任其蟲災蔓延使數百年古木日就凋零良可慨也壇垣外各亭榭皆招商設茶酒肆爲故都市民嬉春消夏之勝地黃晦聞先生節春盡日過社園風霾不開丁香盛白簡湯定之詩一塵黃不上丁香似雪翻風風卻黃日日好春風裡過令人梅雨憶江鄉語與城西湯定之園花吹盡柳絲絲尋常別恨年年有不是吳姬壓酒時

又黃節秋涓北來視予四月六日社園置酒賞牡丹作風力初低雨意輕爲花何愛一春晴回陰莫展丁香結廢閨難催芍藥生塵土牡丹黃上額殿臺楊柳碧連城眼前草木憂懼狀與汝盱衡說舊京

又黃節社園茗座遲瘦公不至詩蒼然栝柏杉松地得與遊人坐夕涼六月將秋仍病暑衆鷺宜菽一澆腸晚來栖息能相過舉國劬勞自未央到此不無林木歎士夫名節獨尋常

又黃節社園看菊將雨始歸詩積困猶思一放吟久晴今日猶陰陰端知茗座無人

過爲愛霜花故晚尋一室坐憐秋色盡衆雲能使落陽深多留亦歎成何意喬木風巢石去禽

大內

舊紫禁城 註一爲皇居名大內在皇城中南北各二百三十六丈二尺東西各三百二丈九尺五寸凡四門南曰午門北曰神武

明名玄武

東曰東華西曰西華四維皆有角樓牆外

環以護城河 註二

註一 養吉齋叢談紫禁城騎馬謂之賞朝馬每歲軍機處將一二品大臣年六十以上者開單請旨大抵一品合例者皆得邀恩侍郎以下則或賜或否內廷行走之員往往特蒙恩禮不復問年至親王以下至貝子則皆准在紫禁城騎馬 茶餘客話紫禁城騎馬之制准騎者由東華門入至箭亭下馬由西華門入至內務府總管衙門前下馬 郎潛紀聞乾隆五十五年上諭曰內外文武大臣特恩賞在紫禁城騎馬用資代步但年老足疾之人上馬亦覺艱難嗣後已經賞馬之大臣因有疾艱於步履者仍加恩准令乘坐椅旁縛短木用二人舁行入直 國朝宮史續編傳籌之制紫禁城內五籌遞傳每夕自景運門發籌西行過乾清門出隆宗門循而北過啓祥門迤而西過凝華門迤而北過中正殿後門迤北至西北隅迤而東過順貞門吉祥門至東北隅迤而南過蒼震門至東南隅迤而西仍至景運門凡十二汛爲一周

註一 國朝宮史續編皇城內河流四面環繞由地安門西步梁橋（今說爲西不壓橋）入者經景山西門引入環紫禁城是爲護城河護城西面之水自紫禁城西南隅流經天安門外金水橋東南注御河是爲外金水河又西闕下有地道引護城河水經午門前至東闕門外循太廟右垣南流折向東注太廟戟門外箭子河東南合御河其由地安門東步梁橋入者經東安門內望恩橋注御河其入紫禁城者由神武門西地道引護城河水流入沿西一帶經武英殿太和門前是爲內金水河復流經文淵閣前至三座門從鑾駕庫巽方出紫禁城

大內建於明清因之民國鼎革除乾清門以前各殿廷外清遜帝仍居之十三年始被逐出明年改爲故宮博物院其乾清門前各殿廷於民國三年因熱河行宮及盛京舊宮古物運京分陳於文華武英兩殿名古物陳列所今僅武英一部陳列物尚存而太和中和保和三殿亦許人遊覽

午門爲紫禁城正門三闕上覆重樓九間門前左設嘉量右設日圭左右各一闕西向者曰左掖東向者曰右掖上覆鐘鼓明廊翼以兩觀傑閣四聳與中相輔俗稱五鳳樓民國十四年教育部將清內閣所存各檔案及近代各地掘獲之古物一部陳列樓上任人觀覽名歷史博物館



門內東西兩廡註各二十二間兩廡中各有一門東曰協和西曰熙和兩廡之北正中為太和門

註 清宮述聞午門內東廡二十二間皆崇基為稽查欽奉上諭事件處及內閣諸教房又午門內西廡二十二間皆崇基為繕書房及起居注館

昔皇帝視朝則鳴鐘鼓於樓上出入鳴鐘凱旋獻俘亦御午門受之

太和門

明名皇極門

九間三門前後陞各三出左右各一出前列銅獅二環以金水河跨石梁

五左右各一門左曰昭德右曰貞度

門之內東西兩廡各三十三間註一東廡中為體仁閣西廡中為弘義閣皆東西向東廡之北為左翼門西廡之北為右翼門門各五間清光緒十四年太和門災註二翌年重建

註一 清宮述聞太和門內東廡三十三間為緞庫甲庫氈庫北鞍庫南鞍庫西廡三十三間為銀庫皮庫瓷庫衣庫茶庫

註二 天咫偶聞光緒十四年十二月太和門火明年正月二十六日大婚不及修建乃以葦葦為之高卑廣狹無少差至接換之花紋鴟吻之雕鏤瓦溝之廣狹無不克肖雖久執事內廷者不能辨其真偽而且

高逾十丈栗冽之風不少動搖

正中南向爲殿三重前曰太和中曰中和後曰保和舊稱三大殿今仍之

太和殿

明名皇極  
又曰奉天

基高二丈殿高十一丈廣十有一間縱五間上爲重檐脊四垂殿前丹陛環以白石闌陛五出各三成陛間共列鼎十八銅龜銅鶴各二日圭嘉量各一清康熙八年重建昔爲元旦冬至萬壽三大節及大慶典皇帝受賀之處而朝會燕饗命將出師臨軒策士亦御焉

清施閏章元旦早朝詩丹闕晨開敞御筵朝元會好傍爐烟春迴曉日蟾廷暖風細卿雲鳳閣懸宵旰勤思荒服外衣冠拜舞聖人前稱觴進璧渾間事共擬南征奏凱篇

殿左右各一門左曰中左右曰中右皆三間南向殿之後東西兩廡各三十間

註 清宮述聞太和殿後東西兩廡內庫在焉

中和殿

明名中極  
又曰華蓋

縱廣各五間方檐圓頂南北各三出陛東西各一出昔爲祭祀視祝版耕藉視農器之所

保和殿

明名建極  
又曰謹身

九間重檐垂脊前陛各三出與太和殿丹陛相屬殿後陛三成三出昔

爲除夕筵宴外藩之處每科朝考新進士亦御焉

清朱彝尊除夕保和殿侍宴詩珮結緋魚後樽開白獸先呈能幻樂隊密坐潤爐烟  
紫路頻除夕青燈異往年誰當頌椒會猶侍聖人前

殿左右各一門左曰後左右曰後右皆三間南向

殿後迤北十餘武崇基列陞其北東爲景運門西爲隆宗門正中南向者爲乾清門

東華門內協和門東爲

文華殿南向五楹深同之殿前曰文華門門三間崇階九級丹陛與露臺相值臺左右各  
二陛東配殿曰本仁西配殿曰集義後殿曰主敬各五楹明李闖亂後殿被燬清康熙  
二十二年重修昔爲皇帝御經筵之所

清陳廷敬講筵紀事詩崇政經帷秘延英玉陛高聲容肅中禁寵渥厚詞曹天語開  
黃卷乾文上彩毫萬言親講誦或恐聖躬勞

循殿而東北跨石梁三前有三座門門內有清代會典館民國後爲清史館館署正北  
有殿宇三所覆以綠瓦名摘芳殿爲清代皇子所居俗稱阿哥所爲明燾敬殿與端本  
殿舊址所後有戲衣庫所東爲太醫院爲御藥庫所西夾道內爲御茶膳房御肉膳房

爲蒙古朝房

循殿而東南北向者爲清代之內閣大庫戶部內庫鸞儀衛內鸞駕庫循庫左轉而北南向者爲國史館今皆廢爲故宮守衛隊及警察消防隊駐所

清毛奇齡雪中入直史館詩朔風吹捲玉河沙早見天街散雪花苑外撲將千片蝶壇深噪過幾群鴉遮成翠幃疑朝雨望去紅牆似曉霞誰賜錦貂還左掖獨騎羸馬上東華人逢玉署忻投壁身在銀河未汎槎隔院冰敲懸幕鐸傍檐檉落濕窗紗驚心鎖自燒青簡呵指眞難草白麻渴至未傾杯底酪寒多先結研頭窪官臺截業依天近輦道迴環歸路賒一望蒼茫愁思遠東安門外卽天涯

文華殿曾一度爲古物陳列所陳列字畫民國二十二年古物南移後改隸於故宮博物院陳列美人福開森氏捐贈之古物有江安傅增湘樂陵宋哲元兩碑記

傳心殿在文華殿之東南向五楹殿前東西角門二北向五間爲治牲所南向三間爲景行門清康熙二十四年建

殿設孔子位於御經筵前一日祭告

院內有大庖井上覆以亭泉味甚甘甲於別井註

註 ●玉堂雜話黃鶴書作京師泉品謂玉泉第一文華殿東大庖井第二

內閣在協和門外文華殿之南與文華殿相對南向清沿明舊昔爲大學士直廬。

清沈德潛夜宿中書省詩獨宿絲綸閣虛堂燈火清窺檐星漢影記夜柝鈴聲報稱  
慚鬢髩疏慵負詔明家園通夢寐游釣憶平生

文淵閣爲明之聖濟殿舊址在文華殿後閣凡三重上下各六楹層階累折而上上覆綠色琉璃瓦前鑿方池跨石梁一引御河水注之閣後疊石爲山垣門一北向清乾隆三十九年建昔爲貯四庫全書之處

循關西北西向房屋一所爲清代上駟院其南爲御馬廄閣北南向者爲箭亭昔爲皇

帝馳馬習射之所

舊名射殿

西華門內熙和門西爲

武英殿南向五楹深同之殿前爲武英門制與文華同門前跨石梁三周以石檻丹墀左右各一陛東配殿曰凝道西配殿曰煥章後殿曰敬思各五楹東北爲恒壽齋西北爲浴德堂清同治八年災同年修復康熙間開書局於武英殿爲詞臣纂輯之地乾隆以後書館尤盛武英殿遂專司刊校刊行之書籍謂之殿板道光以後經費支絀刊書甚

少僅爲貯藏書籍書版之處而已同治八年災後書籍版片焚燬殆盡

殿東北恒壽齋昔爲繕校四庫全書諸臣直房其西北浴德堂舊稱修書處

浴德堂內有西域式浴室後有井亭俗傳爲香妃浴所但香妃本無其人後之考古者多辨正之

王書衡先生式通辨正香妃事詩采筩輕將野語收娟娟寶月照層樓流傳廣畫椒

風影髣髴歸魂柳樹秋百輩才人辭太費十全信史事難求松鄰題象詩沿誤削稿

長銷地下愁

松鄰稿內有題故回部巴圖汗  
可救象一詩錢孫謂失實應刪

武英殿民國後爲古物陳列所其所陳列之歷代古瓷及其他寶物一部今尙存

循殿而西爲咸安宮爲清代之尙衣監三通館寶錄館及文穎館又西爲器皿庫爲咸安宮官學爲蒙古官學咸安宮爲清康熙二十一年建民國三年拆殿改建爲樓名寶蘊樓以貯盛京舊宮熱河行宮兩處寶物

循殿西北爲清代方略館再折而北爲回子學緬子學

按清乾隆以前方略館在武英殿垣後  
東側至同治年間編纂平定髮捻方略

則借咸安宮官學學  
舍開館而在西側矣

殿北正中爲清代內務府署再北左側爲造辦處

按內務府署昔本在丙華門內循牆第四  
門東向後移武英殿北其遷移年月不詳

清宣統年間憲政籌備處附設內務府其處址則在上駟院之後以上駟院爲內務府所轄也

循殿而西南爲南薰殿殿西廡舍爲御書處昔爲貯存列代帝后圖像處殿東一帶房屋爲外瓷器庫今爲警察局保安隊駐所南薰殿清因明舊

午門以北乾清門以南各殿閣稱爲外朝

乾清門五楹中三門前陛三出各九級周以石欄陛前列金獅二昔爲皇帝御門聽政之處

清施閨章召見乾清門詩入直長趨丹鳳樓忽驚咫尺覲宸旒未遮宮扇瞻天近不散卿雲繞日浮帝德難名深氣象主恩蓄意待諮諏心懷董買才何有奏對誰當第一流

清李慈銘於乾清門觀迎皇后

德宗配孝定景皇后也萊註

鳳奩詩九閭曙色啟銅龍夾道珠燈拱

法宮綵仗千官迎日下瓊函百輩出雲中光華共識天顏喜樸儉先昭內治風添得層城王母笑蓬萊綺映晚霞紅

簾幕衾褥俱用絳色蓋從俗也

乾清門左旁爲內左門右旁爲內右門墀下東出者爲景運門西出者爲隆宗門門各

五楹內左門之東內右門之西周廡各十二間南向東爲外奏事處散秩大臣值班處文武大臣待漏之所及侍衛直宿房西爲軍機處內務府大臣辦事處及侍衛直宿房相對北向周廡各五間東爲宗室王公待漏之所西爲軍機章京直舍其旁各有井亭一

乾清門清沿明制順治十二年重建其門左右各直廡爲乾隆十二年所增修

### 乾清門內爲乾清宮

乾清宮廣九楹深五楹正中三楹設御座黼屨左右列圖史璣衡鼎彝上懸清世祖御筆扁曰正大光明左三楹爲東暖閣右三楹爲西暖閣殿前丹陛列金鼎四銅龜鶴各二東設日圭西陳嘉量中爲甬道與乾清門相屬丹陛南出者二東西出者各一丹陛下有文石台左右各一上安小金殿左名社稷右名江山宮之左右各有層階一段緣牆甚狹護以石欄爲升宮廷之便道東牆後爲昭仁殿殿後室爲五經萃室西牆後爲弘德殿昭仁之左東出者爲龍光門弘德之右西出者爲鳳彩門乾清宮清沿明制順治十二年重建康熙八年修嘉慶二年災同年修三年工成昭仁弘德兩殿亦襲明舊嘉慶二年重建



乾清宮在明爲帝后所居清初猶沿其舊其後乃爲臨軒聽政及歲時內廷受賀賜宴之所

昭仁殿昔貯宋金元明舊版書籍名天祿琳琅五經萃室藏岳珂刊板五經

宮左右兩廡東廡中間東出者爲日精門門北爲自鳴鐘處端凝殿註御茶房門南爲御藥房祀孔處轉南而北向者爲上書房昔爲皇子皇孫肄業之所西廡中間西出者爲月華門門北爲批本處懋勤殿門南爲尙乘轎爲內奏事處轉南而北向者爲南書房爲宮監辦事處一名敬事房南書房昔爲內廷詞臣直廡

註 故宮考端凝殿取端凝凝旋之義爲貯冠袍帶履之所嘉靖十四年七月改今殿內所儲爲寧帽靴珠

香書箱等物官統剪下之辮髮亦置此殿北小庫儲康熙雍正乾隆歷年所製瓷器琉璃器余按瓷器琉璃器一語應改爲畫珐瑯瓷胎各器卽俗所謂古月軒也清代古月軒珍品均儲此庫中以紅木匣盛之其銅胎者稱銅胎畫珐瑯瓷胎者稱瓷胎畫珐瑯玻璃胎者稱玻璃畫珐瑯匣面皆刻其名余於點查清宮時親見之

乾清宮後正中南向者爲交泰殿

交泰殿滲金圓頂制如中和殿殿內中懸清聖祖御筆扁曰無爲中設御座左安銅壺滴

漏右安大自鳴鐘兩廡之中東出者爲景和門西出者爲隆福門交泰殿清沿明制順治十二年建康熙八年嘉慶二年修

交泰殿昔爲藏御用寶璽之處今璽匣猶存

交泰殿後正中南向者爲坤寧宮

坤寧宮廣九楹左爲東暖殿右爲西暖殿與乾清宮左右昭仁弘德相值東暖殿之左東出者爲永祥門西暖閣之右西出者爲增瑞門東廡爲壽膳房西廡爲壽藥房宮前丹陛與乾清宮相屬宮後北向正中爲坤寧門坤寧宮清沿明制其左右各門亦襲舊名順治十二年重建嘉慶二年宮前簷災同年修其東西暖殿爲康熙三十六年建

坤寧宮註中設大竈安大鐵鑊三爲祭神煮肉處其南北西三面皆設大木炕宮前丹陛上左側設神杆杆旁設日圭昔爲清代遵其滿洲舊俗祭杆喫肉處其祭天地竈神喜神等供棹以及盛肉缸煮肉鍋跳神法器今尙陳列宮內

註 故宮考此宮在明爲皇后寢室所謂中宮也宮後有轍轡清明節宮眷遊戲於此清制凡祭必於寢故中

四間後改爲祭天跳神之處東邊有長桌一以宰牲後有大鍋三以煮祭肉西邊有布偶人之畫像置其所祭之神壁上掛一袋俗名子孫袋內儲幼年男女更換之小鎖此外銅鈴拍板布幔等物均祭時女巫

角門內爲景仁宮前爲景仁門廣生左門內爲承乾宮前爲承乾門大成左門內爲鍾粹宮前爲鍾粹門三宮之東爲東二長街街北端曰千嬰門南端曰麟趾門街西爲履和迎祥兩門街東德陽門內爲永和宮前爲永和門後殿爲同順齋昌祺門內爲景陽宮前爲景陽門後殿爲御書房麟趾門南出凝祥門內爲延禧宮前爲延禧門凡六宮俱南向舊稱東六宮清沿明舊景仁承乾鍾粹三宮順治十二年重建延禧永和景陽三宮康熙二十五年重建延禧宮道光三十年災咸豐五年又災均重修迎祥門舊名凝瑞門

鍾粹宮昔爲皇后遇齋戒期所居

承乾宮爲世祖董后生前所居

景陽宮昔爲貯圖書之處

見乾隆東壁圖  
書貯景陽詩注

延禧宮於民國六年復辟時爲炮彈所燬二十年故宮博物院改修爲庫房

東六宮之東爲一小長街曰東小長街街南端向西直出者爲昭華門與凝祥門相對南轉而東出者爲蒼震門街東爲內庫房曰緞庫曰茶庫曰南果房庫房北爲欽吳門西向門內爲天穹寶殿南向殿前爲天穹門

千秋亭再南而東向者爲養性齋傳清遜帝肄習西文於此齋南即瓊苑西門

註 郭則澐十朝詩乘御苑絳雪軒前有太平花一樹每夏著花淺紅四瓣密蕊聯綴酸香斐然相傳出西蜀

青城山中初名曼瑤宋天聖中獻汴都賜名太平瑞雲花曾見范石湖題詠是花傳聞爲平金川時所進  
光緒甲午圓明園舊殿上忽自生一樹德宗侍慈聖往觀爲之欣賞南齋諸臣各賦詩紀之（中略）乃  
自甲午以後政變迭興明至移國是何花瑞開之花妖可也

郭嘯麓先生則漢詠絳雪軒太平花詩題鳩年芳一往悽吹香成雪雪成泥問名豈  
合危時有留譜端應御愛題舊苑流塵驚夢斷小欄微雨背春啼趙昌花好何人賞  
滿眼殘山劇鼓聲

殿後爲承光門北向門內列金象二門外左爲延和門右爲集福門東西向正中北向  
爲順貞門再其北則爲神武門

御花園清承明宮後苑而略加修改

園中奇石羅布佳木鬱蔥有古柏爪槐皆數百年物牡丹多株遍植樹陰籬畔

瓊苑東門折而南爲東一長街街北端曰長康左門南端卽內左門中間偏南曰近光左  
門近光左門以北長康左門以南街西爲日精龍光景和永祥基化諸門街東咸和左

門內爲景仁宮前爲景仁門廣生左門內爲承乾宮前爲承乾門大成左門內爲鍾粹宮前爲鍾粹門三宮之東爲東二長街街北端曰千嬰門南端曰麟趾門街西爲履和迎祥兩門街東德陽門內爲永和宮前爲永和門後殿爲同順齋昌祺門內爲景陽宮前爲景陽門後殿爲御書房麟趾門南出凝祥門內爲延禧宮前爲延禧門凡六宮俱南向舊稱東六宮清沿明舊景仁承乾鍾粹三宮順治十二年重建延禧永和景陽三宮康熙二十五年重建延禧宮道光三十年災咸豐五年又災均重修迎祥門舊名凝瑞門

鍾粹宮昔爲皇后遇齋戒期所居

承乾宮爲世祖薨后生前所居

景陽宮昔爲貯圖書之處

見乾隆東壁圖書貯景陽詩注

延禧宮於民國六年復辟時爲炮彈所燬二十年故宮博物院改修爲庫房

東六宮之東爲一小長街曰東小長街街南端向西直出者爲昭華門與凝祥門相對南轉而東出者爲蒼震門街東爲內庫房曰緞庫曰茶庫曰南果房庫房北爲欽吳門西向門內爲天穹寶殿南向殿前爲天穹門

天穹寶殿清順治時改建原名文穹寶殿後以避諱改立爲天

天穹寶殿祀昊天帝

東六宮南內左門北爲齋宮南向宮後爲誠齋殿西爲寢宮前爲齋宮門門前左爲陽曜門右爲仁祥門

西出即西一長街

其東爲毓慶宮宮前爲惇本殿後爲繼德堂堂東次室曰味

餘書室再東爲知不足齋西次室爲宛委別藏惇本殿前爲祥旭門再前爲前星門齋宮清雍正九年建嘉慶六年修毓慶宮康熙十八年建乾隆五十九年修繼德堂堂嘉慶六年添建兩宮爲明之宏孝神霄二殿所改

齋宮昔爲皇帝大祀致齋之處

毓慶宮昔爲皇太子所居清後廢立太子之制故其他皇子亦居之

惇本殿東西暖閣皆供佛

宛委別藏爲清仁宗貯阮元所進四庫未錄書處

東六宮北千嬰門外南向殿宇五所曰乾東五所中爲敬事房左爲四執庫再左爲古董房右爲壽藥房再右爲如意館乾東五所清沿明舊

乾五所清道光以前本爲年少皇子皇孫公共所居後改設上述諸館房

四執庫為收掌上用冠袍帶履鋪陳及寢宮幃帳之處古薰房為收貯古玩器皿處如意館為內廷供奉畫工之畫室清末雲南繆素筠女士曾為供奉居之

瓊苑西門折而南為西一長街街北端曰長康右門南端即內右門中間偏南曰近光右門街東為月華鳳彩隆福增瑞瑞則諸門街西咸和右門內為永壽宮前為永壽門廣生右門內為翊坤宮前為翊坤門大成右門內為儲秀宮宮前為體和殿後為麗景軒三宮之西為西二長街街北端曰百子門南端曰螽斯門街東為崇禧長泰兩門街西敷華門內為長春宮宮前為體元殿後為怡情書史咸熙門內為咸福宮宮後為同道堂前為咸福門螽斯門南出迤西啟祥門內為太極殿原名啟祥宮凡五宮一殿俱南向舊稱西六宮清沿明舊永壽翊坤儲秀三宮順治十二年重建啟祥長春咸福三宮康熙二十二年重建厥後易名改建者啟祥宮改為太極殿翊坤儲秀前後開通拆去儲秀門改建體和殿長春太極亦前後開通拆去長春門改建體元殿儲秀翊坤兩宮清遜帝大婚時重修即為其寢興之所自其出走後其室內陳設均照舊陳列毫未變改

西六宮之西為延慶殿前為延慶門殿後為廣德門內迤南而西向者為綏祉門與敷華

門相對迤北而西向者爲永慶門與咸熙門相對再北爲建福宮前爲撫辰殿後爲惠風亭撫辰殿前爲建福門惠風亭後爲存性門門北爲靜怡軒門西爲延春閣閣北爲敬勝齋建福宮清乾隆五年建靜怡軒延春閣民國十二年因敬勝齋不戒於火被燬註惟石山僅存建福宮爲明乾西五所之一

註 清宮述聞附靜怡軒延春閣舊蹟註民國十二年敬勝齋不戒於火靜怡軒延春閣一帶焚燒殆盡歷代收藏古物亦遭浩劫會繪有延春爐餘燼其地俱在西花園內

西六宮南內右門北東向遵義門內爲養心殿殿內東西暖閣重戶曲室各懸榜以爲別殿前爲養心門殿左爲體順堂右爲燕樂堂養心門南爲膳房再南爲南庫養心殿清襲明舊順治年間修葺嘉慶七年重修

養心殿昔亦爲召對臣工引見庶僚之所如乾清宮

清李慈銘五月七日引見養心殿是日甘雨如注恭紀名場卅載號龐眉身是宣皇老秀才執戟久陪郎署列揮毫今見御屏開驪珠一貫承恩奮雉尾雙瞻映日回似說宮中歌得雨濟時誰繼衛公來

三希堂在養心殿西暖閣中



西六宮北百子門外爲重華宮宮前爲崇敬殿再前爲重華門後爲翠雲館東廡爲葆中殿西廡爲浴德殿宮東爲漱芳齋齋前爲戲臺

重華宮本明乾西五所之二所爲清高宗潛邸登極後升爲宮嘉慶七年修光緒十七年重修

乾清門外左側景運門東相對爲誠肅門門內南向爲

奉先殿殿爲二重前後各九楹中爲穿堂以聯之殿前爲奉先門殿東爲夾道即蒼震門前直街奉先殿清順治十三年建康熙二十年修乾隆二年重修

奉先殿清初爲祀太祖太宗之處其後列代帝后神牌亦供奉於此爲太廟四享以外之祭

蒼震門前直街東爲

寧壽宮南向正中曰皇極門東出曰欽禱門西出曰錫慶門又北而西向曰履順門蹈和門北而東向曰保泰門皇極門門外南壁爲琉璃九龍壁門之內爲寧壽門門外列金獅二東出者爲凝禧門西出者爲昌澤門門內爲皇極殿殿後爲寧壽宮宮後亘以長街東即保泰門西即蹈和門正中爲養性門門內爲養性殿統一宮兩殿爲寧壽全宮

簡稱爲寧壽宮全宮清康熙二十八年就明外東裕庫仁壽殿熾鸞殿等處舊址所建乾隆三十七年繕葺添改嘉慶七年光緒十七年均重修

宮舊爲太皇太后皇太后所居太妃太嬪等隨居

宮本爲前後兩殿皇極殿爲清高宗備於歸政後太上皇臨御之所就前殿所改故其殿制一如乾清宮重檐前有丹陛殿中設御座東設銅壺滴漏西設大白鳴鐘

皇極殿後寧壽宮卽舊寧壽後殿宮制如坤寧宮西楹設炙肉祭神大鍋吃肉木炕東楹爲東煖閣

寧壽宮後爲養性殿前爲養性門門外左側東出者爲保泰門門內爲養性殿制如養心殿左右爲東西暖閣閣內亦各榜其楹以爲別養性殿爲乾隆三十七年所增建備爲太上皇寢興之所

養性殿後爲樂壽堂樂壽堂亦爲乾隆三十七年所添建光緒年間慈禧太后曾居之樂壽堂後爲頤和軒軒後爲景祺閣閣後右側有小屋三間名懷遠堂屋前一井傳謂庚子之變慈禧后出走時令內監推溺珍妃於內故今名珍妃井

養性門之東爲暢音閣閣東爲南十三排北十三排閣北相對者爲閱是樓樓東爲竹

院樓後爲尋沿書屋再後爲慶壽堂以上諸樓閣皆乾隆三十七年所添建

慶壽堂北折而東爲景福門門內爲景福宮宮後爲梵華樓樓西爲佛日樓景福宮爲康熙二十八年建嘉慶七年光緒十七年均重修

養性門西與之平列爲衍祺門門內中爲古華軒軒東爲抑齋齋中爲佛堂齋外假山上爲擷芳亭齋西爲矩亭軒之西爲禊賞亭註一西北爲旭輝庭軒後爲遂初堂堂後西爲延趣樓堂之北有山山上有亭曰聳秀後爲萃賞樓樓上爲佛堂樓後迤西爲養和精舍樓北有山山上有亭曰碧螺再北爲符望閣閣西爲玉粹軒又北爲竹香館註二閣後爲倦勤齋齋北迤東即爲貞順門以上樓軒館閣爲乾隆三十七年添建

註一 日下舊聞考亭中刊有畫其昌韻亭今無存

註二 故宮考竹香館內結構悉以竹爲之

乾清門外右側隆宗門西爲

慈寧宮前爲慈寧門門外列金獅二東出者爲永康左門西出者爲永康右門門內正中南向者爲慈寧宮東廡曰徽音左門西廡曰徽音右門宮後爲大佛堂宮左殿宇二層宮後垣外殿宇三所曰中宮曰東宮曰西宮亦稱西三所三所前東出者曰慈祥門與

啟祥門遙對慈寧宮清沿明舊順治十年修康熙二十八年乾隆十六年均重修

慈寧宮亦昔爲太皇太后皇太后所居及太妃太嬪等隨居之處

慈寧門之南相對者爲長信門門內右側爲慈寧宮花園園內前宇爲咸若館館前爲花池池前爲臨溪亭館左爲寶相樓右爲吉雲樓寶相樓南爲含清齋吉雲樓南爲延壽堂館後爲慈蔭樓

慈寧宮西爲

壽康宮前爲壽康門

壽康宮亦爲太皇太后皇太后所居及太妃太嬪隨居處

壽康宮後爲

壽安宮前爲壽安門門內正中南向爲春禧殿殿後爲壽安宮宮前延樓環抱左右相屬中庭有崇臺三層爲演劇之所宮後壘石爲山左曰福宜齋右曰萱壽堂壽安宮爲明咸安宮舊址清乾隆十六年改建春禧殿今僅遺石基三層崇臺今亦無存

壽安門外東西爲一長街街西有長庚門

壽安宮北爲

英華殿前爲英華門殿西北爲城隍廟廟東爲祀馬神之所英華殿清襲明舊康熙二十八年修乾隆二十七年重修城隍廟雍正四年建

英華殿前左右有菩提樹

一名畢鉢羅

各一株極葱鬱中爲碑亭碑刊清高宗御製詠菩提

樹詩

慈寧宮東北爲啟祥門夾道其北南向者爲春華門

舊名凝華門

門內爲

兩華閣閣三層覆以金瓦柱盤彩龍爲宮中精構閣後迤西爲梵宗樓正中爲昭福門門內爲寶華殿殿後爲香雲亭中正殿兩華閣清就明隆德殿舊址改建香雲亭中正殿今已無存

兩華閣三層俱供奉西天梵像

順貞門北相對者爲神武門即紫禁城之北門也

神武門門樓五楹今陳鑿駕鹵簿於其中神武門今爲故宮博物院之正門故顏其額於門上而以舊日之北上門爲外門門外即爲景山前街

神武門以北乾清門以南各宮殿稱爲內廷

北上門外爲景山今亦屬故宮博物院

### 西苑

西苑在大內之西西華門外創自金而元明清遞加增飾金時祇爲離宮元建大內於太液池左隆福興聖等宮於池右明大內徙而之東故元故宮盡爲西苑

太液池在西苑中南北亘四里東西闊二百餘步舊名西海上跨石梁廣二尋修數百步

兩側欄楯皆白玉石鑄鑲東西對峙牌坊東曰玉鍊西曰金鰲其別一梁自承光殿達

瓊華島制差小南北亦對峙牌坊南曰積翠北曰堆雲瀛臺在其南五龍亭在其北萬

善殿紫光閣東西對峙夾岸槐柳多數百年物禁中人舊呼瀛臺爲南海蕉園即萬善殿爲

中海五龍亭爲北海昔時徧植荷花盛夏時花香滿苑民國後雖亦照植而僅以中海

爲盛矣

清李慈銘七月三日獨游十刹海荷花已盡小飲酒樓還至金鰲玉鍊看花作數月

不出轅局駒花時負卻紅芙蓉連旬不斷濯枝雨汀洲夜泣千明珠蘭秋三日旭始

曉亟走柴車北湖道亭亭翠蓋迎人來兩岸垂楊數稜稻悄然獨酌湖之濱湖光俯

照青帘新金銀歷歷見宮闕蓬萊縹渺疑無人回車更沿苑墻走宛宛玉虹隔烟霧

朱華掩映波中央豔帶斜陽尙無數瀛臺瓊島望中過水殿遙聞笑語和賦詩馬上

何年少祗覺風光天上多

太液池金時名西華潭明稱金海清則稱三海或簡稱海子今仍稱三海

中南海民國初年改爲大總統府就舊日苑南寶月樓改爲總統府門名新華門歷次總統皆居之至曹琨被逐出走後遂廢後與北海均改爲公園

瀛臺中爲涵元宮宮前爲涵元殿再前爲香宸殿殿前臨水爲迎薰亭涵元宮後爲翔鸞閣迎薰亭中有清高宗御製詩碑

瀛臺明爲南臺一曰耀臺清順治間增建宮室爲消暑之所康熙中復加修葺光緒戊戌政變後德宗被幽禁於此

瀛臺西對岸爲

流水音

瀛臺北對岸與瀛臺相對者爲

勤政殿殿前臨水舊有人字柳久已枯死惟清高宗御製詩碑尙存

勤政殿東有洋式房屋一區爲民國後袁項城爲總統時所增建名政事堂

勤政殿西爲

豐澤園園內正中南向爲頤年堂院中東西海棠各一大株花開時絢爛異常

頤年堂後爲遐矚樓東爲松壽齋西爲純一齋

豐澤園昔爲皇帝演耕之所迄清德宗仍行之

見翁文恭  
公日記

豐澤園西爲

大圓鏡中中疊石山甚美石山後爲聽鴻樓再後爲春耦齋

大圓鏡中西爲

卍字廊

春耦齋後爲

居仁堂

居仁堂爲清光緒年間西太后所建之海晏樓民國後改今名爲總統辦公處居仁堂

西爲果園

居仁堂北迤西爲

懷仁堂

懷仁堂爲昔日之儀鸞殿民國後改今名爲總統時代覲見庶僚及慶典宴會之地



懷仁堂後爲

福祿居曾爲總統眷屬所居

循太液池西岸而北爲

紫光閣

紫光閣舊爲殿試武進士騎射及新歲宴外藩處

清高宗曾繪平定回部及大小金川功臣於此閣

中南海游泳池在紫光閣南民國二十一年設

太液池東岸與紫光閣斜對者爲

萬善殿前爲萬善門西行抵水埠有亭出水中爲

水雲榭榭內有清高宗御書太液秋風四字碑爲燕京八景之一

萬善殿本芭蕉園（簡稱蕉園）舊址清順治中改建爲佛宮其北出之門今尙稱蕉

園門

水雲榭迤北橫貫東西兩岸石梁爲

金鰲玉躑躅橋明名金海橋

橋東一高阜，登爲圓城。名團城，設以睥睨，自兩掖洞門而升其上，正中爲

承光殿，殿基與睥睨平。中供玉佛，殿南置元代玉甕，舊稱瀆山大玉海。以石亭覆之，甕內鑄清高宗御製玉甕詩，而諸臣和詩，則鑄勒石亭楹柱院中。柏檜森立，有古松栝各一株，皆千數百年物。殿後爲敬躋堂、古籟堂、朶雲亭、餘清齋等殿宇。

團城北爲北海，有石梁一名積翠堆雲橋，過橋爲

瓊島，卽金元瓊華島。

黃節正月五日雪過北海詩：一冬無雪入春來，初日橫窻曙未開。闕戶當階如見月，命車亭午始登臺。方方地坼難降蟄，藉藉冰層更作堆。天意可能回麥候，九城枯盡蓬牛糞。

又黃節二月六日雪後過北海詩：便作江湖寂寂看，今朝北海見冰瀾。獨留隔歲愆時雪，滿落深蘆沒水灘。春尙造寒將易暖，樹初含綠豈勝殘。思量已是花朝近，一再遲歸爲牡丹。

又黃節七月十九日北海待月詩：月遲人不待，林淨水初明。昨雨留雲氣，前舟礙櫂聲。方秋十九夜，有宿二三贏。見史記天官書獨喻傷時意，清光爲我生。

籍亮僑先生忠寅雪中與雨南同游北海踏雪水上詩睡餘雨雪未全晴步入園林  
覺眼明萬石隱青纒露角一天飛白不聞聲莫愁蠟屐沾泥滑卻笑冰船引繯行舊  
事依稀能記否北溪馳踏路縱橫

瓊島踞太液池中奇石巖巖皆宋良嶽之遺目汴中輦至燕者島下最前為永安寺入寺

門為法輪殿殿後左右各一亭左曰引勝清高宗御製白塔山總記碑在其中右曰滌露四面記碑在其中周廻疊石

為洞玲瓏窈窕即所謂移自良嶽者也洞本可穿行而上今已杜塞再上又有亭二左

曰雲依右曰意遠平處為佛殿四曰正覺普安聖因宗鏡再上為頂即為白塔塔清順

治年間就廣寒殿舊址所建廣寒殿相傳為遼后洗粧臺塔前為善因殿供番佛塔後列刹竿五傳謂

其下為藏信礮處今存

永安寺墻之東緣山而上為慧日亭再上為般若香台台東為智珠殿寺墻之西上為

悅心殿再上為慶香樓左側為靜憩軒右側為水精舍西下為甘露殿再下為琳光殿

由白塔後東側北下為看畫廊古遺堂再下為倚晴樓最下為紫翠房西側北下為交

翠庭酣古堂堂東為承露盤西為閱古樓四壁嵌三希堂法帖碑刻稍北為畝鑑室再

下為分涼閣正中北下為延南薰為瀾瀾堂右為道寧齋瀾瀾堂上為碧照樓道寧齋

上爲遠帆閣

瓊島左麓有清高宗御書瓊島春陰四字碑爲燕京八景之一

元納新粧臺詩  
廢苑鶯花盡  
荒臺燕麥生  
韶華如逝水  
粉黛憶傾城  
野菊金鈿小  
秋潭玉鏡清  
誰憐舊時月  
曾向日邊明

明文徵明瓊華島詩  
海止三山擁翠霞  
天宮遙在碧雲端  
古來漫說瑤臺迥  
人世寧知玉宇寒  
落日芙蓉烟裊裊  
秋風桂樹露團團  
勝遊寂寞前朝事  
誰見吹簫駕綵鸞  
清施閏章上元日御苑登洗粧臺詩  
禁林燈節許人來  
太液蒼茫接漢回  
前代御舟猶水榭  
中天白塔舊粧臺  
苑亭重繞滄洲出  
宮殿高擎麗日開  
向夕含情遙指點  
景山終古自崔嵬

清李慈銘丙子九日偕敦夫等瓊島登高訪遼后梳妝臺紀  
以二詩  
觚棱麗日照秋鮮  
白塔晴標百尺巔  
郭外風雲通極塞  
禁中樓閣出諸天  
玉河曲繞千章木  
金闕平分萬戶烟  
多少登高萸菊會  
不知蓬島有今年  
耶律粧臺事已賒  
完顏樓殿創瓊華  
龍蛇旗影三霄仗  
金粉天香六代花  
王母鏡開滄海日  
玉妃裙起赤城霞  
祇今太液秋光滿  
終古神居屬漢家

黃節瓊華島登高作登高惟覺此身孤佳日悲秋老不殊落木明河雙闕下黃花尊酒一時俱驚心事變非前有去難遊方已絕無群盜滿山催嘆急衰遲憂患共相驅太液池北岸與瓊島遙對爲

五龍亭亭後爲闡福寺寺內大雄寶殿後本有高閣供白傘蓋佛俗名千手千眼佛高數丈民國八年不戒於火焚燬無餘寺西爲大西天前爲極樂世界後爲萬佛閣寺東爲快雪堂今爲松坡圖書館堂北迤東爲九龍壁再東爲天王殿前有琉璃磚坊榜曰須彌春沿池北轉再折而東爲靜心齋今爲董事會會議處

太液池東岸與瓊島正對者爲陟山門迤邐而北爲濠濮間再北爲畫舫齋今爲董事會會所最北爲蠶壇

三海自闢爲公園後亦招商設酒館茶肆與中央公園同中南海各殿宇以未完全開放故酒館茶社較夥北海則漪瀾堂道寧齋濠濮間五龍亭慧日亭般若香台等處均設肆外且於積翠堆雲橋西臨水築屋五楹名雙虹榭白塔後築屋數楹名攬翠軒天王殿快雪堂之間築屋一區爲仿膳社皆爲茶點肆故都士女夏則泛艇冬則嬉冰蓋爲稷園外第一之勝地也

籍忠寅穀兩日與蓮池同學谷九峯常朗齋鄧和甫劉宗堯徐潤吾劉治琴劉潤琴  
王琴南高闔仙邪贊庭吳詠湘常稷笙寫影北海濠濮間圖成題長句記之杖而坐  
者有二子谷前常後首屈指臨水箕踞拙園氏據石跌坐劉居士中間城北徐公美  
至老不教髭上嘴劉家兩難兩旁止方是乃兄圓是弟琴南白鬚白如此闔仙笑口  
笑不已邪子吳君年後起白面翩翩猶可喜吾籍有甥其老矣一人披裘衆倒屣  
穆筆一字籍  
甥最後至老亮老亮誰似爾脫帽露頂人叢裡十有三人會濟濟同是蓮池舊桃李  
昔日風雲氣驅使狂來直與天拚死三十年間一瞬駛十九童頭半脫齒眼前春色  
麗如綺且醉蒼顏鬥紅紫今日花開人不理明朝人與花何似披圖更喚圖中人姑  
作當年吾輩祝



## 故都變遷記略卷二

### 舊皇城二

紫禁城之後及其左右兩側並西苑之右側北至地安門東至東安西至西安東南至南池子南口外皇城舊址西南至南長街南口外皇城舊址俱爲舊皇城惟昔日南池子南長街均無南口須繞行東安西安兩門自民國三年各關一門閉爲通衢可直達前門矣

### 紫禁城後爲

景山一名萬歲山爲大內之鎮山高百餘丈周垣二里北上門本爲景山正門自故宮闢爲博物院後遂移爲博物院之外門而以其第二重門榜爲景山門門內山下正中爲綺望樓山本五峯峯上各一亭昔俱供佛今惟中亭佛像尙在餘俱無存山旁翼以短垣接東西圍牆山後東曰山左裡門西曰山右裡門中南向者爲壽皇殿  
景山左麓有古槐一株爲明思宗殉國縊死處清代以鐵鍊鎖其樹民國後解之而易以碑記



地安門在景山北爲皇城之北門明名北安門俗呼厚載門

地安門內之納福胡同舊名內府庫內恭儉胡同舊名內官監

景山東爲景山東大街西爲西板橋大街後爲景山後街街正中爲甬道直連地安門

甬道左右各有連房數十間昔爲清八旗兵丁關領錢糧之處

甬道東黃化門大街舊名黃瓦門

清朱竹垞賜宅在黃化門東南今其故址已無可考

清朱彝尊詩講直華光殿居移履道坊經營倚將作宛轉繞宮墻對酒無非月攤書

亦有牀承恩還自晒報國祇文章

慈慧寺在慈慧殿內爲明司設監廨

興隆寺在東板橋大街

火神廟在火藥庫胡同

明代司禮監在黃瓦門內故其附屬之鐘鼓司蠟庫簾子庫織染局等亦均在其地左  
近今僅胡同尙存其名而遺跡已無可考清代殯殮官眷之吉安所即明司禮監舊廨  
今亦無存

景山東大街街東之馬神廟街今易名爲景山東街其馬神廟本爲明之御馬監馬神舊祠今尙存

北京大學第二院在景山東街即清末京師大學堂校舍本爲四公主清高宗四女和嘉公主舊邸大學東爲松公府民國後亦併歸大學改爲圖書館再東爲

嵩祝寺昔爲章嘉呼圖梵修處

〔五行九字下 佛克圖二字〕

嵩祝寺後巷東出爲東安門北河沿

御馬圈在河沿銀閣即明御馬監故址今已無存但其巷仍稱馬圈胡同內六區區署在銀閣

北箭亭在河沿極北亭已無存惟其地尙名北箭亭

北河沿中亘一石梁名騎河橋橋西爲騎河樓街今簡稱騎河樓街南姐姐房內蒙福祿館本

名闕葫蘆罐以其巷祇一出口如葫蘆也

清華同學會在騎河樓

八旗先哲祠舊爲八旗會館在北河沿

北京大學第三院在北河沿爲清末譯學館舊址

北京大學第一院在沙灘民國三四年間胡次珊仁源長校時所築

沙灘西口外爲北池子大街

宣仁廟在北池子大街舊名北池街街東清雍正六年建以祀風神

凝和廟在北池子大街街東清雍正八年建以祀雲神今廢爲小學

清吳巖冬夜宿雲神廟詩紫禁森嚴傍帝居丁丁寒柝夜何如雲神廟裡三更月有  
客披裘讀道書

北池子大街舊日尙有武備院署及其所屬之甲庫氈作靴皮作鞍庫等又俄羅斯文  
館今俱無存

過東華門大街與北池子直對爲南池子大街

普度寺在南池子大街東爲清初睿親王府舊名瑪哈噶喇廟爲明南城舊宮遺址今廢  
爲小學

南箭亭在馬鞍橋河東今已無存

皇史宬在南池子大街東表章庫胡同內爲清代藏寶錄處

南池子大街東舊日內府磁器殿疋各庫均在其地庫雖久廢而地尙以其名又舊日

尙有鞍作外養狗處均在南池子街南今遺址已無可考

堂子在南池子大街東南爲清代依其滿洲舊俗祭杆處本設東三門外光緒庚子被燬改建於此今殿宇尙存扁而未用

飛龍橋在南池子大街西跨玉河即明飛虹橋遺址

明朱維京度飛虹橋詩鯨海遙涵一水長清波深處石爲梁平鋪碧甃連馳道倒瀉銀河入苑牆晴綠乍添垂柳色春流時泛落花香微茫迴隔蓬萊島不放飛塵入建章

南池子大街南口內跨玉河一橋爲

牛郎橋橋西爲銀絲溝東爲菖蒲河

歐美同學會在南灣子爲石達子廟舊址民國五年立

南北池子之間東西橫亘一街爲

東華門大街今改名爲東安門大街其實東安已拆而東華尙存街反以東安名殊不可解

孔德分校在東安門大街街北爲清宗人府舊址

宗人府原在戶部街後遷東安門內

其旁之孔德東西巷舊

名宗人府東西巷

西板橋大街街中東西橫亘爲陟山門大街街南折而西爲三座門大街

大高玄殿在三座門大街南向門前東西南三面各一坊南坊前左右各一亭鈎簷門櫺

極盡人巧相傳呼爲九椽十八柱最近重修

大高玄殿供三清象清因明舊明代崇奉尊嚴內官宮婢習道教者俱於其中演習科儀

明夏言雪夜召詣高玄殿詩迎和門外據雕鞍玉鍊橋西度石關琪樹瓊林春色淨

瑤臺銀闕夜光寒鑪香縹渺高玄殿宮燭瑩煌太乙壇白首豈期天上景朱衣仍得

雪中看

循大高玄殿西行折而南爲北長街

萬壽興隆寺在北長街街西爲明兵仗局佛堂清康熙二十九年改今名

昭顯廟在北長街街西清雍正十年建以祀雷神今廢爲市立教育會

靜默寺在昭顯廟南爲明關帝廟舊址清康熙五十二年重建改今名

清杭世駿過靜默寺飯海公禪房詩示講鬱苦味聞禪愛流涎山僧願我笑手酌青

瑤泉屢顧松影直偃張週義轅佛堂火微綠照徹顛毛顛又浹旬後海公復攀茶話  
詩廣漠風來樹杪聞殿鈴續續話侵雲諸天爲供伊蒲饌居士誰傳淨土文義外風  
巖憑客借詩中蔬笋讓公分日曠並馬重闌隔欲請吾師更一云

福佑寺舊傳爲兩神廟在北長街街東清雍正元年建殿以供聖祖大成功德佛牌以其  
寺爲聖祖冲齡時防出痘避居禁外當日保母護御之邸也民國後充  
班禪辦事處

北長街在清代內府所屬諸司署多設於其地街西有慎刑司慶豐司會計司街東有  
營造司官房租庫署武英殿活字板處管理番役署民國十四五年時均爲有力者攬  
去

市立女子第一中學在北長街南頭即會計司舊址

過西華門大街與北長街直對爲南長街

南長街內之西大街舊名猪肉下坡大宴樂胡同舊名大烟洞胡同爲明寶鈔司製鈔  
烟洞所在舊名七十二烟洞

文化基金會在南長街街西爲靈官廟舊址

玉鉢菴本明御用監舊址以曾存元代玉甕得名

玉甕名瀆山大玉海元代本置廣寒殿後流落此菴中清乾隆十年以千金易之移置  
圍城承光殿別製石鉢以存舊名

南長街南口內跨玉河一橋爲

織女橋

北平律師公會會所在織女橋西南向臨水民國元年立

真武廟在南長街織女橋南爲明寶鈔司故址

華北中學在南長街西大街西南爲昇平署舊宇

南長街舊日尙有掌儀司管理三旗納銀莊署亦於民國十四五年間爲有力者擯去

南北長街之間東西橫亘一街爲

西華門大街爲由大內通西苑之路

南花園在西苑門外明時爲灰池種植瓜蔬於坑洞內烘養新菜以備春盤薦生之用立  
春日進鮮蔬名曰咬春清改爲南花園種植花樹澆灌培植蘇杭所進盆景又於暖  
室烘養芍藥牡丹諸花每歲元夕送人大內陳設又於秋時收養蟋蟀至燈節置之

山燈內以聽蛩聲今其地併歸市立女子第一中學

奉宸苑在西苑門之旁爲清代總理苑圃河道稻田之署民國後廢  
都虞司署在西華門外路北久廢

三座門大街之西爲文津街街爲民國十六年新予之名

國立北平圖書館在文津街南向昔爲小馬圈爲明玉熙宮故址民國二十年建院中兩  
華表爲圓明園故物

文津街之西爲西安門內大街

社會調查所在西安門內大街南向民國十五年設原名社會調查部後改稱所  
參謀部署在西安門內大街南向國都南遷後廢

法國天主教堂在西安門內大街西什庫俗稱北堂

若瑟總院 光華女校在西什庫街東

養病院在西什庫街西

農務總會在後庫東夾道

市立第四中學在後庫東夾道



西安門內大街街北之養蜂夾道舊名羊房夾道以其巷昔爲畜羊之所故名其巷本有南口通大街以社會調查所建後遂塞又劉藍塑胡同舊名劉鑿塑以元劉鑿嘗從阿爾尼學西天梵相巷內元都勝境之三清像爲其所塑故也元都勝境久廢

旃檀寺原名弘仁寺在養蜂夾道西北寺爲明清馥殿清初聖祖改建爲寺迎鷲峯寺旃檀佛像供養於內光緒庚子之變燬於兵火清末就其址改建兵房歷來京畿衛軍多駐於此其西之教軍場即明之內教場今其地尙以教場名

寺後西北明有虎城以檻虎武宗之豹房亦在其左近今遺跡已無可考

大光明殿在西安門內大街街南相傳明世宗與陶真人講內丹處清光緒年間尙有法官居之末年廢

清高士奇賜宅在大光明殿胡同內今其遺址已無可考

清高士奇賜居西苑移家詩客中陋巷爲家久忽訝恩輝住苑西牛背馱書千卷重擔頭桃樹兩株齊門前金碧瞻天闕屋內鸞龍有御題仲蔚蓬蒿十年事一枝偏借上林棲

西安門內大街中折而之南爲府右街

北平市政府署在府右街街東爲清集靈園

明之靈池

舊址宣統元年改建爲攝政王府三年

甫成而清鼎革民國二年總統府設於中南海因其毗近遂以爲國務院府右街亦當

時所闢國都南遷後改爲市政府署

培根女校在府右街街西爲明雲機廟舊址

以上爲內六區轄地



# 故都變遷記略卷四

## 內城一

勝清六部九卿官署多設於天安門皇城外左右兩側闕東自北而南爲宗人府次吏部次戶部又次禮部俱西向四署後街首爲兵部次工部次鴻臚寺次欽天監又次太醫院亦俱西向東長安街街南玉河橋之西北向者爲翰林院玉河橋東岸西向者爲詹事府東城根玉河橋之東爲太僕寺東長安街南向者爲理藩院闕西自北而南爲鑾儀衛次太常寺次都察院次刑部又次大理寺俱東向鑾儀衛之西北爲律例館西長安街今此段改稱府前街街南北向者爲通政司清光緒庚子之亂闕東兵工諸署多燬於兵火辛丑和議拓展使館界更多圈入益以光緒末年之變更官制官署之地址胥多改易矣

正陽門內棋盤街左右東爲東交民巷西爲西交民巷（本名江米巷後訛）

清代自與歐美各國通商後其使臣多居東交民巷內但與商民雜居自庚子之變辛丑和議成後始將其一帶劃爲使館界南自東城根北迄東長安街西自東交民巷西

口東迄崇文門大街因之其一帶街巷變動甚大

內城各大街多建坊如東西交民巷口各有一坊東西長安街各有一坊東西四牌樓各有四坊之類惟街道增高牌坊年久失修其柱礎多陷入土中且檐枋腐朽楹柱倚斜故東西單兩牌坊先後拆毀民國二十三年袁文卿良長北平市向中央求帑金百萬修整市容次第改建煥然一新洵民國後一盛舉也

舊日街制自南以至北謂之經自東以至西謂之緯大街二十四步小街十二步民國以來街道大都展拓亦無一定之尺度矣

南曰正陽門清因明舊俗稱前門明初依元制名麗正正統間改今名

棋盤街在正陽門內中華門之前昔日周迴繞以石欄四圍列肆長廊百貨雲集名千步廊民國初開兩側洞子門時石欄已易爲洋灰質且東西開通非復舊形千步廊亦撤廢

棋盤街東東交民巷西口有牌坊一座榜曰敷文故名

敷文坊坊以北大街爲公安街舊名戶部街街東最北爲警察局所屬之保安隊及消防

隊爲宗人府舊址

宗人府於庚子亂後移東安門內

警察局在公安街爲清吏部舊廨藤花廳今尙存

註 宸垣識略明吳寬手植藤花今在穿堂之右屋三楹曰藤花廳爲吏部長官治事之所

菸酒事務署在公安街爲清度支部即戶部舊廨國都南遷後廢

按度支部舊署民國初年財政部曾居之後建新署於府右街此署遂改爲菸酒事務署

郵政總局在公安街爲清禮部舊址

公安街後與之平行者爲東公安街舊名兵部街

公安街北口折而東爲北公安街吏戶兩舊署之間有一橫街名富貴街舊名戶部北夾道郵政總局右側折而東爲新大路爲民國後所新闢

東公安街即舊兵部街清初稱東公生門直街街東本有兵工鴻臚欽天太醫五署光緒庚子燬於兵燹後均移他處其舊基於辛丑和議成後圈入使館界其東長安街之

翰林院翰林院後移於通政司理藩院堂子堂子後移於南池子街東城根之太僕寺玉河東岸之詹事府亦

同圈入太醫院古銅人今尙保存於故宮博物院陳列樂壽堂東暖閣

玉河橋在東城根者曰南玉河橋在東交民巷者曰中玉河橋在東長安街曰北玉河

橋今則不復有此分別玉河橋水自皇城內南箭亭流出南穿城歸入正陽門環城河使館界內各國使館因國都南遷雖亦先後南徙但其舊址則未廢東交民巷街南自西至東首爲美國使館左側爲美兵營次荷蘭使館次花旗銀行再次匯理銀行過玉河橋首六國飯店次匯豐銀行次德國使館次怡和洋行次比國使館再次德國兵營街北首法國醫院次拐角處爲麥加利銀行折而北爲東公安街街東首俄使館次俄兵營再次俄操場巷中間折而北玉河西岸東向者爲英國使館館後爲英兵營其北爲英操場玉河東岸西向者爲日本兵營過玉河橋街北拐角處爲日本正金銀行次西班牙使館次日本使館次法國使館由法使館折而北爲台基廠台基廠爲明工部堆放柴草之所街西爲義使館再西爲義兵營街東頭條胡同內爲奧使館其旁爲奧兵營三條胡同內爲法兵營其東爲德國醫院與台基廠相對一小巷爲洪昌胡同舊名紅廠胡同出台基廠南口仍折而東街北爲天主堂次爲德華銀行再次爲德兵營街南爲比使館次爲德兵營出巷口即崇文門內大街街西爲美國同仁醫院醫院北爲各國跑馬廠折而西臨東長安街則爲各國操場

海關稅務司北平公署在台基廠街西爲清總稅務司舊廨

海關稅務司辦事處在台基廠二條胡同內

使館界內昔日衙署尚有教習庶常館會同館鑾儀衛外駕庫府第尚有淳親王府裕親

王府肅親王府安郡王

後晉封和親王

府祠宇尚有怡賢親王祠昭忠祠三官廟元寧觀化成

寺紫竹庵觀音庵福泉庵松雪庵坊巷尚有賣羊胡同經板庫水獺胡同藥庫驢達子

館白家柵欄

一名白家大門

花子營

一名花枝營

鐵門胡同花園下坡化成寺夾道等其遺址已不

易考但近人曹宗儒君所著庚子役後北京城內之變遷一文

見中和月刊第二卷第七期

敘述各使

館舊址一節雖未盡確然亦十得八九詳錄於後

俄使館 大略爲舊兵工兩部之一部分及太醫院欽天監等地

英使館 爲和親王府達子館翰林院鑾駕外庫鴻臚寺及兵工兩部之一部分等地

以上在東交民巷之大街迤北玉河橋迤西一帶

義使館 爲堂子及肅親王府之一部

日本使館 爲詹事府柴火欄及肅王府之一部

法使館 爲慶公府及太僕寺一帶

按法使館在巷北無佔城根太僕寺之理恐誤

德使館 爲牛角灣白家柵欄頭條胡同二條胡同及廣成木廠等地



葡萄牙使館 爲經板庫一帶

奧使館 爲鎮國公榮統第

按即裕親王府

以上除各使館外迤東操場一帶爲舊日之賣羊胡同化成寺舊址等地爲玉河迤東崇文門大街迤西東長安街迤南東交民巷迤北一帶

美使館 爲會同館教習庶常館巾帽胡同貂皮巷一帶

荷蘭使館 爲怡賢親王祠及舊有民房石廠澡堂等地

以上爲玉河迤西東交民巷迤南一帶

六國飯店 爲太僕寺一帶

比利時使館 爲徐桐故宅柴火欄水獺胡同一帶

傳聞徐桐厭與西人同巷曾署其門聯云望洋興歎與鬼爲鄰後以左袒拳匪聯軍破城自知不免自縊而死

以上爲玉河迤東崇文門大街以西東交民巷迤南之地

南之左曰崇文門清因明舊明初依元制名文明正統間改今名俗稱哈達門以元時哈

達大王府在門內故也

崇文門大街與東四牌樓之間舊有牌坊一座曰

東單牌樓民國十二年拆毀稍南尚有克林德石坊註民國八年拆卸移建於中央公園門內名公理戰勝坊

註 燕京叢考按光緒庚子義和團之變亂民殺德使克林德於東單牌樓大街石大人胡同之西口和議成乃建碑於其地以謝民國十年歐戰解決我國以加入聯軍故對德爲戰勝國於是將克林德碑之石材移建於中央公園以垂紀念門前赫然矗立之公理戰勝坊是也

崇文門大街街東之洋溢胡同舊名羊肉胡同小報房胡同舊名豹房胡同八寶樓舊名八步樓

婦嬰醫院 慕貞女校均在崇文門南城根後溝

聖道學校在南城根溝沿頭

匯文學校在船板胡同

苦井在蘇州胡同三元庵前相傳明弘治間正月朔日晨有術士汲其水往甜水井中易水而來向井說詛而下之此井遂變爲甜水今井已涸

清盛伯希祭酒昱故宅在蘇線胡同

清梁鼎芬寄懷宗室祭酒盛昱詩子固神儀絕世奇意園林木幾人知風狂雨橫何  
曾到葉落花開有所思千里夢君猶識路八年去國且編詩沈吟雪夜紅燈冷袖裡  
瓊笛卻付誰

于忠肅公祠在西裱背胡同南向

按日下舊聞公祠乃就東裱背胡同公故賜宅所建清乾隆年間已廢見宸垣  
輿略此祠

當為後所重建

清沈德潛謁于忠肅祠詩神龍困魚服司馬握兵權早決飴甥計羞同宋室遷廟堂

勞定位刀俎答籌邊晤對文山像忘身知有年忠肅自事後書懸  
文文山像於臥所

法文商業專門學校在官帽胡同

靈藏觀音寺在西觀音寺胡同

棲鳳樓舊名齊鳳樓久訛

清梁節菴先生鼎芬寓居棲鳳樓

清梁鼎芬臘朔自米市胡同移居棲鳳樓詩漫與移家作新吟擊壤窩地偏觀物變

春近抱天和翔仍須孤鳳賦書欠二驂看花意園近乘暇一經過按意園謂盛伯  
希祭酒花園

總布胡同舊名總把胡同亦無東西之分

清李文忠公鴻章祠在西總布胡同

外交部街舊名石大人胡同清末設外交部其署建此巷內因改今名民國仍之國都南遷後廢爲外交部檔案保管處

華北政務整理委員會即外交部舊廨

青年會在崇文門大街街西金魚胡同口外

泡子河一名南河泊又曰南灤在崇文門內東南隅昔爲消暑勝地兩隄柳綠數頃荷香頗饒野趣今水已涸蓮亦不植無復昔年風景矣

清李慈銘借孺初諸君由天寧寺遊南荷花汧日落追涼詩看山意未已言就納涼處微徑入野田水與馬爭路南汧富荷芰烟中有人語招邀無主賓列坐當沿泝隄上楊柳風下掃蓮葉露斜陽忽到花知是風開樹水榭臨紅妝綠窗隔紗霧暝色來池邊悵望碧城暮安得問鄩令租我花間住

清張之洞和茗樓即樊樊山南河泡詩江海無能一病骸獨欣藪澤免塵埋早涼林鵲聲

先喜殘睡漁翁眼下措謀野曾無裨謔獲遊車姑學邵雍乖鑑湖偷荷君恩賜致仕

何妨被硬差

清鄭孝胥三月三日林山腴招集南河泊 微陰三月三草生水初活相將趨水次

天影照 水公勝秋水釋未匝月水邊雖無人春氣自發越畏廬商畫稿最取

山一峽林間翠堵坡勢古湧木末嬉遊甘適野聊復衝冠髮肉食者謀之棖棟崩且

折吾儕歸何黨曷不樂今日

呂公堂在泡子河旁昔爲大比之歲士人乞夢處

寶源局新廠在泡子河爲清代鑄錢處清末廢

觀象台在泡子河北城垣上

貢院在城東南隅觀象台之西北爲元禮部舊址清光緒庚子之變毀民國後闢爲民居

號貢院區

崇文門大街西與之平行一長街爲

王府井大街原名王府街以明永樂十五年建十王邸通八千二百五十楹於其地故名

王府井恐係俗稱

內一區區署在王府井大街

東安市場在王府井大街街東清光緒末年建屢燬於火皆修復

清翁文恭公同蘇故邸在王府井大街二條胡同註

註 王癸詩存翁松禪師住東城二條胡同舊集句榜門云盡簪喧擾馬東帶聽鳴鷄庚子亂後門巷不可復識矣

協和醫科大學及其醫院在王府井大街東三條胡同內爲豫王府舊址民國五年美人

石油大王羅克非爾捐資所建

日華同仁醫院在三條胡同清末建

且園在帥府園今無考註

註 天咫偶聞且園在帥府園胡同宜伯敦茂才所構有小樓二楹可望西山花畦竹徑別饒逸趣

東安市場後冰渣胡同舊名冰盞胡同

賢良寺在冰渣胡同清末庚子之亂李文忠公奉旨來京議和寓此寺內

按賢良寺本怡賢親王故邸捨爲寺本在帥府園乾隆二十年移建冰盞胡同內

王府井大街北與之直對爲八面槽街東之金魚胡同舊名金銀胡同甘雨胡同舊名

乾魚胡同街西之錫拉胡同舊名錫蠟胡同韶九胡同舊名燒酒胡同均久訛

天主堂在八面槽街東西人郎世寧曾居之舊在甘雨胡同內庚子後拓其地改建正門於八面槽此堂爲北京天主堂之一俗謂之東堂

聖若瑟女學校在椿樹胡同

玉河橋迤東東單牌樓迤西爲

東長安街街正中一坊榜曰東長安街

電報總局在東長安街街北

平漢鐵路局在東長安街街北

東單菜場在東長安街街北

義國醫院在東長安街街北

王府井大街折而西爲

東安門大街東安門舊有門在東安橋外民國十三年拆毀

東興樓在東安門大街爲內城有名飯館

清鄭孝胥花朝飲東興樓詩莫忘人日約花朝九十韶光半已銷吟社何妨期酒肆

詞流最喜共春宵揮毫易動承平感縱飲猶堪塊壘澆攬轡澄清定誰屬相看霜鬢

未全彫

八面槽折而東爲

燈市口燈市舊在其處故名燈市爲明代上元放燈之所爲內城最繁盛之市廛據帝京景物略云燈市在東安門王府大街東崇文街西亘二里許南北兩廛凡珠玉寶器以逮日用微物無不悉具衢中列肆棊置數行相對俱高樓樓設氍毹簾幕爲燕飲之地一樓每日賃直有至數百緡者夜則燃燈於上望如星自正月初八日至十八始罷公理會在燈市口街北

貝滿女子中學在燈市口街北

育英中學在燈市口街北

燈市口大街街北之同福夾道舊名佟府夾道註

註 順天府志佟府夾道順治時孝康章皇后之弟安北將軍佟圖綱康熙時孝懿仁皇后之父內大臣佟國維曾封一等承恩公後并襲其賜第在此故名傳云前明嚴世蕃故宅也 藤陰雜記介少宗伯福第在燈市口有野園在文端由敦有題野園詩順天府志介爲佟氏後人野園今尙存

八面槽北爲



王府大街街東之報房胡同舊名豹房胡同多福巷舊名豆腐巷街西之迺茲府舊名奶子府爲明代爲皇子選乳母處今巷內路北一大第當卽爲其舊址東廠胡同舊名東長胡同並非明東廠之地蓋明東廠在皇城內東北隅其跡早湮  
救世軍在王府大街街東

法華寺在報房胡同內明景泰中太監劉通捨宅建

崇文門大街北至東四牌樓爲東四牌樓南大街舊名東單牌樓大街街東之內務部街舊名勾欄胡同民國初就其巷內民政部舊署設內務部因改今名國都南遷後廢爲內務部檔案保管處街西之禮士胡同舊名驢市胡同

按勾欄胡同一帶明爲黃華坊爲昔日之北里宸垣識略載黃華坊有東院有本司胡同本司者教坊司也又有勾欄胡同演樂胡同相近復有馬姑娘胡同宋姑娘胡同粉子胡同出城則有南院皆舊日之北里也又京師倡家東西兩院籍隸教坊猶是唐宜春院遺意東院以瑟西院以琵琶藉勳戚以避貴遊之擾云

又按大林山人今雋永云勾欄胡同一古廟內有女銅像一像爲坐式高四尺八寸美姿容頭向左偏頂盤一髻插花二枝身着短襖盤右腿露蓮鈎揚左腿左手握蓮

鈎情態妖冶楚楚動人按此地爲明樂戶居住地當爲妓女崇奉之神矣庚子拳亂後不知所之

常寧寺即昭寧寺一名報恩寺在禮士胡同

中國紅十字會總會在乾麵胡同

崇文門大街之東爲朝陽門南小街街東之大雅寶胡同小雅寶胡同舊名大啞喇胡同小啞喇胡同芳嘉園舊名方家園一名方園街西之遂安伯胡同舊名隨安宜胡同陸軍被服廠在祿米倉大街國都南遷後廢

祿米倉大街東舊有智化寺爲明宦官王振所建今尙存寺西爲武學遺址今其地猶稱武學胡同

以上爲內一區轄地



# 故都變遷記略卷五

## 內城二

東四牌樓爲在東四南北大街與朝陽門大街猪市大街十字路口各有牌坊一座故名東坊榜曰履仁西榜曰行義南北皆榜曰大市街

過東四牌樓爲東四牌樓北大街

社交堂爲耶蘇教傳教之所在街西東向創建年月不詳

大隆福寺在東四牌樓大市街之西爲明之仁壽坊其街以寺爲名明景泰三年建役夫萬人撤英宗南內木石助之清雍正九年重修每月逢九十兩日有廟市百貨駢闐爲諸市冠今則廟市依舊但僅爲日用雜物之市集非復昔日之豪盛矣

清查銅鑠雜咏詩興隆隆福兩巷堯南內移來土木饒天子不開香火院紛紛堯省  
愧楊姚

清宋光熊遊隆福寺詩玉石扶欄此尙存秋風南內黯銷魂若教暫緩金仙祀香火  
何如好弟昆 古玩珍奇百物饒黃金滿囊儘堪銷阿誰携得三錢刺盡日吟哦自

解嘲

康熙間寶應朱克生於慈仁寺市以三錢買客氏拜廠刺賦客氏行見池

府學胡同昔以順天府儒學在此巷內故名巷口有一坊榜曰育賢儒學為明宣德中建清仍之今廢為市立第十八小學

按宸垣識略載順天府儒學在教忠坊府學胡同故報恩寺也元末有僧遊湘潭募造報恩寺尙未安像明師下燕戒士卒毋得入孔聖廟僧倉卒借宣聖木主置殿後不敢去遂以為學焉其地為元之柴市宋丞相文天祥授命於此

文丞相祠在府學西鄰明嘉靖二十八年建清道光七年重修民國二十六年又重修此次重修時發見享堂角門階石為教忠坊舊額因裝於堂壁

明李世德過文先生祠詩十年燕市過公祠瓦閣松陰去馬遲九死欲回唐宇宙一生輕繫漢威儀雲飛斜照歸人晚霜重無枝棲鳥疑千古中原今故在忠臣遺恨可

曾知

今此詩石刻於壁間

明章懋謁文丞相祠詩元宋興亡迹已陳忠臣祠宇尙如新夕陽古樹烟猶暝夜雨荒階草自春慷慨六歌空洒淚閒關百戰竟捐身穆陵地下應含笑不負臚傳第一人

明顧清謁文山祠詩碧殿長松鎖十尋晚雲將雪助悲吟貂蟬不改崖山制金石疑  
聞孔壁音南去星潮嗟往事北來祠宇豈公心春風一掬唐衢淚幾爲先生濕短襟  
唐李北海書雲麾將軍斷碑二礎爲清吳涵由少京兆署移豎於祠壁者其吳涵斷碑  
記及孫楫斷碑題後亦同豎于壁護以玻璃

明崇禎十七年三月戊申左都御史李邦華縊於文丞相祠

平津衛戍司令部在鐵獅子胡同

鐵獅子胡同中間南向一巨第傳爲田曉

明思宗田  
妃之父

故第今歸顧少川大使維鈞民國

初其巷西口尙有一鐵獅陷土中今已無存

內城官醫院在錢糧胡同

婦女保健會在錢糧胡同

錢糧胡同內昔有寶源局南廠四條胡同內昔有寶源局東廠均久廢

北平市立傳染病院在十條胡同

適景園爲明成國公花園久廢其巷仍名適景花園今訛爲什錦花園  
聾啞學校在老君堂

水月寺在五條胡同

五岳廟在十條胡同

汪家胡同原名王家胡同後訛

東四牌樓北大街南折而西爲豬市大街豬市大街西折而北爲馬市大街

半畝園在馬市大街西弓弦胡同註

註 麟慶鴻雪因緣圖說半畝園在弓弦胡同內本賈中丞漢復宅李笠翁客賈幕時爲葺新園壘石成山引

水作沼平台曲室奧如曠如乾隆初楊鍊蒼員外得之又歸春醜園觀察道光辛丑始歸於余 天咫偶

聞完顏氏半畝園在弓弦胡同內牛排子胡同園初爲李笠翁所創賈膠侯中丞居之後改爲會館又改

爲戲園道光初麟見亭河帥得之大爲改葺其名遂著純以結構曲折鋪陳古雅見長富麗而有書卷氣

故不易得每處專陳一物如永保尊彝之室專弄鼎彝瓊瑤妙境專藏書畫退思齋專收古琴拜石軒專陳

怪石供大理石屏有極精者鑿硯印章疊疊甚至楹聯亦磨石爲之佛寮所供亦唐銅魏石正室爲雲蔭

堂中設流雲槎爲康對山物乃木根天然臥榻寬長皆及丈儼然一朵紫雲垂地左方有趙寒山草篆流

雲二字思翁眉公皆有題字此物本在康山阮文達以贈見亭先生者信鴻寶也雲蔭堂南大池盈畝池

中水亭雙橋通之是名流波華館又有近光樓曝書廊先月榭知止軒水木清華之館伽藍瓶室諸名

燕都叢考按半畝園民國十年時郭筱麓曾一修葺之假以宴客亭池尙在陳設已虛今又數年無葺治者益漸頹廢矣

大佛寺原名普德寺在馬市大街北大佛寺街

按馬市大街昔日仍爲王府大街不過其地有馬市而已今市久廢而地反易名馬市大街北折而西爲西大街

榮壽公主

俗稱大公主恭親王奕訢長女

府在大佛寺西大街

西大街街東之剛察胡同舊名鋼叉胡同西揚威胡同舊名羊尾巴胡同街西之亮果廠舊名晾穀廠其巷西口即東河沿

中法大學及其附屬中學在東河沿民國十七年立

西大街之北爲交道口南大街南大街之北卽爲交道口

大興縣署在交道口南大街街東國都南遷後縣署移郊外此署遂廢

正東曰朝陽門清因明舊明初依元制名齊化正統間改今名今俗仍稱齊化門

北平大學女子文理學院在朝陽門大街

延壽宮舊名延福宮在朝陽門大街明成化中建奉天地水三元之神清乾隆三十年重



修

警世堂在朝陽門大街

元太廟在齊化門大街曰寅賓里遺趾久湮寅賓里西昔有無量壽菴爲元孝子屠文正所建久廢

朝陽門大街中間折而北爲朝陽門北小街街東之吉兆胡同舊名吉照胡同  
段芝泉將軍故邸在吉兆胡同

陸軍醫院 陸軍軍醫學校 陸軍獸醫學校均在北小街爲東門倉南門倉舊址  
朝陽門北小街之北爲東直門南小街

朝陽學院舊名朝陽大學在東直門南小街爲海運倉舊址民國二年立對面倉神廟今  
尙存

慧照寺在南小街明成化間建其胡同即以寺名今寺尙存

東四牌樓北大街之北爲北新橋

慈壽寺舊名開元寺在北新橋西大街明易名惠明寺清乾隆三十年重修改今名  
大中中學 東北中山中學均在北新橋西大街

北新橋北爲雍和宮大街

道濟醫院 宣講堂 崇慈女子中學均在街西頭條胡同

長老會教堂 清真寺在二條胡同

崇實中學在大三條胡同

天聖寺在小三條胡同

三條胡同內舊有寶源局北廠久廢

市立第五中學在方家胡同

國子監在雍和宮大街西成賢街明之崇教坊即元之舊學明永樂間改爲國子監清仍之民

國二十六年重修辟雍圓水并加丹雘

成賢街東西巷口各有戟式華坊一座榜曰成賢街

國子監中室曰彝倫堂東廊爲繩愆廳爲鼓房有率性誠心崇志三堂西廊爲博士廳爲鐘房有修道正義廣業三堂兩廊室內列十三經石刻前爲辟雍宮清乾隆五十年建宮四面出向周以環池有橋四前有碑亭二有清高宗御製國學新建辟雍圓水工

成碑記

彝倫堂甬道西階下有古槐為元許衡所手植宸垣志略謂為柏者誤清乾隆辛未之歲枯而復榮有  
高宗御製太學古槐詩碑發壁間

清高宗御製詩龔宮嘉蔭樹遺蹟緬前賢初植至元歲重榮辛未年奇同曲阜柏靈  
紀易林乾徵瑞作人化符祥介壽筵喬柯應芹藻翠葉潤觚編右相非誇繪由來事  
可傳

監中古物除石鼓南移外餘俱存

監後垣外舊有清熙文貞元王文敏懿榮兩公祠兩公皆為祭酒死庚子之難今已廢為簡易小學

清張之洞國子監拜熙文貞王文敏兩公祠遂觀石鼓詩戟門階下綠苔生鳳鸞

翔老眼明人紀未淪文未喪巋然十鼓兩司成

孔廟在國子監東大成門大成殿清乾隆二年皆易黃瓦民國二十九年重修清高宗欽  
頒禮器犧尊一雷紋壺一子爵一內言卣一康侯鼎一盟簋一雷紋觚一召仲簠一素  
洗一犧首疊一皆周時法物民國二十二年隨故宮古物南移

殿側一松名鋤奸樹相傳明大瑄魏忠賢謁廟乘轎直登大成殿樹枝忽折擊傷昇夫  
忠賢遂致顛仆故名

報恩寺在雍和宮大街街東報恩寺胡同爲明之居賢坊明成化二年建

洪武元年明兵定燕都元學士危素走報恩寺俯身入井寺僧大梓挽出之謂曰國史非公莫知公死是死國之史也危由是不死翰林待制黃殷士暉投居賢坊井中從人張午負以出曰君小臣而死社稷耶黃曰齊太史兄弟皆死小官彼何人哉午使家人環守至日晨會大將軍徐達下令勝國之臣皆輸告身黃給午取告身午出還求勿得亟往視井則黃已死午買棺以歛且營葬焉

清查嗣璫雜咏詩國史存亡賴老成小臣只合死忠貞泥多莫食報恩井不及居賢井水清

石觀音寺在觀音寺胡同

金太監寺在金太監胡同

雍和宮在街東太保街本清世宗潛邸後改爲寺喇嘛居之宮甚闕闊古物亦夥今仍爲喇嘛廟之最巨者

東之北曰東直門清因明舊元爲崇仁門明永樂間改今名

寶公寺在東直門大街

內三區區署在東直門大街街北

東直門大街中間折而北爲東直門北小街

俄國教堂在北小街清康熙年間建其北爲

俄國東正教總會俗謂之俄國北館對東交民巷舊有之韃子館而言以韃子館舊稱南館也

以上爲內三區轄地

# 故都變遷記略卷六

## 內城三

正陽門內棋盤街西西交民巷東口有牌坊一座榜曰振武故名

振武坊坊以北大街爲西皮市昔明五軍都督府在其街西久廢今其胡同猶稱前府左府中府等名中府胡同北之垂露胡同舊名吹帚胡同桃竹胡同舊名茗帚胡同

銀行公會會所在西皮市民國九年建

西皮市後與之平行者爲司法部街舊名刑部街後又稱法部街清初稱西公生門直街

司法部街街西舊有變儀衛太常寺都察院刑部大理寺五署清末廢變儀衛都察院太常寺就其三署舊址改建

大理院民國仍之國都南遷後廢爲大理院檔案保管處旋

北平地方法院遷入之

地方法院原在四眼井

司法部署爲民國三年就刑部舊署所改建國都南遷後廢爲司法部檔案保管處後又

改爲省黨部

刑部本明錦衣衛故址內有楊椒山先生祠及其手植榆今俱存在大樓後

清大理寺署本明南鎮撫司署故址民國初爲京師高等審判廳後建新署於雙溝沿

此署遂廢今已歇業之懋業銀行卽其舊址

鑾儀衛夾道西爲律例館爲清代纂修律例之處清末館雖移於旗守衛胡同而其地

仍名律例館大院民國初司法部設司法講習所以訓練法官卽就旗守衛巷內之律

例館爲之

清通政司署在西長安街今此段易名爲府前街路南北向庚子變後改爲翰林院署民國後爲文

官懲戒委員會會所後又爲肅政廳國都南遷後廢爲

北平市市參議會

市參議會西爲回回營爲清代辦理回人佐領事務處內有禮拜寺久已頽圮民國初

廢爲民居後又收歸國有

司法部街中間折而西爲絨線胡同其東口外爲雙溝沿

河北高等法院在雙溝沿路北南向

張相公廟在絨線胡同今已夷爲民居

崇實中學在絨線胡同

絨線胡同之南即西交民巷

舊名西江米巷今訛

今俗稱銀行街以北平大銀行多設此巷內也

絨線胡同中間板橋之西民國後新闢之通衢曰新華街原名東溝沿註

註 順天府志西城原有二大明溝一在今之新華街一在錦什坊街蜿蜒數里相地者謂爲雙龍 又同府

志東溝沿明之舊溝也時雨積潦溝水由化石橋出水關入護城河

西交民巷之南爲順城街

自來水公司 電燈公司均在順城街左偏南向

山東中學 尙志中學 北方中學 法文學校均在順城街

順城街極西有高樓南向者爲

天主堂明萬歷二十八年建清順治年間修傳其一部係首善書院舊址

按宸垣識略載天主堂構於西洋利瑪竇自歐羅巴航海九萬里入中國崇奉天主堂制狹以深實正面向外而宛若側面其頂如中國捲棚式而覆以瓦正面祇啟一門窗則設於東西兩壁之巔中供耶穌繪畫而若塑者耳鼻隆起儼如生人左右兩



青島通志卷之四 廟宇  
一  
塼樓夾堂而立左貯天琴昔日日向午則樓門自開琴乃作聲右爲聖母堂以供瑪利亞作少女狀抱一兒卽耶穌也衣無縫自頂被于體云

天主堂西舊有時憲局卽明天啟二年都御史鄒天標副都史馮從吾所建首善書院後禮部尙書徐光啟率西洋人湯若望等借院修歷名曰歷局清仍令西洋人居此治時憲書局廢後而址亦歸天主堂

順城街東頭路南舊有

顯學堂爲京兆士子課藝之處與外城之金台書院同民國後廢

南之右曰宣武門清因明舊初依元制名順承正統間改今名俗稱順治門當係順承之訛

北平大學法商學院第一院在象房橋第二院在象來街一院爲衆議院舊址清末資政二院故址

院爲參議院舊址清末法律學堂故址

象房橋舊有象房爲明清兩代畜象之所蓋凡大朝會駕輦駝寶站班皆用象役象甚多須馴養之象所受祿秩視武弁有等差貢自暹羅緬甸清末兩藩皆失途駭

明代伏日洗象在積水潭清則浴之於宣武門外西護城河以其距離象房近也

象來街西北義智伯胡同舊名豬尾巴胡同光彩胡同舊名棺材胡同

王公廠舊名王恭廠在宣武門內西南隅爲明之火藥廠天啟六年五月朔王恭廠震裂響若轟雷平地陷二坑約長三十步闊十三四步深二丈許塌屋一萬九百三十間壓死男女五百三十七人

承恩律寺在承恩寺胡同爲戒壇下院明憲宗賜如幻禪師住錫其寺今已無存

篤志女學在承恩寺胡同

西城中學在頭髮胡同

石燈庵原名吉祥寺在智義伯胡同元泰定間建明季改今名萬曆丙午吳僧眞程自雲棲來居此發古磬下得石幢一式如燈台旁鐫般若心經唐廣順二年少府斐監施朝請郎趙偃書清黃汝亨手書石燈庵三字額之寺存幢久失

師範大學文學院在石駙馬大街爲清女子師範舊址

婦女協會 協化女校在石駙馬大街

留日大高同學會在石駙馬大街爲清克勤郡王祠堂故址民國二十六年立

民國學院在太平湖爲醇親王舊邸清德宗龍潛之地

培華女校 財政專門學校在浸水河浸水河舊名臭水河

教育部在教育部街爲清學部舊署國都南遷後廢爲教育部檔案保管處

驚峯寺在臥佛寺街寺即唐淤泥寺貞觀二十二年建俗名臥佛寺寺內舊有旃檀瑞相

制作精巧體製衣紋踽踽欲動清康熙四年勅移弘仁寺

成坊街舊名城隍廟街舊有

都城隍廟今存

藝術學院在南溝沿

內二區區署在二龍路舊名二龍坑

宣武門大街與西四牌樓之間舊有牌坊一座曰

西單牌樓民國十二年拆毀

宣武門大街北爲西單北大街街東之武功衛舊名蜈蚣衛街西之關才胡同舊名劈

柴胡同

西單菜場在西單北大街街西

清寶竹坡侍郎廷故宅在白廟胡同其子壽伯菴富與弟仲菴庚子之難仰藥殉節遺詩

有請看國破家亡後到底書生是丈夫句

清鄭孝胥懷座主寶竹坡侍郎詩滄海門生來一見侍郎憔悴掩柴扉休官竟以詩人老祈死應知國事非小節蹉跎公可惜同朝名德世多譏西山晚歲饒還往愁絕殘陽掛翠微

又鄭孝胥傷壽伯莠仲莠詩三年伏處絕艱辛赴死終傷志未伸四海朋交俱失望一門兄弟盡成仁高林奮筆傾酸淚張卓函書帶戰塵莫訝褒忠殊不及朝衣東市彼何人

又鄭孝胥謁白廟胡同寶宅弔唁伯莠夫人出見詩竹坡菊客慘相隨誰信諸孫骨亦灰登榻招魂如見歎入門掩泣更增哀不祥名節嗟爲祟一往清狂渺此才還對鬢孀想遺直可堪憑弔到狐貍

伯莠妻父聯公元亦爲拳匪所害

紅卍字會在捨飯寺胡同總會在山東濟南此爲分會蠟燭寺在捨飯寺胡同明季捨飯於此寺故名捨飯寺久廢註

註 順天府志雙碾胡同有捨飯庵寺興福禪林又穀城山房筆塵唐時禁京城丐者分置病坊於諸寺以廩之亦謂之悲田院即今蠟燭庵二寺也

清鄭孝胥捨飯寺詩燕市秋衣已化緇高樓何處問歸期西風斜日無人院乞與龕  
官作住持

覺生女子中學 貧民習藝工廠在皮庫胡同舊名皮褲胡同

志成中學在口袋胡同其西蘇豆腐作坊原名磨豆腐坊

中國學院 弘達學院在二龍坑中國學院爲鄭王府舊址

清阮文達公元蝶夢園在上崗今無考 註

註 天咫偶聞阮文達公蝶夢園在上崗公有記

師範大學附屬女子中學在關才胡同舊名劈柴胡同

二龍坑西之貴人關舊名鬼門關高義拉今改稱高華里關才胡同內小胡同樂全胡

同舊名羅圈胡同英子胡同西之古直胡同舊名褲子胡同

石佛寺在關才胡同爲元代安御容之所先是寺僧掘地得石佛一寺以此得名

宏廟街舊名紅廟以其巷內有關帝廟也 註

註 順天府志關帝廟俗稱紅廟

西單商場在西單北大街街東堂子胡同口外

孔教總會 孔教大學在西單北大街街東槐里胡同舊名繖子胡同口外

蒙藏學校 翊教女子中學在堂子胡同

洵貝勒府在槐里胡同民國後售與萬將軍福林

衍聖公賜第在太僕寺街今無存

明崇禎甲申三月京城破太樸寺街查氏一門九女皆投繯死

北平大學法商學院第三院在李閣老胡同

李閣老胡同以明李東陽賜第在此巷內而得名今遺址已無可考此巷右側小巷高

義伯胡同舊名狗尾巴胡同

松坡圖書館在石虎胡同爲清吳三桂賜第故址

蹇季常曾居松坡圖書館

季常爲民國初政客後以貧夫婦均自戕於此館中

籍忠寅題蹇季常對酒圖

季常跛一足好飲酒隱於松坡圖書館每哺必大醉友人爲繪此圖以狀之

詩嗚呼介者何如人日日

薄暮酒滿尊萬事不樂惟此君子有十年不全足病時久別杯中物我謂使君天下

豪豈有一蹶遂不復人事萬變安可知病者行健健者衰我今羸疾真蹇蹇君乃大

醉如當時北海青山如畫裡

圖書館第一節在北海

山館圖書亦可喜看君且醉且讀書莫問

明朝天墜如何死

民治中學在背陰胡同

清張文襄公之洞祠即楚學精廬在背陰胡同

清陳太傅寶琛故居在靈境

靈境舊名靈清宮以明時靈清宮在其巷內也宮在明代甚著靈異今遺址已無可考

東斜街內之昌堂門舊名穿堂門

西單牌樓以東府前街以西爲

西長安街街中一坊榜曰西長安街

雙塔寺在街北大柵欄口外金章宗建即元之慶壽寺寺有塔二一九級一七級九級者

額曰佛特贈光天普照佛日圓明海雲佐聖國師之塔七級者額曰佛日圓照大禪師之靈塔明重修易名大興隆寺又曰慈恩寺

明崇禎甲申之變大學士范景文自投雙塔寺井中死之今其井尙存在大柵欄口外舊有碑題曰范文忠公殉節處今無存

交通部署在西長安街街北南向爲清郵傳部舊廨國都南遷後廢爲交通部檔案保管

處

西長安街迤東折而北爲

府右街街爲民國二年所新闢

財政部署在街西東向民國二年建爲清末鑾輿衛署舊址國都南遷後廢爲財政部檔案保管處

鐵道管理學院在府右街街西

四存中學在府右街街東

府右街街西小巷羅賢胡同舊名羅圈胡同

以上爲內二區轄地

西單牌樓北大街之北爲缸瓦市

朗貝勒府即定郡王府舊在缸瓦市街東今已夷爲民居惟其府側著名之白肉館沙鍋

居本名和順居今尙存

實業部署在粉子胡同國都南遷後廢

地質調查所在豐盛胡同



明德中學在豐盛胡同

普恩寺在羊皮市保明刹

華北大學在東斜街爲禮王府舊址

缸瓦市北爲西四牌樓南大街

萬松老人塔在街西磚塔胡同口外久已陷於污穢中民國十六年番禺葉譽虎恭綽爲重修砌短垣以護之

金元間有僧自號萬松野老居燕京從容庵耶律楚材見之參學二年其語文正王曰以儒治國以佛治心王亟稱之又嘗寄孔雀便面附以詩云風流彩扇出西州寄與白蓮老社頭遮日招風都不礙休從侍者索羶牛

磚塔胡同三道柵欄一帶清同光年間爲內城之北里與外城之八大胡同同光緒末年始被驅除註

註

天咫偶聞明代勾欄曾在東城故有勾欄本謂之名至本朝裁教坊其地盡改民居即蓮藕池子河一帶

所謂昔之歌舞場者亦不可問而正陽門以西則改爲花柳之窟矣未幾西四牌樓左近復變爲歌吹之

林始只磚塔寥寥數家繼則方以類聚日繼逾多今則閭閻撲地歌吹沸天金張少年聯騎結駟揮金殆

不下汴京之瓦子勾欄也

大能仁寺在兵馬司胡同

清毛奇齡寄大能仁寺還一和尚詩遙望巖城隔翠微靈山自昔會來稀堂開講席龍初下門傍閒田鳥自飛躡足頓穿三寶地閉身不掛七條衣從他法臘年年換何日相逢話息機

顯靈宮在四眼井胡同爲明代有名之道觀建置宏壯其舊日山門直至兵馬司今則惟餘頽殿數楹而已

平綏鐵路局在羊肉胡同爲清京張鐵路局舊廠

西四南大街迤北折而東爲西安門大街

華北居士林在街北民國十七年設爲佛教信徒會所其右側小巷集雅士胡同舊名雞鴨市

西四牌樓爲在西四南北大街及馬市大街羊市大街十字路口各有牌坊一座故名西坊榜曰履仁東榜曰行義南北俱榜曰大市街西四牌樓東爲馬市大街

西安市場在馬市大街其中直如廟市皆售日用雜物門外爲菜市肉攤污穢異常迥非東安市場之比

馬市大街東爲西皇城根

崇聖禪林在西皇城根

清良戴臣弼將軍故宅在西皇城根辛亥革命將軍被人狙擊於門前而殞宅久已易主西四牌樓西爲羊市大街

弘慈廣濟寺在羊市大街其地舊爲西劉村金時劉望雲建明清均重修民國二十二年不戒於火焚燬大半旃檀佛像及大藏經全燬七葉古槐亦枯二十四年後次第修復歷代帝王廟在羊市大街南向明嘉靖間以保安寺故址所建殿名景德崇聖之殿祀三皇五帝三王漢高祖光武唐太宗宋太祖元世祖明太祖數開創之君而已清康熙六十一年聖祖諭凡歷代帝王除無道被弑亡國之主外皆增祀惟黜明神熹而祀思宗至高宗復令撤漢之桓靈兩帝不祀民國後廟廢爲香山慈幼院幼稚師範

廟門外左右兩坊榜曰景德街

中央醫院在羊市大街帝王廟西

雙關帝廟在西四牌樓北大街街西蓋兩像合祀創建年月不詳元泰定乙丑年修清乾隆年間重修

西四北大街街西之禮路胡同舊名驢肉胡同授璧胡同舊名臭皮胡同南魏胡同舊名衛衣胡同

聖祚隆長寺在報子胡同明漢經廠外廠萬歷四十五年建

內四區區署在報子胡同

平民中學在禮路胡同

旃檀寺在紅羅廠南俗稱小旃檀寺對於弘仁之大旃檀寺而言明嘉靖中建

西四牌樓北大街北爲新街口南大街街西之武王侯胡同舊名五王侯胡同

輔仁中學女子部在太平倉街南

普愛堂在太平倉街北

莊王府昔在後毛家灣後移太平倉今夷爲民居稱平安里

寶禪寺在寶禪寺街即元大承華普慶寺大德四年建久已廢圯明成化間內官麻俊買地治宅掘得趙子昂碑始知爲寺基乃復建寺具聞賜今名清康熙間大學士明珠乾

隆間大學士傅恒先後修葺

倉聖廟在寶禪寺街民國十七年建

正覺寺即明正法寺清乾隆年間修葺改今名在寶禪寺西

護國寺即元之西崇國寺在護國寺街爲明之發祥坊本元托克托丞相故宅明宣德間賜名大隆善寺成化間加護國二字歷爲喇嘛居之每月逢七八兩日有廟市其繁盛與隆福寺相埒

寺有古碑多座皆磨滅不可讀舊傳十佛殿傍立一老髻朱衣一老嫗鳳冠朱裳者托克托夫婦也後爲姚少師堂露頂袈裟跌坐上有偈皆本色衲子語爲少師自題今俱無存

明王鰲姚少師像詩下馬摩挲讀古碑欲詢往事少人知獨留滿月龕中象共識凌煙閣上姿頰隱三毫還可似功高六出本無奇金陵戰罷燕都定仍是臞然老衲師清宋光熊遊護國寺詩宅捨祇園五百春朱衣猶現宰官身笑他鑿石山頭坐贏得兒童繫轎輪 琳宮香雨帶龍腥貝葉橫翻秘密經禪誦乍如蛙閣閣魚山清梵向誰聽

精勤女子學校在護國寺東巷

航空署在航空署街舊名買家胡同

勵志中學在航空署街

正覺寺在正覺寺胡同明成化間內監韓諒捨宅所建

福音堂在新街口街東

正西曰阜成門清因明舊明初依元制名平則正統間改今名今俗猶呼平則門

明崇禎甲申河南道監察御史王章巡視京營守阜成門城破被執罵不絕口遂遇害  
白塔寺在阜成門大街南向遼壽隆間建元至元八年重修名大聖壽萬安寺明天順間  
改名妙應清康熙間重修喇嘛居之

按宸垣識略載妙應寺在阜成門大街右偏有白塔一座創自遼壽昌二年爲釋迦  
佛舍利建內貯舍利戒珠二十粒香泥小塔二千無垢靜光等陀羅尼經五部元至  
元八年世祖發視石函銅瓶香水盈滿色如玉漿舍利堅圓燦若金粟前二龍王跪  
而守護瓶底獲一銅錢鑄至元通寶四字帝后閱之愈加崇重即迎舍利崇飾斯塔  
角垂玉杵階布石欄簷掛華鬘身絡珠網制度之巧古今所罕凡塔俱下體上銳白

塔獨否其足銳其肩豐如膽之倒垂肩以上長項露空節節而起頂覆銅盤盤上小銅塔通體皆白云北海瓊島之塔即仿此式

此寺每逢五六兩日有廟市售日用雜物與隆福護國兩寺同

郁文中學 阜成中學在阜成門大街

朝天宮在阜成門大街北元之天師府也久廢今其地尙稱宮門口

青塔寺在阜成門四條胡同爲元之大永福寺寺故有青浮圖對其東白塔禪寺因名青塔寺寺及塔在清代已廢惟其地仍稱青塔寺胡同

文治中學在西廊下

北洋商業學校在福綏境舊名苦水井

祖家街因祖大壽故第在其巷內而得名註

註 天恩偶開祖大壽故居在祖家街今改爲正黃旗官學其屋全是舊制聽事正寢兩廂別院一一俱在

北平大學工學院 北平市立師範學校在端王府夾道

翊教寺在翊教寺胡同爲西山潭柘寺下院有明碑相傳寺始於宋

西之北曰西直門清因明舊元爲和義門明永樂間改今名

天主堂在西直門大街街南

毓英中學在西直門大街街南

柳巷在西草廠

明笑岩德寶禪師生都下受法于玉泉明聰萬曆初居西城柳巷人罕知者一日有梵僧來參亞身翹袖作種種相師以拄杖畫字隨方答之僧作禮騰空而去弟子問適來僧問何法師曰此阿羅漢西天秘密語也

西直門大街北曰南小街其街西之魚雁胡同舊名魚眼胡同曉安胡同舊名南扒兒胡同大安胡同舊名大扒兒胡同北大安胡同舊名北扒兒胡同

黑塔寺即弘慶寺在南小街冰窖胡同久廢

永祥寺在南小街永祥寺胡同

妙清觀在西直門南小街大安胡同

西直門大街東爲新街口西大街舊仍稱西直門大街

廣濟寺在新街口西大街街北明正德九年爲梅樂禪師建

崇元觀在新街口西大街俗名曹老公觀爲明內監曹化淳建觀已廢惟其地仍名崇元



觀

基督教堂在新街口西大街

永泰寺在西直門大街北永泰寺胡同建於元代

崇壽寺在西直門大街街北

新街口之北為新街口北大街其街西之長圖治胡同舊名張禿子胡同以其為張文龍故居也又潛學胡同舊名錢桌子胡同洋溢滋胡同舊名羊肉床胡同朋獎胡同舊名棚匠劉胡同有果胡同舊名油炸果胡同壽瓶胡同舊名燒餅胡同

棍王府在新街口北大街蔣養胡同今尚存

火藥局在蔣養房久廢遺址猶存

高廟即普濟禪林在棍王府東積水潭南河沿創建年月不詳廟中有凌霄數株纏繞古柏著花樹巔燦爛可愛

黃節遊淨業湖普濟寺同羅瘦公敷庵明日二子以詩索和作答詩十年重語淒迷  
事半日相尋寂寞遊騰遺菰蘆江上客來看風葉薊門秋 霜砧落落瀕湖女溼佛  
斑斑上碧苔秋意中人獨無俚僧扉亭午不曾開 坡老感深銅狄歎穎濱詩記柳

湖行獨吟落木千山句我愧前賢並世生


清咸豐庚申英法聯軍犯北京火焚圓明園之役英使巴夏里從刑部大牢提出後曾

安置此廟中

見趙光年譜

匯通祠即鎮水觀音庵明永樂年建以其寺建在水關上而祀觀音故名清乾隆二十六年改建易今名有清高宗御製詩碑寺久荒廢民國二十九年長春堂藥店主人張子餘重修

以上爲內四區轄地



THE UNIVERSITY OF CHICAGO  
LIBRARY

# 故都變遷記略卷七

## 內城四

地安門外與之直對爲

鼓樓舊名齊政樓元建爲都城之麗譙上置銅刻漏制極精妙故老相傳以爲先宋故物其制爲銅漏壺四上曰天池次曰平水又次曰萬分下曰收水中安饒神設機械時至則每刻擊錢八以壺水漏爲度涸則隨時增冬則用溫水云清代銅刻漏已失惟以時辰香定更次民國後廢十四年設

民衆教育館於樓上

鐘樓在鼓樓北明永樂中建後燬于火清乾隆十年重建

按元代鐘樓在鼓樓東爲萬寧寺之中心閣

萬寧寺在鼓樓東偏元大德中建以奉安成宗御像名天壽萬寧寺清以避帝諱改名萬壽

萬寧橋在鼓樓南名澄清閣即今後門橋金水河自此而東南入東不壓橋（舊名東步

糧橋）穿皇城東南而出

火德真君廟在後門橋北爲明之日中坊東向本爲西藥王廟唐貞觀中創址元至正六年修明天啟中命太常寺官以六月二十二日祀火德之神著爲令清乾隆間重修羽士居之

按帝京景物略載天啟六年五月初六日巳刻北安門外內侍忽聞粗細樂先後過者三衆驚而跡其聲自廟出開殿審視忽火球滾而上於空中衆方仰矚西南震聲發矣望其光氣有如亂絲者如海潮頭者五色者黑靈芳者起衝天半王恭廠災也碧血錄後附載天變雜記所述亦同

明黃元功集李鍊師水竹軒詩地靜烟雲滿開軒水上樓泥封丹竈濕竹護藥苗齊火德時爲帝冰心日有躋馮虛千古夢能爲指階梯

福晉堂在後門橋北鼓樓前大街街西

清張文襄公之洞故第在白米斜街門榜曰可園後臨十刹前海今其子孫居之

地安門東爲地安門東皇城根中亘石橋一曰東不壓橋（本名東步糧橋後訛）爲金水河水由此入皇城之處

元馬祖常御溝春日詩御溝流水曉潺潺直似長虹曲似環流入宮墻才咫尺便分  
天上與人間 春波十頃碧琉璃向日樓臺照影時好爲畫船多載酒半酣西望碧  
參差 水南沙路雨清塵桃李花開蛺蝶春三月京華寒食近東風十里酒旗新  
元張翥金水河聞苑池荷香作立馬金橋上荷香出苑池石橋秋雨後瑤海夕陽時  
深樹棲鴉早微波浴象遲煩襟一笑爽正喜好風吹

市立十七中學 市立女子第二中學 溫泉中學 均在東皇城根

育嬰堂在東皇城根

遠東宣教會 在東皇城根爲澤公府舊址

東皇城根之東爲寬街

懷幼女子學校在寬街

福祥寺在南鑼鼓巷內簷衣胡同創建年月不詳舊作簷衣寺有明正德萬曆兩碑寺今  
已無存

文昌廟舊名文昌宮在南鑼鼓巷內帽兒胡同

圓恩寺在南鑼鼓巷前圓恩寺胡同

進德中學 求實中學在南鑼鼓巷內前鼓樓院

良氏祠堂在南鑼鼓巷內菊兒胡同

晨鐘女學校在北鑼鼓巷內分司廳胡同

北鑼鼓巷千佛寺胡同內舊有

千佛寺 寶泉局西廠今俱無存

北鑼鼓巷法通寺胡同內舊有

法通寺元至正間建今無存

北鑼鼓巷淨土寺胡同內舊有

淨土寺今無存

市立第一中學在北鑼鼓巷郎家胡同

高公庵名慈隆寺爲明內監高勳所建其巷即名高公庵胡同

瘋人收養所在高公庵胡同

京兆尹署爲清順天府舊廨在鼓樓東大街國都南遷後廢

極樂寺在安定門大街西靈官廟胡同元至元間建

北之東曰安定門清因明舊元爲安貞門明洪武初改今名

地安門西爲地安門西皇城根中巨石橋一曰西不壓橋（本名西步糧橋後訛）爲玉河水由此入御苑之處

藥王廟在西皇城根街北東瀕十刹前海萬柳沿隄風景絕勝昔爲夏日遊客載酒嬉遊之地今寺宇雖存但已賃爲民居

白馬關帝廟在藥王廟西明洪武年間建今廢爲警察派出所

宸垣識略稱按昔慕容氏都燕羅城有白馬前導因以爲祠蓋隋舊基洪武年重建而已又廟碑載英宗夢見帝乘白馬故名

清徐乾學白馬關廟詩當年北狩事蒼皇白馬金鞭護殺皇說與祠官修歲祀殘碑落日倚頽墻

女子職業學校在西皇城根白馬關帝廟旁爲賢良祠舊址賢良祠爲清世宗建以祀王公大臣之有功國家者

保安寺舊名半藏寺元至正間建爲僧義佛駐錫之所  
城隍行宮在西皇城根半藏寺旁院中有泥塑判官象空其中上元節置煤升火耳眼口



鼻皆出火焰名曰火判與冰燈同爲佳節之點綴今廟雖在象已無存

旌勇祠在西皇城根半藏寺之西爲清高宗建以祀將軍明瑞者今已頽圯惟旁小巷尙名旌勇里

宛平縣署在西皇城根面皇城南向國都南遷後署移郊外此署遂廢

署內舊有古墨齋爲明邑令李蔭得唐李北海書雲屢殘碑甃於墻壁得名碑本六礎後餘兩礎移砌文丞相祠

署旁之福壽里舊名中官房五福里舊名西官房以其爲宛平縣署之官房也又旌勇里舊名鬼門關

嘉興寺在西皇城根宛平縣署西

陸軍大學校友社在西皇城根

吉林先哲祠在西皇城根

興化寺在興化寺胡同今無存

慶王府在定阜大街舊名定府大街

慶王府後之尙勤胡同舊名張皇親胡同

輔仁大學在定阜大街爲濤貝勒府舊址

輔仁中學男部在大學東側門臨李廣橋西街

恭王府舊在李廣橋南街近亦售歸輔仁大學

司鐸書院在恭王府南三座橋之西北

內五區區署在劉海胡同

恭王府東牆外大翔鳳胡同舊名大牆縫胡同小翔鳳胡同舊名小牆縫胡同

積水潭一名海子源出西山一畝馬眼諸泉繞出甕山後匯爲七里灤紆迴向東南行數十里稱高粱河將近城分爲二外繞都城開水門內注潭中入爲內海子繞禁城出巽方流玉河橋合外隍入於大通河

元時開通惠河運船直至積水潭自明改築京城遂與運河截而爲二潭之寬廣已非舊觀俗指近德勝門者爲積水潭稍東南爲十刹海又東南爲南河泡一名蓮花泡其實一水也

見宸垣識略

今名近地安門者爲十刹前海稍西北爲十刹後海最西北近德勝門者爲十刹西海海子橋亦名月橋在前海俗稱三座橋

十刹前海舊名十刹海昔日荷花最盛爲消夏第一勝地

清李慈銘雨後輕陰偕禔龔携家遊金鰲玉竦橋至十刹海看荷花飲興侍郎水榭  
作苦熱得雨如解醒羊侯促我湖邊行天公亦憐久不出朝來不放驕陽晴一鞭西  
穿鳳城入玉虹高跨苑湖直五雲樓閣環鏡中綠水中分萬花立提鵬挈鶴香徘徊  
玉泉蜿蜒城西來宮牆曲折繞花苑時見樹隙湖光開萬壽山西碧葑展積水潭東  
白波輓緋霞縞雪相澄鮮翠蓋千畦共舒卷高槐古柳雙堤長清風颭地鞭絲涼朱  
門夾水照花好憑欄各各凝紅妝侍郎水檻更清窈六六明窗俯花杪安得湖中買  
船住蒞舫各借花爲家花光忽斷百稜稻風葉翩翩翠如掃田田大有江南風令人  
不思故鄉好沿流莫問蝦菜亭西涯漫園餘草青即此碧紗數弓地他年未必能重  
經不見西鄰有華屋主人三吳轉漕粟昔年我亦結侶來曾借樓居縱羈目樓高下  
瞰湖之中生香十里玻璃風夕陽倒射碧簷影湖光朵朵金芙蓉居者久化樓亦否  
來者今存十無九而我貧病猶看花安用臨風搔白首羊侯傾橐營行厨流連魚鳥  
相怡娛回車更約經太液飽看蓬瀛金碧圖

黃節端陽日過十刹海同栽甫詩客中過佳節言尋友朋懽驅車薄湖壖遂憩朱樓

闌重雲蔽野黑高柳依人寒便欲委淵沙所嗟湖不寬

籍忠寅余與朗齋均居十剎海過從甚勤賦此奉簡卜居十剎海東南直北還通積水潭青葦白稍衰客鬢紅蓮綠梗美人箋水深魚價如泥賤雨足蛙聲似鼓酣於此問津知避世會當跨海與君談

會賢堂在前海北河沿清末爲貴官華族讌飲之地每當夏日設臨時市場於湖畔遊人雜沓車馬如織近數年來已就衰矣

前海西河沿千桿胡同舊名箭桿胡同

沿海岸東行折而西北爲

銀錠橋爲城內水際看山第一絕勝處

清吳巖沿銀錠橋河堤作短垣高柳接城隅遮掩樓台入畫圖大好西山啣落日碧峯如障水亭孤

清宣統二年汪精衛先生謀刺攝政王載灃埋置炸彈於此橋下

無名氏雜詠詩捨身救國刺親臣銀錠橋邊迹已陳倫使當年竟殉義何勞今日紀

蒙塵

張次溪爲先生撰庚辰蒙塵記

海潮觀音寺俗稱海潮庵在銀錠橋南灣

廣化寺在鴉兒胡同相傳元時有僧居此日誦佛號每誦一聲以米一粒記數凡二十年積至四十八石因以建寺

瑞應寺舊名龍華寺在簪兒胡同明成化三年建清康熙五十二年重修改今名寺門本臨後海以醇王府占其門前隙地爲馬廄遂爲所遮

明張嘉胤詩地有龍華勝心隨石榻清春風一枕到孤月萬松明花散諸天雨鐘鳴不夜城抽簪如可得於此悟無生

清高江村龍華寺看新竹詩拂檻清陰細窺簾綠影深露香生靜夜風籟發禪心解釋猶含粉抽條已滿林渭川千畝意相對日披襟

攝政王府即醇王府舊爲成親王府在後海北河沿傳爲明珠故宅

見嘯亭續錄

攝政王府西之孝友胡同舊名藥酒葫蘆

十刹海廟在後海西曉市內東向今尙存惟廟內房屋皆已賃爲民居

按舊傳十刹海廟方五十畝室三十餘間相比如號舍佛殿亦分一舍不更廣但依紀曉嵐閱微草堂筆記在其時已非復一僧一舍之舊矣

明釋懿修十刹海詩十刹海非刹凝然古德風市居岩壑裡門向水田東耆宿推三藏師資事徧融乞隨瓢偃仰立儼嶽衡嵩聽法俱高衲執巾無侍童直言等貴賤醒語破愚蒙僧不驕恩帑佛宵藉像工平平數椽屋密密六時功哀憫西山寺游觀額  
大雄

清虛觀在舊鼓樓大街西

玉皇閣舊名玉皇廟在舊鼓樓大街東明代建

北藥王廟在舊鼓樓大街西北明嘉靖中建

雙寺在大石橋雙寺胡同明成化間建今已無存

妙緣寺在大石橋今已夷爲民居

拈花寺舊名千佛寺在大石橋明萬歷九年建清雍正十一年重修改今名

明御馬監太監楊用受僧徧融指範銅鑄毘盧世尊蓮花寶座千佛旋繞四面若朝者然并鑄十八羅漢二十四諸天像復塑伽藍天王等像今俱存

明官撫辰千佛寺詩春鳥聲聲佛蓮花朵朵燈瞻聽惟畏愛久此即高僧

明余廷吉遊千佛寺詩城北天開選佛場松濤聲合梵音長千層瓣湧毘盧座萬里

函來舍利光紫極有祥香出內黃昏無爽課隨堂蒲團一息何年得暫過僧房世慮忘

清高士奇登千佛寺齋望樓詩兀兀終朝懶不勝題橋有志歎無能故山歲晚歸難定高閣晴來每一登飲啄愛看林下鶴蕭閒那及寺中僧松枝豆豉催年近苑外冲冲聽鑿冰

武廟在鼓樓西大街合祀關岳民國四年袁項城命就醇王祠堂舊基改建北之西曰德勝門清因明舊元為健德門明洪武初改今名

明崇禎甲申三月兵部右侍郎王家彥協理京營守德勝門城陷自投城下不死僕扶入民舍自縊死

德勝橋在德勝門大街積水潭水注橋下東行

永泉寺在德勝橋東

十刹西海舊名積水潭在德勝門迤西又略稱西海昔日亦為消夏勝地

清張之洞政務處諸公招同樊茗樓按察遊積水潭詩東省夔龍坐上齊招涼同到後門西舊人惟有樊山老愁絕僧牆續舊題 對岸喬林付爨烟 擬通祠老樹盡為寺僧所伐 荷花

愈少愈堪憐明知不是滄桑事但惜西涯變稻田

又張之洞八月再遊積水潭詩新涼城北勝城南遠有山光近有潭擬共漁郎分枕  
席喜無門校促駢驂

肅王新章  
前門不閉

蓼花新雁杜荀鶴秋柳棲鴉紀阿男袞袞貴遊誰會

得都來收拾與詩齋

明崇禎時御馬監常洗馬於此每歲六月六日用儀仗鼓吹導引洗馬中有數頭錦帕  
覆首最後獨角青牛至諸馬莫敢先焉

明朱德潤觀內廡洗馬詩黃雲洒雨沙場秋灘高水平凝不流曉霜襲透蒼駝裘圍  
人洗馬津水頭綠塵連錢雙驂驕日光射波脂膩浮青絲脫鞵黃金鈎輕爬短刷濕  
未休三花剪鬣平日柔籜雲駿氣將無儔束芻斗豈馬羞茫茫豐草生林邱霜蹄  
何爲踏長楸振鬣一躍期天游

淨業寺在西海北河沿昔爲智光寺之基創建年月不詳有明萬曆二十九年鼎一舊爲  
士大夫觴詠之地故西海一名淨業湖湖上昔有魚藕監久廢

明朱國祚宿淨業寺詩僧樓佛火漾空潭德勝橋西積水舍一夜朔風吹樹秒繡門  
飛雨遍城南



清朱彝尊淨業寺看荷花詩香剎綠堤轉官橋信水流綠雲千萬頃不見采蓮舟

清高士奇淨業寺看荷詩僧舍無人滿綠苔新荷一頃雨中開寺前多少衝泥客誰

爲看花趁早來

太平庵在淨業寺西水關之左爲明工科給事中王聚洲所建稱漢省香火院有明崇禎

七年重修碑載草創經始掘出石勒太平庵三字因以爲名今爲余氏宗祠

明黃景昉同人集太平庵詩不遠城隅勝風塵已覺寬隔溪鳴布穀新果薦聞官鐵

瓦通泉古冰壺濯夢寒春衣仍可典無畏酒盃乾

先是予於民國二十七年冬得王良常先生書諸暨余氏祠堂碑銘爲清御史余

所作予得之狂喜蓋我會稽余氏本遷自諸暨此碑即我本宗祠堂之碑故也翊年又

得此庵地庵荒廢已久頽殿僅存亟修葺之改爲家祠臨湖築樓數楹以爲祭餘飲饌

之所舊有毘盧佛像仍供奉殿中重鑄諸暨祠堂碑銘鑿於東壁復求洪鑄生同學前

輩爲記鑿於西壁祠額仍附寫太平庵三小字已仆舊碑重樹立院中以存古跡

蕪湖洪鑄生前輩鑄贈詩敬瞻廟貌淨湖旁御史宏規紹暨陽三百年來幾桑海四

千里外兩祠堂世承隆德門斯大地接清流澤益長漸見風烟長喬木新枝應比舊

枝強 淨業伽藍迹已遐太平庵小錫名嘉一樓景納湖全面三畝基開族萬家宅

泛鷗波張釣叟亭傳蝦菜李長沙谿山大好無南北疑是何郎訪若耶 先生曾與何雙侯前輩遊諸陸

云故

寧津李響泉先生濬之贈詩題云庚辰中秋後五日獨携胡牀至淨業湖余氏小樓

登眺越二日又承約怡園賞蘭喜賦二絕遊目湖樓獨去來怡園又喜報蘭開素心

花對同心促細領幽香把酒杯 癡人無夢久無詩 先生咏蘭詩名為蘭癡夢嚙 捧到蘭箋又拈髭

拙句博君開笑口定教拍手喚蘭癡

三官廟在太平庵東民國十二年女僧通文建本為其私廟通文受拈花寺僧全朗剃度

後捨為拈花寺下院

水關今名西水關在德勝門西里許水自西山經高梁橋來穴城趾而入有關為之限東

西直以石橋橋下清流澌澌南注入大湖橋下置石螭二昔日水盛時石螭迎水倒噴

既翕復吐聲淙淙然自螭口中出

水西草堂 水東草堂均在湖畔為清王小航先生照故宅今已易主

法梧門詩畫相傳在湖畔為明李東陽西涯別業舊址其遺跡已無可考

清張之洞遊淨業湖訪法橋門故居不得詩闕下有滄浪淼淼不可涉盛此十頃碧  
清光漾城堞詩龜今在亡乾隆數中葉蒙古老祭酒愛才喜容接投贈四海遍英俊  
滿箱篋孤寒生羽毛名譽在齒頰滿洲鐵貫盛治亭漢軍朱豪俠孝純三賢相羽翼  
倡和律呂協開門香滿湖官退心自愜前有西泠翁餘韻遠可躡賈文亦雅操姑勿  
責調爨故宅俱渺茫漁村荒荇菱迎日翹朱其下萬綠盪適然驚翠鳥掠水起還  
貼僧寺敢北戶風善不用箴此地多戚里珂馬日蹀躞遊客但裸飲顛倒巾與屨誰  
會思苦心水月賞眉睫吟咏固無用且免勢饑攝我來常苦遠暮愁風雨雲終日移  
家來租房弄舟楫

積水潭明末爲風景勝地別墅有定國公園

一名太師園

鏡園劉茂才園漫園湜園楊園王

園寺院除前述者外尙有蓮花庵興德寺酒肆有蝦菜亭蓮花社今俱無存

清查嗣琛雜詠詩蝦菜亭虛水浸沙城頭風折雨絲斜秋來南客多鄉思不看荷花  
看稻花

金剛寺又名般若菴在積水潭東南抄手胡同內今僅存頽屋十數楹

日下舊聞稱般若菴背湖水面曲巷舊有竹數叢前小閣後靜室紙窗棐几殊有幽趣

後改朔大殿高閣往昔清深幽遠之致亡矣士大夫看蓮北湖多一憩寺中

明顧錫疇詩結夏禪林迥無門可閉關湖光依北閣爽氣借西山日永諸天靜鐘清

初地開新辭魔眷屬定入夜雲還

以上爲內五區轄地



# 故都變遷記略卷八

## 外城一

正陽外門舊日設而不開惟皇帝大駕出入由之月城東西設二洞子門爲官民出入今則月城已撤於內門左右各開二門以便車馬行人往來內外兩中門雖開而不用

觀音大士廟在舊月城內之東邊有明萬歷壬辰修築都城碑記兵部職方司郎中虞淳熙撰又有清刑部尙書張照碑今兩碑字跡已全磨滅

關帝廟在舊月城內之西邊有明萬歷間焦竑碑記董其昌書今碑字跡已磨滅

京景  
物略

無竑碑  
文見帝

昔日東洞子門外東月墻至正陽橋形如扇面列肆居之其傍城夾道曰荷包棚後改稱荷包巷清光緒庚子後廢

正陽橋在正陽門外跨護城河爲石梁三其南爲牌坊五楹甚壯麗榜曰正陽橋

大街石道兩旁搭棚爲肆由來已久清末施行警察制度後始撤廢

大街東旁市房後有裨街曰肉市曰布巷子曰瓜子店迤南至珠市口舊稱猪市口

胡同曰打磨廠內稱北曰東河沿曰鮮魚口內有南北孝順胡同長巷上下頭條二條三條四條胡同曰大蔣家胡同東南斜出三里河大街內有小蔣家胡同冰窖胡同此皆商賈匠作貨棧之地

廣和戲院（舊名廣和樓）卽查樓在肉市爲明巨室查氏所建戲樓清改今名乾隆庚子燬於火後重建

清魏之琇廣和樓觀劇詩春明門外市聲稠十丈輕塵擾未休雅有閒情徵鞠部好偕勝侶上查樓紅裙翠袖江南艷急管哀絲塞北愁消遣韶華如短夢夕陽帘影任勾留

蕭公堂在打磨廠深溝明萬歷二年建

自來水東分局在打磨廠

吉安二忠祠在鮮魚口抄手胡同祀文信國與李忠肅

商團公議總局在慶隆大院

商業學校在買家花園

宏福寺在買家花園西宏福寺胡同

崇真觀明司禮監張政捨宅建在打磨廠之南其巷今即名崇真觀

關帝廟在打磨廠東口

火神廟在巾帽兒胡同

帝京景物略載明天啟六年王恭廠災時崇文門火神廟神亦燄燄欲起勢若下殿出祝跪而抱曰外邊天旱不可走動神舉足還住而震發云恐即此廟因巾帽胡同東出即崇文門大街也

培文學校在興隆街

大西竺寺在南蘆草園

乾泰寺在冰窖胡同

三官廟在東珠市口街北羽士居之

關帝廟在薛家灣係舊剎前有坊榜曰關帝聖境

地藏庵在河泊廠

雙關帝廟在河泊廠

白衣菴在東茶食胡同



玄帝廟在東茶食胡同

三里河元時名文明河接通惠河爲漕儲運道

宸垣識略稱按張爵紀五城坊巷胡同戰南城正東坊有西三里河東三里河蘆草園崇南坊則有南河漕子家灣遞運所纜竿市又有三轉橋紀家橋板橋雙馬莊八里莊十里河皆三里河入張家灣故道今其名雖存而遺跡已無可考矣

鐵山寺在三里河橋西明正德間僧宗洪號鐵山者募緣修

蘆草園舊有吳越王錢鏐祠今已無存

外一區區署在東珠市口

以上爲外一區轄地

崇文門稅務署在崇文門橋街東民國二十年廢

清代昔日行旅入都者皆需進崇文門於此檢查征稅赴他門不得入至光緒末年火車通行後始有變通但崇文門稅關則直至民國二十年始裁撤焉

註 順天府志崇文門外大街俗稱哈達門大街跨護城河有橋曰崇文門橋街東崇文門稅務署在焉

清查嗣環雜詠詩九門征課一門專馬跡車塵互接連內使自收花擔稅朝朝插鬢

掠雙錢

火神廟在花兒市明隆慶二年建清乾隆四十一年重修每月逢四日有廟市

清鄭孝胥花市詩秋後閒行不厭頻愛過花市逐閒人買來小樹連盆活縮得孤峯  
入座新坐想須彌藏芥子何如滄海著吟身把茅蓋頂他年辦真與松篁作主賓

清真寺即禮拜寺在花兒市

都窳君廟在花兒市明建後廢清康熙間重建

外三區區署在花兒市

崇真觀 臥雲菴在上四條胡同

白衣菴在上三條胡同

壽佛寺即無量菴在中四條胡同

東珠營舊名東齋營舊有萬福寺今無存但其旁小巷尙稱萬福寺夾道

蟠桃宮原名太平宮蟠桃係俗稱在東便門內大橋南羽士所居每歲三月有廟市

清查昌業上巳沿通惠河至太平宮觀廟市詩十丈紅塵過雨清惠河添漲繞重城  
瑤池香渺春雲黯蘭苑花鮮曉日明正是蘭亭修禊節好看曲水麗人行金梁風景

眞如畫不枉元宮號太平

隆安寺在花兒市東南原爲明天順間廢刹萬歷乙酉蜀僧翠林募修結淨土社堂僧徒念佛歲元旦設果餌享佛盤千數名曰千盤會

日下舊聞考謂隆安寺創於明景泰五年但宸垣識略則謂土人相傳爲唐刹惟以殿前兩柏大十餘圍觀之亦可決其爲元刹云

清孫廷銓春日隆安寺訪山曉上人時自天童應詔入都詩遠公廬阜朗公房時許題詩在上方古寺日長餅鉢靜故山春暖薜蘿香一乘聞法超禪果三殿承暉接御牀歸計未成心已滅自持鐘梵禮空王

臥佛寺在隆安寺西

清宋光熊游臥佛寺詩寺門東接禁城陰野水平沙古木森留示人間老病死色空眞諦悟禪心

天龍寺在臥佛寺西南係浙江金華會館明萬歷中建

廣渠門在外城之東清因明舊

爐聖菴在廣渠門內創於明代爲山西治行所建祀老君

安化寺在爐聖菴東南明釋曇蘊開山正統八年賜今額

彌勒菴卽隆興寺在爐聖菴南創建年月無考

夕照寺在安化寺東南萬柳堂西北創建年月無考

清魏之琇過夕照寺詩開來僧院愛幽清斜日軒窗迥自明鐘磬不聞林鳥寂鮑家  
詩唱古先生

清李慈銘重陽後三日偕庭芷六舟逸山猷之飲城東夕照寺并餞糜伯督學山右  
酒畢同遊萬柳堂詩又展重陽飲東郊策騎便路平知水近野曠得秋偏遠樹因藏  
寺高城欲切天言尋磬聲去不覺入林烟 蹋葉山門裡蕭閒衲子家講台依翠竹  
禪榻映寒花池小泉聲閤林疏塔影斜最憐秋柳外斜照帶歸鴉 昔日平津館風  
流最可傳愛才賢相業行樂盛時年花木憑誰記樓台盡作田荒池留一曲曾與照  
華筵 畫篠明將發乘輶上太行河聲三晉壯日氣九邊黃地險風猶古民質學易  
荒澄清吾輩責話別暮雲蒼

拈花寺卽萬柳堂在廣渠門內東南隅爲清大學士益都馮溥別業後歸石文柱康熙四  
十一年石氏建大悲閣彌勒殿捨爲寺

清朱彝尊上巳萬柳堂讌集和相國馮夫子韻詩不到閒園已隔年綠楊高映女墻  
邊無妨並馬橫橋渡更許深杯曲水傳徑仄易侵蘋葉小日晴况有杏花妍舞雩幸  
忝從游列澹沲春光過禁烟 小徑升堂步履偕隄沙遙築避風竈歌翻驟雨新荷  
好地比崇山峻嶺佳露井有華滋藥甲春衣無桁挂松釵永和會後斯游最澳飲蓬  
池未許儕

清徐乾學萬柳堂陪讌益都公詩絲綸閣外唱彤騶携客還爲杜曲遊種樹已成金  
澗勝鑿池初引玉泉流綺堂晴帶千峯秀碧宇雲開萬井秋醉吐車茵何足道夕陽  
洗爵重淹留

清杭世駿過拈花寺詩清梵三時響粥魚亂花空發老僧居危欄曲處青山露一桁  
斜陽晒佛書 半天婀娜綠梯抽拂拂新條亂打頭兩翼畫欄紅不斷荻芽菱葉滿  
春流 溪風掠過打魚磯匝地春陰綠正肥頭白僧伽破禪寂柳花吹點水田衣

清李慈銘伯寅招集夕照寺爲萬柳堂補柳索賦長歌廉公好客今所無笙歌十隊  
紅氍毹疏齋松雪踞上座當筵一曲千明珠劉姬雙手白如玉笑折荷花傾玉壺盛  
事風流久消歇遺跡滄桑向誰說四百年後佳山興種柳名堂後先埒仁皇御宇慎

海平詞科大舉羅羣英相公翹材啟東閣城東驛駿紛相迎竹垞詞賦西河舌伽陵  
樂府鴻園筆吐茵唾地千萬言盧趙有知應失色庭前萬樹堆綠烟柳花亂撲春酒  
船幾輩朱衣引騶唱兩行紅燭門新篇平津老去朱履散佛火鐘魚一朝換幸逃馬  
廐壞朱閣留得書樓映宸翰儀徵太僕重停車山人補柳傳畫圖亭台傾盡寺田鬻  
東風一二搖纖株侍郎退食命僮侶載酒招提共延竚疏畦便插千萬枝頃刻濃陰  
滿庭戶俯仰何勝興廢哀眼前無數菜花開荒池水碧猶依舊更補新荷聽雨來  
清張之洞訪萬柳堂詩溪堂頽盡野人知老柳蕭疏尙掛絲跋扈毛蝨曾爛醉淒涼  
才甫已來遲文章小事猶賢相高樹嬉遊亦盛時遊徧城南望城北西涯無主孰題

詩

法塔寺舊爲法藏寺在道祖觀西金大定中建寺久廢塔尙存

塔高十丈窗八面中空可登今已杜塞

昔日上元夜僧燃燈遶塔奏樂金光明窗樂作天上

明郭正域法藏寺詩古刹城南寺蓮花處處開金輪平地轉香雨半天來清話達元  
度論文有辨才真如非幻境雲水兩徘徊

太陽宮在法塔寺西清順治初年建奉太陽星君羽士居之  
丑虎廟在太陽宮後係明舊刹

廟本供關張趙馬黃蜀五虎將故名但今僅關帝像存

玉清觀舊名雲集觀在玉清觀街清康熙年間建羽士居之

明袁崇煥墓在廣渠門內廣東義園碑題明袁將軍之墓南海吳榮光書義園前有袁督  
師廟創建年月不詳其廟額及楹聯爲南海康有爲書

清趙堯生惟熙拜袁督師墓詩誰云亂世識忠臣山海長城寄一身不殺文龍宵及  
禩空嗟銀鹿亦成神遺聞玉貌如佳女亡國天心勝醉人萬古大明一抔土春風下  
馬獨露巾

甘露寺在纜杆市創建年月不詳

以上爲外三區轄地

清化寺在磁器口清化寺街明宣德壬子奉聖夫人東安里王妙秀命其弟義勇後衛百  
戶榮以賜金買保安寺基所建其街以寺得名

天主教堂在南崗子東北

放生池在天主教堂東北

法華寺在法華寺街

電車公司停車廠在法華寺街

明因寺在三里河東明因寺街寺址僅存寺爲明慈聖太后所立寺中舊有李伯時渡海尊者卷久佚相傳萬歷二十九年紫柏大師自五台來夜夢十六僧請掛瓶鉢亭午有負巨軸售者乃貫休所畫十六羅漢像也師嘆異購之各系以贊傳寺中云

藥王廟在東曉市明武清侯李誠銘建久圯清康熙三十二年重建每月朔望有廟市姚彬關王廟在藥王廟東相傳卽元崇恩萬壽宮殿中塑像甚古俗傳吳將姚彬盜關公馬被獲強不屈廟塑縛彬像臂弩出於縛公戎服作色左顧彬彬反面色不屈侍將七人怒視彬縛彬者仰公顏色而受命馬回望其色歎沫人傳爲元時所塑云廟於庚子拳匪之亂被燬

按大林山人今雋永云姚彬關帝廟在藥王廟街東相傳始於隋代其像塑威武生動關帝正坐左顧怒視彬彬袒裼赤足繫髮於柱勇悍倔强之態可掬下列七將皆仰視帝旨馬在右而左顧公若長鳴仰訴者馬裝飾奇古雄姿英發塑手之高信非



劉正奉畫莫辦

魚藻池俗名金魚池在曉市大街南天壇之北畜養魚蝦以供市易昔日池陰一帶園亭甚多南抵天壇一望空闊每端午日走馬於此清末尙然民國後廢

清葉映榴五日集金魚池詩客心爭良辰芳讌卜清晝深樹含涼風方塘迴碧溜  
花露蕊鮮蘭根土香瘦亂離所見花入眼如故舊回首異河山撫懷驚節候茲借勝  
侶遊盤桓忘粗陋藉草傾蒲觴丹砂笑勾漏一擲喝卷波十巡誇射覆掬水擾游鱗  
腮馨炫金繡投餌荇藻開徘徊若避就魚知人樂無吾從惠莊後談諧清具移酒渴  
晚汀漱披襟連臂歌岸幘緣溪走看核紛道旁酣呼雜老幼佩萱遊女歸鞍馬如輻  
輳釵符壓輕蟬朱索牽衫袖歌舞喧城隅啁啾和猿狖長安驚繁華荆楚猶戰鬥杯  
酒酌左徒獨醒世所詬慷慨誦離騷誰爲後來秀天涯詩酒懷芬芳同蘭臭雙鬢不  
易青一醉寒機寶斜陽樹秒催弦月女墻逗歸鞭指西爽蒼然滿烟岫

清王士禎冬日過金魚池詩記來劇飲暮春天絡馬青絲白玉鞭却倚迴闌望朱箔  
吳歌趙舞爲君妍 折葦荒蒲臨斷岸暮雲寒雪壓重樓獨來不見高陽侶斜日烟  
波迴自愁

金魚池北昔有李園爲明武清侯李偉別業園甚廣可泛舟有梅花亭滙臺堯樓船橋諸勝久廢遺跡已無可考

海潮庵在金魚池北係舊刹清乾隆時已傾圮後修復

眞武廟在金魚池東北清乾隆時已傾圮後修復

順直學堂在金魚池東即昔日金台書院舊址註

註 天咫偶聞金台書院本洪文襄園施公世綸尹京兆謀欲建書院商之於洪後人某不允而施必欲得之

乃爲聞於朝云洪氏願施此園爲義學聖祖嘉之御書廣育羣才額賜之洪氏乃不敢爭遂建書院

安國寺在三里河南橋灣明天順元年建

東曉市舊名東小市在半壁街南隙地數十畝每日清晨有市以估衣爲多

慈谿會館在東曉市西地甚寬廠昔日每逢科場直隸學政錄取遺才於此

精忠廟在東曉市西精忠廟街清康熙年建門外鑄秦檜夫婦跪像旁有喜神廟爲梨園公會會所

清吳巖謁精忠廟詩痛飲黃龍未必酬幽燕遺廟壯千秋可憐屈膝秦長脚得藉陳王解免不

紫竹林在精忠廟南担子市

金魚池南即爲天壇

天壇周十里明永樂十八年建清仍之壇內最南爲

圓丘又稱天壇形圓象天南向三成上成徑九丈高五尺七寸二成徑十有五丈高五尺二寸三成徑二十一丈高五尺每層四出陛皆白石九級上成石欄七十有二成百有八三成百八十合三百六十周天之度柱如之內壇形圓周百有六丈四尺高五尺九寸壇門四皆六柱三門柱及楣闕皆白石扉皆朱樞壇外東南丙地燔柴爐一高九尺徑七尺螿以綠琉璃瘞坎一東南燎爐四分設於壇之東西門之左右壇北門後爲皇穹宇南向環轉八柱圓檐上安金頂基高九尺徑五丈九尺九寸石闌四十有九東西南三出陛各十有四級左右廡各五間一出陛殿廡覆瓦皆青色琉璃圍垣形圓周五十六丈六尺八寸南設三門崇基石欄前後三出陛各五級外壇東門外東北隅爲神庫神厨各五間井亭一祭器庫樂器庫饗庫各三間又東爲宰牲亭井亭各一壇外內垣門四皆朱扉金釘縱橫各九

皇穹宇北爲

祈年殿壇圓南向上成徑二十一丈五尺二成徑二十三丈二尺六寸三成徑二十五丈面甃金磚圍以石欄四百二十南北三出陛東西一出陛上成二成各九級三成十級壇上建殿制圓內外柱各十有二中龍井柱四檐三重上安金頂左右廡各九間均覆琉璃前爲祈年門崇基石闌前後三出陛各十有一級門外東南燔柴爐一壑坎一燎爐五內壇周百九十丈七尺二寸門四北門後爲

皇乾殿五間上覆青琉璃南向正面三出陛東西一出陛各九級石闌五十有九

皇穹宇北門外西北爲

齋宮東向正殿五間三出陛

祈年殿清光緒十五年燬於雷火至二十二年始修復

天壇昔爲皇帝郊天之處民國二十三年北平市政府以保存古物重加修葺煥然一新

中央防疫處 市立傳染病院 農林試驗場 無線電電報局均在天壇西就舊日外

壇地所建

外五區區署在靈佑宮

永定門在外城之正南直對正陽門

清鄭孝胥七月初十日入永定門詩雙闕空嵯峨積塵霾楚囚天橋望落日徒倚將  
誰儔華屋豈不存視之如山邱吾今實桃梗嘗與土偶遊

左安門在永定門之東爲外城之東門與東便門遙對

以上爲外五區轄地

# 故都變遷記略卷九

## 外城二

昔日西洞子門外西月墻至正陽橋形與東月墻同其傍城夾道曰帽兒棚後亦稱荷包巷亦清光緒庚子後廢

大街西邊市房後有裡街曰珠寶市曰糧食店其南口通珠市口舊名猪市口又西更有裡街曰煤市橋曰煤市街煤市街南口亦通珠市口其橫巷曰西河沿曰大柵欄曰大齊家胡同曰小齊家胡同曰王皮胡同曰蔡家胡同曰施家胡同曰掌扇胡同曰雲居寺曰濕井胡同曰甘井胡同舊名乾井胡同其西口皆通煤市街在煤市橋者東曰廊房頭二三條註其東口通大街西曰南北火扇曰協資廟舊名蝎子廟曰取燈胡同曰炭兒胡同曰茶兒胡同曰楊梅竹斜街在煤市街者西曰李紗帽胡同曰博興胡同曰小椿樹胡同曰小馬神廟曰大馬神廟東即大齊家小齊家諸胡同大柵欄西與之正對爲觀音寺街其西分櫻桃李鐵拐舊名李鐵鍋兩斜街并於五道廟大柵欄南爲西珠市口大街其街之西爲虎坊橋

一名虎房橋

大街此皆市廛商販娼優叢集之所

註 人海記永樂初北京四門鐘鼓樓等處各蓋舖房店房召民居住召商居貨總謂之廊房視衝僻分三等納鈔若干貫洪武錢若干文環廊房內居民之有力者一人簽爲廊頭計庸納錢鈔銀收買本色解內府天財庫交納以備宴賞支用今正陽門外廊房胡同猶仍此名

萬壽關帝廟在西河沿係舊刹

白衣菴舊爲地藏庵在排子胡同

正乙祠在西河沿清康熙五十一年建

七聖祠俗名蝎子廟在北火扇胡同

蝦子廟在櫻桃斜街

觀音寺在觀音寺街

慶樂園舊名慶樂樓在大柵欄

清李慈銘丁丑九日京邸偕子宜慶樂樓聽歌詩天涯猶得暫相過莫負登樓一曲  
歌老輩壺觴同調盡廣場絲竹感懷多預愁別後稀鴻雁長使山中怨薜蘿爲問人  
生幾重九黃花容得久蹉跎

抬頭菴在觀音寺街後胡同比邱尼居之

名伶小叫天即譚鑫培故居在李鐵拐斜街內大外郎營今其子孫居之

清鄭孝胥觀小叫天演碰碑詩暮年楊業竟與尸雲代威名自一時破敵何殊逐雉  
兔望風曾說避旌旗晚途供奉成遺老垂死英雄有駿姿霜月滿天水作涕暗鳴猶  
繞李陵碑

火神廟在李紗帽胡同清康熙年間建

馬神廟在大馬神廟胡同係明刹清末尙存今廢

榮昌於清光緒八年九月十八日生於此巷中

觀音寺在車轆胡同比邱尼居之

芥子園在韓家潭爲錢唐李笠翁寓居今遺跡已無可考

五道廟在五道廟街

延壽寺在延壽寺街爲遼金巨剎遼主管臨其地金人以棲道君及汴京所獲車輦悉置  
於寺意今琉璃廠一帶皆爲寺基明正統間僧滿然建寺於其地開渠得斷碑有延壽  
字可辨因仍其名

正陽宣武之間民國十五年開兩洞子門名



和平門外年門外新闢一通衢名南新華街

師範大學在南新華街街西其附屬中學及附屬小學均在街東爲清代琉璃窯舊址  
土地祠在師範大學南東向係舊刹

記者公會會所在南新華街小沙土園

琉璃廠在西河沿南楊梅竹斜街之西舊有琉璃窯故名此街多書籍字畫古玩筆墨店  
肆故人又稱文化街

火神廟在琉璃廠東口內南向每歲正月珠寶古玩商人在廟中設肆十日起於初六止  
於十六昔日甚繁盛近年漸就衰落

清王阮亭先生寓居在琉璃廠火神廟西夾道有藤花爲阮亭先生手植今遺跡已無可  
考

海王村公園爲昔日廠甸之一部在琉璃廠街北

廠甸舊日自正月朔至十八日設肆十八日百貨雲集車馬喧闐遊人雜沓途爲之塞  
近年來每歲元月雖仍列肆於海王村公園內外但已無復昔日之盛況矣

萬善給孤寺在西柳樹井相傳創自唐貞觀間寺久廢惟其旁小巷尙稱給孤寺夾道

清紀曉嵐尙書故宅在虎坊橋大街街北河間李心甫醫士曾居之予幼年嘗往其寓見  
閱微草堂榜尙懸堂中

清孫承澤少宰故居在臧家橋西今其巷尙稱孫公園

清朱彝尊集孫侍郎研山齋詩勝序愁初豁高齋近許過圖書留客少花藥閉門多  
興每耽邱壑衣從掛薜蘿千秋論述作出處本同科

北平大學醫學院 豫章中學 安徽中學均在孫公園

梁家園在驛馬市街北明都人梁氏建亭榭花木極一時之盛地窪下有水可以泛舟久  
已廢圯清乾隆間即其地建壽佛寺今亦無存

清王士禛過梁家園憶舊遊詩此地足烟水當年幾遡遊故人皆宿草衰柳又驚秋  
門冷颼颼竄霜寒雁驚愁永懷川上嘆逝者竟悠悠

昔與宋荔裳諸  
公泛舟於此

清李慈銘日晡過梁家園詩日落趨車過荒園尙姓梁夕光生積水秋意卷疏楊橋  
小人聲聚原空馬影長當年游宴地裙屐繼漁洋

又李慈銘借雲門夜過梁家園詩纔隔笙歌地便無塵市喧秋光生積水月色定空  
園去馬催街柝殘燈識寺門應知宵暑盡捉塵一談元

外二區區署在梁家園

清吳梅村先生寓居在魏染胡同後康熙間湯右曾少宰寓此集聯云旁人錯比揚雄宅

異代應教庾信居手書懸於柱今遺跡已無考

永光寺即元大萬壽寺在前青廠青州高僧辨公會居之今寺久廢惟其巷尙稱永光寺

宸垣識略載寺有大萬壽寺開山傳法歷代宗師實蹟碑已磨滅不可讀惟明正統碑

記稱辨公居此湛然屏山兩居士爲其上首外護湛然即耶律文正王屏山即金翰林

李純甫也又寺有許道寧畫屏云

清朱竹垞先生寓居在海北寺街舊名海波寺街有古藤書房今廣東順德邑館即其故

址

清朱彝尊自禁垣移居宣武門外詩詔許携家具書難定客蹤誰憐春夢斷猶聽隔

城鐘

永興寺在南柳巷

四川營在南柳巷西南爲四川石砮女帥秦良玉屯兵之所因名

明莊烈帝賜秦良玉詩蜀錦征袍手製成桃花馬上請長纓世間不少奇男子誰肯

沙塲萬里行

天仙菴在棉花九條比邱尼居之

清施愚山先生寓居在鐵門今宣城會館

清王士禎過宣城館詩暮天黃葉落一過西州門無復高人蹟空聞宿鳥喧新阡思

掛劍舊館憶開樽南望澄江水誰招屈宋魂

清李尊客先生慈銘曾寓居鐵門

清李慈銘移寓保安寺街留別鐵門舊居詩橫流誰是好家居到處牽船縱所如荷

鋪隨時移樹石束裝多半累圖書此身天地終何寄回首江湖夢亦虛只冀登真能

拔宅不煩雞犬與驅除 南北飄蓬已十遷勾留桑下又三年泓師頗識瓊杯破鐵門

有一宅不利居人智永虛誇鐵限穿仍有賓朋都簡寂小栽花竹漸便娟他時坊里誰編錄一

畝閒居定我傳

以上爲外二區轄地

嵩雲中學在達智橋舊名炸子橋爲嵩雲草堂舊址草堂爲清光緒年間汴人就接待寺

所改建

清李慈銘閏秋飲集嵩雲草堂池北精舍河南士大夫新築宴賞處也勝地招邀萃羽觴麗樓閣檻帶虛堂清池水影先浮澄高柳秋聲欲滿廊雲物略存嵩少意鐘魚猶接梵龕香雙藤宰相風流歇尚有寒松翠過墻

堂本接待寺地對門爲松筠庵康熙中高念庵侍郎寓此庵馮益都過之高賦詩有

云戶倚雙藤梵宇開無人知是相公來之句

松筠庵在達智橋明楊椒山先生故宅即以爲祠清乾隆四十九年重修

清尤侗謁椒山祠詩諫草留遺石年年化碧痕悲風吹古木大鳥叫祠門青史平生事丹楹故國恩永陵北望在流涕向黃昏

清李慈銘七月二十九日王厚齋生日許竹簣諸君觴予松筠菴爲預作五十壽賦詩奉酬雲物清秋近帝閭勝流裙屐展華觴生辰爲借深寧叟佳事長留諫草堂敢冀家傳比麟鳳相期晚節勵冰霜百年耆舊凋零盡修敬居然到漫堂 甬江私淑自平生困學樓居舊系名異代經師尊伏勝九流學海匹康成讀書深媿知非晚聞道還期炳燭明勉接東南文獻脈坐中厨顧一時英

燕冀中學在教場頭條胡同

順城門西河即順治門西護城河昔日年例初伏洗象導以紅棍鳴鼓下鳴鑼起有官以

隸其事兩岸觀者如堵

清王士禎洗象行水關蒼蒼柳陰碧寶馬流蘇分絡繹日中傳呼洗象來玉河波射  
珊瑚赤須臾鉦鼓干雲霄萬夫聲寂如秋宵虎毛鬣奴踞象頂邱山不動何咎堯岸  
邊突兀二十四直下波濤若崩墜縱橫欲蹴龍臺宅騰達還我鷄鸛隊乍如昆明習  
鬪戰萬乘旌旗眼中見又如列陣昆陽城雷雨行天神鬼驚奴子胡旋氣道壯忽沒  
中流躍巨浪撒波一躍萬人呼幡然却出層霄上今年宰相收夜郎扶南盤况求王  
章遠隨方物貢天闕屹然立仗金階旁聖明自不貴異物致此亦足威遐荒黃門鼓  
吹暮復動海立山移呼汹洶大秦獅子多威神山林豈是王家珍

清鄭孝胥六月十六日觀洗象詩宣武洗象迎初伏萬騎千車夾水看法駕舊儀從  
鹵簿玉泉新漲試波瀾蒲甘國破封難復莽氏民存業遂殘留汝南荒遺老在可堪

有齒已先寒

去年英  
滅種旬

廣惠寺在老牆根廣惠寺夾道莫考所始明嘉靖中太監劉成朱仲重修

玉虛觀在廣惠寺南舊志稱有金元碑今無存

長椿寺在下斜街舊稱土地廟斜街明慈孝皇后建以居水齋禪師清乾隆二十一年重

修有明莊烈帝生母孝純劉太后續像真本已失今爲摹本

明徐本高過長椿寺贈水齋上人詩涼秋新月影生苔古柏蒼蒼有徑開清梵數依  
祇樹起天花如共妙香來二千遍界身能定七十餘年心未灰我自朝衣溜欲染堂  
前童侍莫相猜

清查嗣琛雜咏詩跨鳳前身事不虛九蓮經授夢初回龍章鳳額招提遍不及慈寧  
聖母書

清李慈銘仲春二十九日偕鄧鐵香嚴鹿溪袁爽秋看花至慈仁寺觀近人所撫九  
蓮菩薩畫像晚入長椿寺觀明孝純劉太后繪像爲長歌紀之長安二月多好花鳳  
城日日走鈿車疲羸亦結下澤隊尋春輒入空王家城西多結勝朝寺半出慈寧內  
宮賜鐘簾分鐫阿監名經函細鑿畏吾字慈仁勅住周吉羊茂陵布金爲渭陽修羅  
內出百軸畫毘盧高閣凌雲翔至今金碧盡銷蝕補種雙松亦無色猶有隙地供栽  
花廟市不開亦香國禪房小柱旃檀香低眉繪象天才妍不跨慈壽九頭鳳魚籃來  
結楊枝綠夕陽漸上娑羅樹驅車更踏槐街路長椿佛勝猶絕霞慈聖當年賜衣處  
水齋不作齋庫空滲金寶塔鈴語風青蓮九朵亦塵化猶有一軸囊函紅萬佛袈裟

紅錦紐傳是思陵孝純后智上已無菩薩題毘盧猶認辟支首當年私祭娘娘墳遺恨千秋堯母門差勝沈嬭空遣使遠慚章后見稱尊遺像淒涼求不得畫裡春暉渺難即月額頻煩指懿妃金容彷彿傳瀛國可憐麾仗列千官迎導旛幢跪問安不見珠衣御長樂并無翬翟納金棺至尊哀痛撫靈御六宮兩泣陳尊樹入夢猶言解菜來墜泉終見牽裾去弔古蒼茫起暮烟丹青俗語定虛傳武清新樂各家世莫使文殊誤普賢

因後人誤將此像認爲九蓮菩薩像尤謬故云

清趙吉士恒夫寓居在長椿寺西今爲全浙會館傳館內舊有景賢祠紫籐僧舍今已無存

都土地廟在下斜街爲元之老君堂每月逢三有廟市

妙光閣在全浙會館後爲清龔芝麓尙書別業之一部今爲全浙會館義園

清湯右曾過妙光閣詩披薜香門人穿雲小閣登松間耿殘照天外刷秋鷹勝節清

游數流年百感增西風重九日吹灑酒三升

畿輔先哲祠在下斜街

善果寺在核桃園東創於南梁明天順間復建



清馮溥九日登善果寺毘盧閣詩寶閣峻嶒俯帝京芙蓉西望削初成龍窺方丈三更雨天假重陽一日晴人眼黃花矜晚節舉頭鴻雁惜歸程茱萸剩有仙人佩池草何緣寄遠情

歸義寺在善果寺西日下舊聞引諸書以爲遼刹而宸垣識略謂依析津志寺實建於唐今寺久廢惟其地尙稱皈依寺自係歸義之訛

清查慎行歸義寺詩地作鄰人業苦侵破廟塹兩三碑背字猶記會同年感化學校在長椿寺北感化胡同爲感化不良青年之所

長椿寺之西北舊有槐市斜街今已無考

清朱竹垞查初白兩先生均曾寓居其地

清朱彝尊移居槐市斜街詩莎衫桐帽海櫻鞋隨分琴書占小齋老去逢春心倍惜爲貪花市住斜街 屠門菜市費羸驂地僻長稀過客談一事新來差勝舊昊天寺近井泉甘

清查慎行十月望後周桐野王樓村過槐窻看菊留小飲詩老瓦盆中花十本上槐街裏屋三間眼前此景殊不俗葦下幾人能愛閒我已掀泥除蘚徑客方冒雨叩柴

關寒林瘦竹蕭蕭意着片疎籬即故山

按世人多謂槐市斜街即今之下斜街者但查宸垣識略今之下斜街應爲土地廟斜街而槐市斜街尙在其西北見宸垣識略附圖與西便門大街相近以朱竹垞移居詩昊天寺近井泉甘一語昊天寺故址在西便門大街之西言之亦足見槐市斜街之非即下斜街矣

報國寺在下斜街西廣安門大街街北舊名大報國慈仁寺明周太后弟吉祥建舊有元代兩松姿勢奇特久已無存後補植二株清末猶在今亦枯萎惟一株尙有孫枝寺正殿今改爲昭忠祠僅西側顧祠尙存寺舊有窰變觀音像法相莊嚴製作精美清光緒庚子亂時失去

清施閨章慈仁寺松詩直欲凌風去翻從拂地看摧殘經百折偃仰鬱于盤老闍山河變陰兼日月寒支離爾何意不厭臥長安

清尤侗清明日登毘盧閣詩滿城土雨踏青難梵閣峇嶮一倚闌北闕雲開燕市近西山日落漢陵寒蒼松骨老龍鱗動綠柳腰低燕語殘斗酒雙柑休惜醉春風不易到長安

清高珩九日獨登報國寺詩野色橫今古西風滿帝州山寒雲外出水遠日邊流萬象秋皆靜浮生倦未休長松幽意懷少爲夕陽留

清李慈銘九日宴集慈仁寺毘盧閣詩城僻多幽事林深識禪靜經壇散菊花雲幢闕松影幸預華纓遊樂此蕭書永危厂凌蘿梯殘銘別苔井立關詎云歎談塵尤可秉語笑出天半爽氣與秋迴奇興清虛間即物見濠穎詠觴有餘歡塵俗奚待屏夕光吐微晴遠翠導西嶺迴看暮烟生月上鵲巢頂

又李慈銘看花至慈仁寺觀近人所撫九蓮菩薩像詩見前

清張之洞九日慈仁寺毘盧閣登高謝塵伯何鈇生陳六舟朱肯夫王廉生諸君同遊詩吾欲反悲秋秋氣實快哉木落天兩霜萬里無氛埃志士如黃鵠人海厭沈埋且登三藏閣何異九成臺磴道旣多剝步欄又已摧秋花亦疏薄辛苦殘僧栽紛然儔侶集解帶傾尊疊晴空擁太行萬馬脫啣來蘆溝濁似湯蘄邱低如坏決雲一鷗起拂霄羣雁排逸氣翔寥廓頓使襟抱開諸公皆能賦一一大夫來下視九陌人營擾徒喧逐年年有重陽望古令人哀此寺盛明季法筵闕如雷國初猶莊嚴廟市奇書堆亭林質廡住漁洋遊春回近日壽陽相重復闢蒿萊坐客皆龍虎張陳朱曾梅

嘉會已陳迹行徑生荒苔各自有千古恨不相追陪  
撫此白露零感我玄鬢衰靡靡  
枝上葉常被商聲催請看雙虬松鐵幹無摧頽  
牛山景下泣秋井杜銜杯二子孰爲  
賢悠悠非我懷

又張之洞新春二日獨遊慈仁寺謁願祠詩  
悻節常苦寂歡辰常厭囂東風悅士女  
歌吹嬰春朝街西獨閒曠不與遊人遭  
禪關驚臥彪寔然破寂寥庭陰貯餘雪  
渾瑩不受雕頽簷有凍溜髡樹無柔條  
緇徒閉戶睡煙火細欲銷寺後有廢邱  
觀闕見岩堯梵容闔網戶讚頌遺先朝  
何年廟市徒求書琉璃窰春燈照百貨  
車馬如乘潮雙松適靜性仍伴枯僧寮  
儼如魯二生偃蹇不可招又似兩詩老  
倔強島與郊返景落  
樛幹態色出蕭颯籠袖且久立已聞粥  
鼓敲豈惟肝肺清坐使榮觀超獨畏菰  
中人

剝喙致譏嘲

亭林著有菰中隨筆

又張之洞慈仁寺雙松猶存往觀有作  
千步廊前車如織歸來中滿不能食  
無聊欲共草木語城南雙松上胸臆  
琳宮百堵無片瓦遠見精神出草棘  
偉哉衣冠綺與黃曾覩燹火三月熄  
龍鱗如掌醜愈妍返照在頂晃點碧  
崇效僧圖遭掠賣長椿九蓮難蹤跡  
此寺瓷像亦俄空佛救不得憑誰力  
訪舊多爲游昏魂求如汝壽那可得  
同

遊俱是慷慨入藉草相看到曠黑往年妖亂等一夢錦庫成灰銅仙泣遺此區區老  
秃樹豈足增壯帝京色雖不中用亦復佳留與後來阮亭望溪弄筆墨

廣安門在外城之西清因明舊原名廣寧清以避帝諱而改宵爲安元名彰義門今俗猶  
呼之

廣安市場在廣安門大街

外四區區署在廣安門大街

增壽寺在廣安門大街爲遼之仙露寺故址清乾隆二十一年發帑重修今廢爲施賑之  
所

按仙露寺爲金人俘宋室濮王以下宗室子女所置處見北狩行錄

育華中學在廣安門大街爲工藝局舊址

燕冀中學 西北中學在廣安門大街爲商品陳列所舊址

白紙坊在廣安門大街南在南城諸坊中以白紙坊爲最大元代於此設稅副使北自善

果寺南至萬歲宮西極天霄寺皆是自明嘉靖築新城以城牆界之坊劃而爲二矣

寶應寺在廣安門東南相傳爲唐刹

崇效寺一名棗花寺在白紙坊傳謂建於唐貞觀元年爲幽州節度使劉濟捨宅寺中有青松紅杏圖卷有清一代名人皆有題詠卷軸粗如牛腰庚子兵燹遺失爲無錫楊蔭北先生壽樞所得仍以歸之今存寺中寺以牡丹擅名楸花亦盛近十年來老株牡丹日就枯萎遊人亦稀惟東關一園雖多新植尙有數種可供賞玩

清王士禎過崇效寺訪雪塢法師看棗花詩祇園棗花時招携共遊散彷彿旃檀林吹香綠陰滿射覆叱來來樂府歌纂纂樂此淡忘歸林中夕陽緩

清朱彝尊崇效寺詩繚垣途轉曲入寺淖初乾尙有殘僧在同尋斷碣看白花秋細細紅棗曉攢攢更上荒台望遙山五髻盤

清李慈銘壬午三月三日偕周荇農閣學徐壽蘅侍郎王益吾祭酒陳汝翼朱鼎甫兩編脩禊飲崇效寺題拙公青松紅杏圖卷詩清遊重憶十年前破寺楸花四月天今日新脩木蘭院僧貧猶乞畫叉錢芍藥新栽替牡丹棗花無復詠攢攢休教更話金源事塵畫明昌問聖安元碣都無况李唐猶傳白紙舊時坊闌黎興廢關何事今日今年作禊堂巾拂難招雪塢師朱王風調更誰知雲花聖壽俱塵劫祇有斜陽似昔時故鄉鏡水若耶邊多少滄髮士女船可識柳湖車馬影暮衝歸鳥出

林烟

又李慈銘修禊次日荇老以六金屬轉昇寺僧裝圖卷日落時復過寺再書二絕好事廬山周續之賣文乞與畫圖資耳鳴却笑李居士來趁鐘聲補寫詩 纔過穀雨

日初長特出南西

右安俗呼南西門

訪海棠爲愛嚴維誦詩句再來此地看斜陽

清鄭孝胥四月二日曾剛父招集崇效寺詩剛父今茶山詩法有所受五言最沈著意度一何厚讀之每太息風味如中酒春歸詩社晚惘惘三月後驅車白紙坊賞此楸株醜丁香栽及簷詎出王朱手壁間摩唐石馬廐迫隘湫風流一消歇文字亦何有勞生過白駒危局化蒼狗且極一時樂今日可無負

黃節四月初五夜風曉起過崇效寺看牡丹詩暖日開遲異去年回車曾此在春先豈知遊事原無俚却爲風宵獨未眠曉徑莓苔將接跡短欄槽榭不成編花時故有關心事欲與閒僧話佛前

又黃節崇效寺對牡丹作四月北客及花時不負春明賴有詩獨往也隨傾國後正開寧歎折枝遲匆匆着意終何寄忽忽爲驩亦自知遺世未能吾似汝蝶蘭花晚更猶疑

又黃節崇效寺同癩公看牡丹詩海棠已過了香盡毋負牡丹開匝旬遞歲一過嘗  
及盛惡風無日不愁春芳樽遲客僧忙煞楸樹兼花地斬新未了長安今日事欄邊  
同是舊遊人

曇花寺在崇效寺西明建

崇壽寺在崇效寺西北傳爲唐刹

財政部印刷局在白紙坊恐卽火葯局舊址

右安門在永定門之西爲外城之西門與西便門遙對俗呼南西門清因明舊

牛街在右安門北廣安門大街街南多回民寓居

清真寺卽禮拜寺在牛街內碑碣皆回部書

聖安寺在牛街東聖安寺街金時所建明正統中改名普濟清乾隆四十一年發帑重修

額曰勅重建古刹聖安寺

聖安寺地舊名東柳湖村有佛像三諸天像四以藤爲胎泥金裝飾瓔珞甲冑俱嵌珊瑚青金諸寶石莊嚴精好乾隆重修時佛像已移靜明園

清宋華夏日柳湖僧舍詩向夕微風起遙天片月斜禪宮添闋寂帝里得烟霞小院



搖清碧長楸落晚花西山還對我空翠浩無涯

清趙吉士寄園在教子胡同今遺跡已無可考

清香慎行遊趙恆夫寄園詩築成曲磴疊成岡高着樓台短着墻花氣清如初過雨  
樹陰濃愛未經霜熟遊不受園丁拒放眼從驚客路長亦有東籬歸不得四年京洛  
共重陽

清沈德潛移居寄園詩屋角時聞噪晚鴉土墻一帶任周遮行人欲認詩人寓老樹  
邨邊第二家 苔垣舊剩玲瓏句土室新安曲盡牀莫話寄園全盛事酒旗歌扇已  
淒涼

永慶寺在教子胡同

法源寺即憫忠寺在菜市口西南爛漫胡同舊名爛麵胡同之西唐貞觀十九年建清雍  
正九年發帑重修改今名

唐太宗憫東征戰亡士卒收其遺骸葬幽州城西十餘里爲哀忠墓又於幽州城內建  
寺曰憫忠以資冥福寺中舊有閣甚高俗稱憫忠高閣去天一握言其高也高閣遺趾

在明代已莫可考矣

帝京景物略

唐蘇靈芝書寶塔頌碑在寺中

元張翥登憫忠閣詩百級危梯遡碧空憑欄浩浩納長風金銀宮闕諸天上錦繡山川一氣中事往前朝僧自老魂來滄海鬼猶雄只憐春色城南苑寂寞餘花落舊紅清王士禎九日獨遊憫忠寺詩閒居愛重九獨往果幽尋初地凭高閣諸天落梵音雁王投極浦鹿女蹋空林玉輦經行地青松馳道深

清魏之琇游憫忠寺詩琳宮深邃柏蒼蒼懺佛台因古國殤妙法有源達聖世孤忠堪憫惜唐皇老僧戒約深而厲遊客詩情慨以慷莫向殘碑說安史景山擊鼓更淒涼

清李慈銘三月十五日潘絳庭丈招同嚴六谿法源寺看牡丹詩看到藤花興已闌羸驂癩復逐長安忽然一紙逍遙叟約向禪房餞牡丹傑閣丁香四照中綠陰千丈擁琳宮別開曲徑藏春塢煖約雕欄一面風

清張之洞看法源寺松懷亡友陸廣甫詩我憎法源寺車喧馬如龍獨有賞會處門下四五松霜皮白可掃高秀出沈濃六月坐其根火宅失蘊隆念我素心友清遊每相從一貫內外學見佛不忘恭往往舉一義老僧攝箭鋒二程較滯風優劣猶掛胸

何計左右門直會南北宗彈指成往來馬鬣秋草封欲辯誰爲質惠施難再逢撫此支離樹老壽無春冬

清鄭孝胥趙堯生招集法源寺詩相從追餘春別近願數見復此雙栝下談諧接諸彥與君知漸深片語輒稱善未到孰能料拭眼待千變吾謀適不用堅壁勿浪戰酒行言又發何異弦上箭

黃節法源寺看丁香同魏齋秋湄詩都城盛看花丁香獨開早法源古招提今日罕人到婆婆百數株爛若紫與縞斜陽照殿角上覆翠松老春穠草木茂故物盡除掃桃梨杏棠藥後先各多道歲歲看花人眷此須臾好新綠未成陰晚覈初似稻堂壇佛久鐫春事自草草更訪雲麾碑與君說天寶

宋謝枋得被魏天佑強赴燕京問謝太后攢所及瀛國公所在再拜慟哭已而臥病遷憫忠寺見壁間曹娥碑泣曰小女子猶爾吾黨不爾若不食而死

明袁繼咸燕都弔謝疊山詩北風塵起征車促南火傷心不再噓三敗猶還仲母在兩旬忍餓漢臣如歸降當日原無表却聘留今只有書天使先生沈卜市建陽橋亦首陽居

趙公祠在法源寺西祀明御史趙譔御史係於明崇禎甲申殉難墓在祠後

廣安中學在法源寺後街

醋章胡同稍南有不通行小巷曰門樓胡同

清龔定庵先生少時寓居門樓胡同

清龔璣人過門樓胡同感賦詩情多處處有悲懽何必滄桑始浩觀昨過城西曬書

地靈魚無數訊平安

水月庵舊名水月禪院在爛漫胡同

蓮花寺在蓮花寺灣舊名七井胡同久已賃爲民居

江蘇學校在北半截胡同

廣和居在北半截胡同對宇爲嚴氏聽雨樓故址初名隆盛軒清道光十一年改今名肴

饌以江南風味擅名一時朝士之爲南人者多樂就之民國六年閉肆

清夏閨枝先生同善廣和居感舊詩城南雅集憶承平近局時隔巷迎酒肆未隨

朝市改夢華故老話東京 聽雨樓東蕭寺北蝸廬肇自道光年公卿小巷常停轍

也作貞元軼事傳 閱世青裙漾冷坊名流幾輩醉罇旁東洲詩老留住話酒債諸

孫尙未償 不為珍錯競肥甘春韭秋菘味自醜肉號東坡魚宋嫂食單掌故補宣

南 畫壁旗亭結習存趙行秦草各專門周髻竟欲移樽避抹煞顏家屋漏痕 趙堯生

佑衡二君拈壁為多秦書尤自負周泊園先生不喜之每擇坐室有秦書者不入傳以為談柄 四十年來萬事非閉關頌酒抵餐薇黃公釐下

重經過稽阮徒悲舊侶稀

伏魔寺在北半截胡同廣和居南

廣東學校 女子學校在丞相胡同舊名繩匠胡同

南海會館在米市胡同清光緒戊戌政變康長素先生弟廣仁於此被捕

清潘伯寅尙書祖蔭故宅在米市胡同

保安寺在菓子巷內保安寺街

清李蓴客先生寓居保安寺街

清李慈銘移居保安寺街留別鐵門舊居詩見前

又李慈銘十二月十二夜月皎甚偕敦夫步歸保安寺街詩歸踏滿街月閒門星斗

斜犬聲聞隔巷樹影似山家地僻猶餘雪霜嚴早際鴉漸聽更柝緊始覺住京華

王邵論詩地 邵子湘青門旅稿自序言己未歲寓保安寺街與阮亭先生隔僅一堵 風流已渺然履綦思蘓迹門巷幾茶烟耶

署清吟暇康熙極盛年料如今夜月梧影落華箋依此詩是

王漁洋邵子湘兩先生亦曾寓居此巷

燕冀中學 春明女子中學均在宣武門外大街

時中學校在南橫街

怡園在南橫街南半截胡同口外爲清康熙大學士王熙別業園久圯其地早夷爲民居

遺跡莫可考矣

萬壽西宮在盆兒胡同今存昔其東尙有萬壽東宮久已頽圮

清張文達公治秋師祠名嶽雲別業在盆兒胡同口外雙槐樹

第一監獄在姚家井其前新闢一通衢名自新路

天仙庵在半步橋羽士居之

三教寺舊名玉皇廟爲明榮昌公主所建在天仙庵東清道光年間重修改今名

以上爲外四區轄地

晉陽寺在潘家河沿昔有銅觀音像欸識爲尉遲敬德造久已無存

求實學校 達材學校均在潘家河沿

黑窰廠爲明代製造磚瓦之地至清已廢其地坡壠高下蒲渚參差都人士登眺往往而集焉俗稱爲窰台夏日搭棚售茶

清沈德潛九日同人黑窰廠登高詩崇岡突兀俯南城木落寒林眼倍明雙闕參差佳氣合三關層疊暮雲橫風霜慘淡重陽節燕趙悲歌終古情況有酒人同會合一杯便欲埒荆卿

龍泉寺在黑窰廠西寺甚宏廠創建年月不詳有明碑載成化間僧智林脩復云

龍泉孤兒院附設龍泉寺內

龍樹寺在黑窰廠西南龍爪槐寺內爪槐甚古創建年月不詳今改爲南皮張文襄公祠清李慈銘壬申上巳日王信甫員外邀同董峴樵遊城南龍樹寺詩小試郊南騎芳塵輒不驚草長知蝶態水滿得蛙聲暖日常依闕輕烟欲抱城相期投古寺幢影隔林明 寥落芳華節歡遊止百哀柳絲依水檻花氣出香台遠樹壇陰直浮雲塞上來烽烟應未盡相勸手中杯

又李慈銘潘伯寅侍郎張孝達編脩招集龍樹寺分紀以詩客賞良不易官程况多促輟洗解華簪相携玩嘉旭宛彼城南隅地曠衆景著招提出烟際老槐互蟻曲修

池帶叢蘆欹廊蔭疏竹欣此微陰娛遠風扇新綠開軒緬西山嵐翠若初沐玉醴既已陳清言取相觸感樂窮萬變芳華富一矚情有異同吟道爲智愚局翳兮寡素尙塵鞅苦羈束幸陪君子歡幽襟未易足漸覺暮靄生鐘魚自虜續吟遲新月上慘此不違宿歸去滌塵夢松泉響幽谷

又清李慈銘夏晚偕諸子坐龍樹寺馬纓花下詩雨過夕陽淡禪房開綠陰微風交葦影晚色上花心飛鳥有時倦暮雲隨處深徘徊無限意何似在山林

又李慈銘夏晚偕匡伯試茶龍樹寺詩暫學清涼法招提就夕陽林迴連堞勢蘆缺見山光鳥去孤烟定風來衆綠忙茶香禪榻畔元賞等濠梁

清張之洞龍樹寺詩此地曾來一百回荒陂敗紫葦花開當年茶話成今古誰畫山僧兩秀才

又張之洞龍樹寺西樓詩誰種樓西樹幾行此來更比昔年長苦思無限西山好須待秋林九月霜

陶然亭一名江亭在黑窰廠南城垣西偏舊爲慈悲庵北院內有遼壽昌五年慈智大德師佛頂尊勝大悲陀羅尼幢并記庭前有金天會九年四月石幢



陶然亭爲清康熙年間江郎中藻所建故又名江亭取白居易詩更待菊黃家釀熟與君一醉一陶然之義清代士大夫恆於此讌集觴詠焉

清湯右曾秋日登大悲庵後亭詩石幢重到訪遺經秋色蒼然落此亭鴻雁影低連古堞蘼葭聲冷繞迴汀如絲氣上龍泓白滿月光搖佛髻青願証諸天菩薩戒自今刀几謝羶腥

清杭世駿詩溪風吹面燈晴瀾葦路蕭蕭鴨滿灘六月陶然亭子上葛衣先借早秋寒

清李慈銘夏初偕子縝雲門王子裳王弼甫羊敦叔小集陶然亭詩漢家城闕對郊壇佳氣蔥蘢隱几看平野暖風吹綠葦遠山曉翠落朱欄時清想見官曹樂老去常知聚會難猶是江亭觴詠地夕陽芳草滿長安

清張之洞遊陶然亭詩當年葦海萬弓遙旱久青青未沒腰淺水蛙生波少態蕪田牛病莠之驕看山終礙橫城闕有屋猶應勝黑窰曾是千塲觴詠地酒邊腹痛頓思橋

清梁鼎芬陶然亭尋舊題不得續爲此詩涼秋碧樹發孤妍酒夢惺忪近十年亭石

微欬妨蝶路砌花漸密鎖蟲天賭棋客已成新醉識字僧猶誦往篇贏得滿襟塵土  
在王符着論可爲賢

清鄭孝胥人日登陶然亭詩春來料理喚吟朋暖日江亭便可登林杪山光能映酒  
蘆根泉脈欲銷冰閒曹蹤跡人誰覺老輩追陪我亦曾猶有後山同刻意故應風味

愛盲僧

寺有盲  
住持

黃節江亭九日詩帶郭無山此獨尊登高吾已俯重門三年京國傷秋客九日江亭  
對酒言原草漸黃人亦瘁霜花曾雨晚猶存竭來吟望嗟何似寒雀爭枝爲暝喧  
又黃節十月朔日過江亭詩野菊依籬高下長路人牽葦淺深行孰云十月秋光盡  
不見宮槐落又生 薤草郊原明邏騎殷城車馬接孤村洒然自取今朝樂更就田  
間野叟言

花神廟在陶然亭稍北其前有

香塚傳說不一但銘詞極哀惋悱惻 註

註

天咫偶聞繁台在陶亭之東有香冢及鸚鵡冢相傳香冢爲張春陵侍御瘞文稿鸚鵡冢則諫草也香冢  
銘云浩浩愁茫茫劫短歌終明月缺鬱鬱佳城中有碧血碧亦有時盡血亦有時竭一縷烟痕無斷絕是

耶非耶化爲蝴蝶又詩云蕭騷風雨可憐生香夢迷離綠滿汀落盡天桃又穠李不堪重讀瘞花銘鸚鵡  
冢云文兮禍所伏慈兮禍所生嗚呼作賦傷正平

黑龍潭在先農壇西爲祈禱雨澤之處

舊京有三黑龍潭一在城西畫眉山一在房山縣一在黑窰廠

清施閏章九日同人集黑龍潭以偶病未赴詩長安雲物易爲秋九日群登傍浦樓  
雷雨此中生絕壑蒹葭何處有孤舟西山倒影當尊酒大漠悲風試客裘誰信少文  
懷五嶽良時偏臥不同遊

清徐乾學集黑龍潭詩城南仙館問幽踪陶穴人家路幾重古堞寒雲連絕塞高壇  
深樹祀先農絳霄九奏看翔鶴碧壑千年起蟄龍宴坐繩床無一事洞門餘露落青  
松

江南城隍廟在南橫街之東先農壇西北清康熙年間建每歲清明中元十月朔都人迎  
賽祀孤

市立醫院在萬明路爲舊日香廠地

香廠昔日多爲墟墓清末闢爲民居路亦新闢

香廠東之留學路舊名牛血胡同

外五區區署在養羊胡同

東西珠市口以南至永定門中間有橋曰天橋橋之左右皆小巷來已久民國以後更於春夏積潦之際建水心亭茶社設蒲棚近亦就衰矣

先農市場 天豐市場均在天橋

先農壇一名山川壇在正陽門外西南永定門之西與天壇相對天神壇地祇壇太歲壇先農壇藉田俱在其內昔爲皇帝行親耕公園壇殿俱存惟壇外老樹多被砍伐壇地一部亦售歸民有先農壇制方南向一成方四丈七尺高四尺五寸四出陸陸各爲殿五間以藏神牌

觀耕台方廣五丈五尺面鑿金磚四圍黃綠琉璃南東西三出五間

太歲殿在先農壇之東北正殿七間南向

天神壇在先農壇外之東南制方南向一成方五丈高四尺五寸五分四出陸各九級壇北設青白石龕鑲以雲龍祀雲雨風雷之神

地祇壇亦在壇外東南制方北向一成廣十丈縱六丈高四尺四出陸各六級壇南設青白石龕五鑲山形者三以祭五嶽五鎮五山之祇鑲水形者二下爲方池以祭四海四瀆之祇

巡警教練所在太歲殿西

體育專門學校在先農壇外壇

以上爲外五區轄地

# 故都變遷記略卷十

## 郊坰

有清一代苑囿除西苑外多在郊坰西郊最多南北郊次之東郊殆無寺觀亦然現今帝制既廢無所謂苑囿故統稱郊坰

永定門在外城正南清因明舊

南苑在永定門外二十里元爲飛放泊明永樂時增廣其地周垣百二十里清因之設海戶一千六百人各給地二十四畝舊爲皇帝春蒐秋狩以時講武之地

南苑繚垣一萬九千二百八十丈爲九門正南曰南紅門東南曰迴城門西南曰黃村門正北曰大紅門稍東曰小紅門正東曰東紅門東北曰雙橋門正西曰西紅門西北曰鎮國寺門苑內海子五今苑地已多售歸民有可以藝稻

瞭鷹台在南苑內高六丈徑十九丈周徑百二十七丈本元仁虞院舊爲舉行大閱之地台今尙存

新行宮在南苑大紅門內里許今無存

團河行宮在黃村門內六里許今尙存

南行宮在南紅門內里許今無存

燕墩在永定門外半里許官道西有清高宗御製帝都篇皇都篇兩文碑亭今無存

金臺在永定門外東南三里許巋然土阜舊有碑亭碑爲清高宗御書金台夕照四字爲

燕京八景之一

明林環金台夕照詩高台曾此置黃金人去台空碧草深落日未窮千里望青山遙

映半城陰雁將秋色來平野鴉帶寒光過遠林昭代賢材登用盡不須懷古動長吟

清曹仁虎黃金台詩穹台百尺薊邱邊北面猶思事隗年未必懸金能致客只緣擁

篲善尊賢甘棠世胄遙分召析木封疆竟霸燕莫向通霞同弔古從來求士勝求仙

海會寺在馬家村明嘉靖間建

涼水河其源出右安門外西南鳳泉東流入南苑匯一畝泉及海子諸水由五孔橋經馬

駒橋至張家灣入潞河

碧霞元君廟在南苑大紅門外土人呼爲南頂

清吳巖遊南頂詩柳映紅亭水映橋碧霞宮殿鬱蒼蒼年年五月開香社大好風光

慰寂寥 龍岡委宛似卷阿披拂薰風爽氣多一帶葦棚臨水岸酒徒狂醉姣童歌  
清李慈銘偕匡伯仲彞遊南頂詩古廟松陰午夏涼繞門烟景似江鄉西山掃黛依  
城闕流水含情人苑牆樹影直穿遊騎駛波痕對鼻酒旗長笙歌漸散衣香亂已見  
平疇滿夕陽

元靈宮在南苑小紅門內西偏清順治十四年建奉玉皇上帝建築宏麗今已無存

小紅門西南舊日尙有永慕寺清康熙三十年爲孝莊皇后祝釐永祐寺康熙十七年  
爲孝康皇后祝釐所建德壽寺順治十五年建今俱無存

右安門在外城之西南隅清因明舊

廣恩寺在右安門外西三里菜戶營舊名清勝寺

花之寺在右安門外今已無存

清李慈銘偕肯夫慈仁寺看花復出右安門訪花之寺海棠遇方勉甫兄弟留飲詩  
春風十日吹暖晴結侶又向城西行慈仁寺中春事早杏梨綠暗丁香明白玉花叢  
間金雀映梅滿地燕支落碧桃一樹早霞鮮綽約新嬌倚經閣僧貧寺寂門常開卷  
衣蝴蝶時去來危梯響屨出花上踏青爭上文殊台回車出城更尋寺諸老花之有



題字入門錦照緋羅天雙樹蒸雲一何綺相輪轉七寶裝朱檐碧瓦危相當齋鐘  
一杵散花雨華嚴色界回春光京師海棠本第一此花奇麗尤傑出猩紅鸚綠天人  
姿回首天桃憐如失方家兄弟携玉卮周郎爛醉倒接離紫雲照座絳仙舞深杯百  
罰何須辭酒罷開窗延野色夕陽返照艷無極欲具袍笏拜金神留此十句作花國  
嗚呼盛時不遇誠可傷南鄰張子聞應狂

是日期孝  
達不至

又李慈銘修禊次日夕陽時出遊花之寺日落復至崇效寺詩雨後沙暎似水平暮  
春初試袷衣輕人從新綠來穿樹馬帶斜陽又出城花裏茶烟知客到林邊村落覺  
山明閒官似此真忙甚日向僧寮挈榼行

清張之洞花之寺看海棠坐中同年董兵備將有秦州之行春光如箭去可惜有如  
千里遠行客主人惜別並餞花對此都能飲一石新陰嫋嫋燕離語脂光澹薄無幾  
許石氏珊瑚強護持關樓紅粉含悽楚乾嘉遺老南城曾腰纏十萬來廣陵日携姝  
麗到花窟寶箏瑤席驚枯僧墻頭詩勝藉塵土繁華轉眼如風燈承平仕宦得遊讌  
不解守邊事征戰今日男兒重邊功豈惜穠華如飛鷲人生美官誰不求涼州美酒  
能銷憂花好亦如盛名好莫遺沙場空白頭

碧霞元君廟在右安門外十里草橋北數十武土人呼爲中頂每歲以四月一日開廟

清吳巖遊中頂詩十里城南綠滿川春風春柳自年年名園幾廢靈祠在辜負看花  
穀雨天 都人士女競喧奔花市闌珊廟市繁已見田田好荷葉風流憶殺趙王孫  
草橋在右安門外十里衆水所歸種水田者資以爲利土近泉宜花居人以蒔花爲業橋  
去豐臺十里中多亭館元廉右丞之萬柳堂趙參謀之瓠瓜亭栗院史之玩芳亭皆在  
焉今遺跡已無可考

清王士禎過草橋詩垂楊匝地板橋橫沙路青驢得得行偶坐濠梁忘日暮可憐泉  
水在山清

清查嗣琛雜咏詩草橋十里百花妍只有幽蘭種不傳生長山中畏塵土托根誰羨  
帝城邊

清湯右曾自黃村歸經草橋詩瞭鷹台北接春郊傳馬閒行未覺遙尺五城南好風  
景到天烟色柳條條 右安門外舊池亭別墅參謀堂右丞今日草橋清淺水還留  
一縷照衰興

元右丞野雲廉公希憲於都城外創造園亭名花幾萬本京師號爲第一一日於萬柳

堂張筵邀疎齋松雪兩學士歌姬劉名解語花者左手折荷花持獻右手舉杯歌驟雨打新荷之曲松雪喜而賦詩爲一時佳話

元趙孟頫即席贈歌姬詩萬柳堂前數畝池平鋪雲錦蓋漣漪主人自有滄洲趣游女能歌白雪詞手把荷花來勸酒步隨芳草去尋詩誰知咫尺京城外便有無窮千里思

清查嗣琛萬柳堂詩梁園千頃牡丹紅不及廉園一萬叢未老先歸賢相國肯將花事媚東宮

草橋附近昔日尙有祖氏園年氏園水石花木擅一時之勝見王漁洋宋牧仲沈歸愚諸先生詩今俱無存

金太祖平遼碑在南城豐宜門

金南門名

外今無考

元果邏洛納新詩十丈豐碑勢倚空風雲猶憶下遼東百年功業秦皇帝一代文章

太史公石斷龍鱗秋雨後苔封鰲背夕陽中行人立馬空惆悵禾黍離離滿故宮

豐台在右安門外十八里居民以藝花爲業而芍藥爲最有名

豐台之名不知所始詢之士人并無台也

清王士禎豐台看芍藥詩回首旗亭畫壁時重來已是十年遲應劉逝後風流盡只

有恒河照鬢絲 宮錦千絲費剪裁  
泥他婪尾殿春杯 老顛賸欲相料理  
乞取齊奴步障來 雨雨風風態自殊  
花花葉葉不曾孤 更添練鵲和禪蝶  
便是徐熙六幅圖

霑濕春衣更不嫌 花枝姪姪雨廉纖  
鬢絲禪榻心情改 閒看兒童插帽簷

清湯右曾豐台看芍藥詩 晚色噫嚨錦障開  
殿春花事數豐台 天公雨露園公力等  
是批紅判白來 休嗟狼藉市門前  
繞郭栽花萬畝連 當日洛陽全盛日  
一枝姚魏直千錢

清沈德潛豐台看芍藥詩 柔枝穠態若爲情  
客裡看花眼倍明 略似少陵臨水見五  
家合隊麗人行 文牕雕砌付蒼烟  
開到名花轉可憐 猶有園丁閒把耒  
逢人還訴舊平泉

廣安門在外城之西 清因明舊門外築石道  
直至盧溝橋

盧溝橋昔日爲驛路 出京第一站 比之長安灊橋焉

清梁鼎芬同十六舅晦若出彰儀門外望行人  
往來詩 大道飛輪迅 莫留石梁鳧鴨  
自悠悠 同人各有江河感 今歲先捐米粟  
憂輻輳 街塵成舊話 蕭閒風物是清秋  
心知不及當年勝 疏柳斜陽故出遊

路旁野老言 道光以前  
行旅之盛 近不復觀

天寧寺在廣安門外元魏孝文帝建爲光林寺隋爲宏業唐爲天王金爲大萬安元末兵火蕩盡文皇在潛邸命所司重修明宣德中復修改名天寧正統間又改名萬壽戒壇清乾隆二十一年重修仍名天寧民國後屢有駐軍頗爲作踐近始修葺  
明姚廣孝退自慶壽曾居此寺

明王綬游天寧寺詩古寺尋幽竟夕暉敗垣荒草路依稀烏啼空院僧何在樹老閒亭鶴自歸靜對芳池移石坐高臨孤塔看雲飛平生自信心無礙不是衰年始息機清尤侗夜投天寧寺宿詩昏黑應須到花宮接雉壕鐘鳴寒月靜鈴語夜風高千里獨爲客一官何太勞擔當依淨土破衲補征袍

清徐乾學天寧寺詩籃輿携伴愜幽懷古寺寒鐘景色佳開閣青山方滿座人門紅葉已翻階清談不厭王濛茗枯坐眞同蘇晉齋會向射堂還秉燭知君不惜酒如淮清朱彝尊天寧寺詩青豆房容借經旬且閉關日邊連右輔樹杪豁西山六井泉相似千花塔易攀不應朝市客翻羨旅人閒萬古光林寺相傳拓跋宮著書非柱下留客即淹中味坼園蔬甲香携市酒筒波濤人海闊安坐作漁翁  
清李慈銘八月朔日借袁爽秋潘孺初鄧鈇香諸君餞鄧猷之還黃岡詩祖餞西郊

集餘炎翳寺林憂時須縱酒傷老重分襟室淨香能定山秋翠漸深閱人隋塔在千載幾登臨

又李慈銘後一日再偕雲門及汝翼弢夫集寺之塔射山房餞敦夫詩隔日期茲寺長緣餞客來秋陰殊昔望山色向人開遠樹收高榭疏花出講台當筵眉黛落相映手中杯

又李慈銘夏曉雨後偕霞芬出城入天宵詩

霞芬姓朱爲當時名和公乘注

油碧同時出花隨載酒行

蟬多知近寺塔迴不依城遠岫猶雲勢低騰起水聲客來林鵲喜與佛報新晴又與霞芬坐天宵寺看山院詩經壇松外午烟霏一院蒼苔客到稀近戶花香通窈窕鉤簾山色趁羅衣高粱夾隴茅茨隱遠磬穿林野鵲飛惆悵鬢絲禪榻側夕陽何事苦催歸

又李慈銘天宵寺殿廡西邊一室極淨窗開山滿甚愛之用章左司行寬禪師院詩韻題壁詩花陰轉深廊西窗俯叢竹几席皆山光清輝媚幽獨靜聞林外香安得經時宿

清張之洞天宵寺紫藤花獨遊玩之詩春事如駒不留影藤花爛漫祇俄頃芳妍可

賞才五日常畏陽驕與風猛此遊正值穀雨過丈室吹香晝漏永纓絡菩薩低垂鬘  
縷甲蛟螭曲宛頸密葉張幃已交蔓細葢編珠猶附梗恰無車馬來喧闐黃蜂薨薨  
白日靜玫瑰作甘稍塵濁醱醱似酒或酩酊此花雖甜幸不俗蕩魂攝魄聽自領功  
德能破定僧禪蒲團觀鼻須警省狼藉一斗無人惜持歸調酥煎作餅

清梁鼎芬天寧寺石臺望雪詩尖風一夜擊重陰雪曉平原匹馬臨卷內詞人半千  
古亭前寒意逼孤襟飄空遠近憑何力見睨消浮豈有心獨倚石闌中酒後暮鴉沈  
戀未歸林

天寧寺塔高十三尋爲十三級相傳中有舍利隋文帝建四周綴鈴萬計風定風作音無  
斷時塔前一幢書體道美亦開皇中立

清王士禎天寧寺觀浮圖詩千載隋皇塔嵯峨俯舊京相輪雲外建珠網日邊明淨  
土還朝暮滄田幾變更何當尋法侶林下話無生

清朱彝尊天寧寺大風和徐處士韵檻外隋皇塔三千六百鈴天風吹不定一夜枕  
函聽砌咽寒蟲語臆搖獨樹形故人眠未穩吟傍佛前燈

宸垣識略稱按天寧寺塔倒影之說帝京景物略較諸說爲明顯今塔無珠塔後無大

士殿倒影之蹟蓋不可得而考矣

大慈觀音寺又名海會禪林在廣安門西一里許亦舊日白紙坊地明成化中上林苑監單盈建

柳巷出廣安門五里土名柳巷村

財神廟在柳巷村清乾隆元年重建每歲元月士民祈賽香火甚盛

清毛奇齡上巳同王光祿柳巷脩禊詩細雨新吹九陌塵桃花又放曲江春同來柳市傳觴客仍是蘭亭修禊人 駿馬郊原籠碧絲紅竿挑鮫踏花時如何兩度芳林宴不作王融上巳詩

福生寺在盧溝橋北五里樟各村舊名彌陀菴清康熙間僧元信募修

濕水即桑乾河至馬陘山爲落馬河出山謂之清泉河至雍奴入笥溝謂之合口

濕水又東與洗馬溝合洗馬溝上承剡水西注大湖相傳光武北巡洗馬於此又云即姚期奮戟處

永定河卽盧溝河舊自宛平縣東經大興縣南至東安武清入白河即桑乾故道亦曰黑水水色甚濁其急如矢清康熙三十七年勅改今名



盧溝橋在廣安門西南二十五里跨盧溝爲南北往來大道金大定二十九年作明昌三年橋成長二百餘步左右石欄刻獅數百枚情態各異元明累加修葺清康熙三十七年重修

金趙秉文盧溝詩河分橋柱如瓜蔓路入都門似犬牙落日盧溝溝上柳送人幾度  
出京華

元楊奐盧溝詩燕姬歌處轉鶯喉燕酒春來滑似油自有五陵年少在平明騎馬過  
盧溝

明顧起元盧溝詩西山籠霧曉蒼蒼一線桑乾萬里長最是征夫望鄉處盧溝橋上  
月如霜

清宋學過盧溝橋詩盧溝橋畔雪霜多今日衝寒又一過不道鄉心南去急祇疑波  
浪似黃河

清沈德潛盧溝橋詩桑乾流百折到此激盤渦今古利名客俱從橋上過風沙揚日  
暮鎖鑰壯關河塵海茫茫際誰人發浩歌

永定河神祠在盧溝橋側

元太保劉秉忠墓在盧溝橋北今無考

明姚廣孝春日謁劉太保墓詩芳時登壠謁藏春兵後松楸化斷薪雲暗平原眠石  
獸雨荒深隧泣山神殘碑辭實文章舊異代人傳姓氏新華表不存歸鶴怨幾多行  
客淚沾巾

天空寺舊名金閣寺在石景山有塔宜遠眺明正德中朱宵建

清王士禎登石景山浮圖詩浮圖茲山頂峽嶂插孤標千盤歷詰曲直上凌風颯寒  
空稍明淨百里見纖毫茫茫塞上山浩洶連波濤渾如灑山來石壁如動搖咫尺居  
庸關鳥道迴青霄上谷接雲中設險非一朝聖代亭幃空丸泥罷函轂關門閒落日  
士馬無矜驕迴身望漁陽城闕何寥寥薊邱植汝篁遺烈思燕昭望諸與騎劫智勇  
皆蓬蒿朔吹揚驚沙屯雲怒盤鵬慷慨一傷懷覽古心鬱陶逝將御冷風揮手辭塵

雲

惠濟祠在石景山祀永定河神清雍正年間建

碧霞元君廟在石景山東南明萬歷中董常侍建

西便門在外城之西北隅清因明舊

白雲觀在西便門外一里元太極觀故址中塑邱真人像白晢無鬚眉像塑如生都人正月十九日致堦祠下謂之燕九節清乾隆二十一年五十二年兩次修葺

長春真人姓邱氏名處機字通密號長春子登州棲霞縣人金大定丙戌年十九辭親居崑崙山己卯五月金太祖手詔致聘壬午見太祖於雪山之陽拳拳以止殺爲勸癸未東還賜號神仙爵大宗師甲申八月奉旨居燕京太極觀丁亥五月改太極爲長春七月留頤而逝年八十至元己巳賜號長春演道主教真人

元哀桷遊長春宮詩珠宮殿殊界積構中天臺神清歷倒景青紅隱蓬萊羣山助其雄袞袞從西來八荒昔禹甸爲此增嶺嶽舊邑環蟻垤清泉覆流杯雲低落日淨莽蒼同飛埃緬懷古仙伯采芝雪瑤璫長春豈酒國殺氣爲之迴天風起高寒玉佩聲徘徊空餘水中輪歷錄環春雷之人去已久松聲有餘哀

明朱國祚題白雲觀詩一言止殺古人難多少通臣藉爾安辛苦捐軀文信國得歸也擬著黃冠

清徐乾學白雲觀詩浮圖寶鐸半空聞仙觀還看榜白雲霜樹紺園鴉自集岩花丹竈鶴依羣碑鐫仁壽留千載蹕駐崆峒記數君行樂祗應憑眺徧未遑徙倚到斜曛

清朱彝尊白雲觀詩愛見晴山出郊西萬木疏偶尋樵子徑因訪羽人居活脫存遺像蒼涼感廢墟惟餘綵旛字髣髴鶴頭書世祖興元日真人獨召邱片言能止殺萬里不虛遊羽蛻長春觀池枯太液流誰裁釋老傳乃與帝師儔

清李慈銘乙亥九月偕張孝仲朱鼎甫袁爽秋濮紫泉遊白雲觀詩高秋西出鳳城闕直上星壇禮玉真極漠山川窮大石舊京宮殿自長春鐘璫雲繞香台地環珮風傳霧閣人我是立都人再到紫霄今日靜烟塵

又李慈銘燕九節出遊白雲觀詩百市爭趨太極宮不嫌燈節過匆匆西山晴翠朝來滿毳仗風鳶一路中一花七葉北宗傳玉哲方瞳尙儼然獨憶蘇常高節在無人玉帶禮儒仙霧閣三層峙玉京窺朱鳥自分明釵光髣髴影天河上環佩虛傳下界聲漸覺雲璫罷道場風旛低散鵲鐘香蒼松斜轉蓬壺影閒坐闌干俯夕陽哀忠墓在白雲觀西十餘里相傳唐太宗憫征東戰亡士卒骸骨暴露令悉收葬爲一大塚因名今遺跡已無可考

廣恩寺即遼之奉福寺在白雲觀西南地名栗園土人呼爲三教寺今已無存

崇壽寺在白雲觀西六里羊坊店舊有明弘治七年所造鐵獅子土人因呼爲鐵獅子廟

圓通觀在三里河

無量菴在三里河係古刹靈佑觀所改

重興寺 藥王廟在三里河創建年月不詳

圓覺禪寺在三里河明嘉靖間太監麥某建

釣魚台在三里河西北里許金主遊幸處清乾隆三十八年濬治成湖建置行宮今湖水

久涸 註亭榭尙存民國十一二年間清遜帝以贈其師傅螺江陳弢庵太傅寶琛後爲

北平大學農學院所奪

註 李慈銘越縵堂日記初七日（光緒庚辰八月）癸卯秋陰間晴作書致雲門約遊釣魚台雲門來午後

同教夫出廣甯門經天甯寺白雲觀驛卒不識道迂行二三里始抵釣魚臺地屬玉河鄉之池水邨亦曰

花園邨去三里河西北里許相近有圓通觀圓覺寺爲金主游幸處金人王飛伯嘗隱於此見元遺山

詩乾隆三十八年濬治成湖以受香山諸水於湖之東口置牖以蓄泄之其下流由三里河達阜成門之

護城河至東便門入通惠河矣湖中有泉湧出隄岸周圍約二三里中悉種蓮較十刹海多幾倍之近水

爲稻田隄外積土隆然成山迤邐相屬西山修黛橫翠可接湖中有船方篷施幔放憑吳製借兩君招擢

人攜茗具緩汎其中山水清暉怡然心曠云云及此日記觀之則其湖在光緒年間其水尙盛也

明公廩詩花石遺墟入戰圖翻門衰草釣臺孤不知良嶽宮前更得見南軍入蔡無

清宋華釣魚台詩欲訪垂綸處長歌燕陽來澄波飛野鴨斷岸失孤台正喜青藤共  
寧愁畫角催勝遊應再續計日牡丹開

清吳煜釣魚台詩金主變輿幾度來釣臺高欲比金台可憐台下王飛伯不及鱈魚

得奮腮

金人王鬱  
隱居釣台

清李慈銘秋陰偕敦夫雲門泛舟釣魚台下循隄至行宮而回詩西便門西池水村  
村中往往多泉源裕陵親敕疏湖道上承玉河環郭門湖岸周圍二三里中種芙蓉  
雜菱鱗烟波遠過積水潭澤物何如十刹海我來已及秋之中朱花落盡田田空枯  
茄十萬颺風際偶見一二搖殘紅湖船六柱就花泊萬疊西山掛篷角惜哉不早三  
旬來四面香風臥花幄我生會稽烟水家鏡湖花國古所誇湖盡爲田花在岸絕無  
畫艫能穿花回舟更傍御堤去寂寂行宮鎖烟樹紅橋映帶清泉流盡是先皇豫遊  
處金源遺事莫徘徊伯業名流等作埃即今瀟碧澄瀟地幾見西巡翠輦來

普會寺遼之駐蹕寺也在玉河鄉池水村明嘉靖中太監蔡秀恭重建  
永安寺在玉河鄉明萬歷年建

元星吉墓在玉河鄉星公以江西省平章死難者

靜義菴在玉河鄉池水村

普濟寺在玉河鄉池水村

三官廟在池水村

觀音寺在玉河鄉池水村金大定間比丘智完建

玉淵潭即玉河鄉元郡人丁氏故池柳堤環抱景氣蕭爽沙禽水鳥多翔集其間爲遊賞

佳麗之地昔元人遊此慶和極一時之盛

明王嘉謨詩玉淵潭上水萋萋百尺泉聲散遠溪垂柳滿堤山氣暗桃花流水夕陽

低

廣濟菴在玉河鄉池水村明天順元年建

觀音庵在玉河鄉打錠廠

關帝廟在高麗莊

勝泉寺在高麗莊

碧霞元君廟在核桃園舊日核桃園尙有三義廟亦古刹今廟頽圯佛像已移於元君廟

中

太乙集仙觀在京西鄉馮家里元元貞元年以其地畀純一真人全祐全祐因以建觀  
阜成門在內城西之南清因明舊

夕月壇在阜成門外關廟壇制方東向一成方四丈高四尺六寸面整金磚陸四出皆白  
玉石各六級方壇周九十四丈七尺高八尺厚二尺三寸壇正東三門西南北各一門  
昔爲皇帝祀太陰之所

萬明寺在月壇東

慈明寺在北禮士路舊名驢市口

關聖廟在恩濟莊

九天廟在大營鄉今其地即名九天廟

報恩寺在亮甲店

天仙聖母祠在亮甲店

廣福禪林在白堆子

大悲寺在八里莊

寶塔寺在阜成門外殿前有塔高二丈餘計五層六面初名寧塔後改今名



慈悲院在阜成門西關大街清乾隆二十八年潭拓僧募建爲收養老稚廢疾之所  
衍法寺在阜成門外大道北今無存

慈慧寺去阜成門二里明萬歷間蜀僧愚菴建

永隆寺在阜成門城關外金源時建今已無存

西域寺在阜成門外俗呼三塔寺明宣德年建爲灌頂廣善西天佛子大國師茶毘之所  
今其地即名西域廟

嘉興觀在阜成門稍北而西北通白石橋

明惠安伯張公園在嘉興觀之右昔日牡丹芍藥各數百畝花時主人制小竹兜供遊客  
行花勝中園久廢

清查嗣璫詩花勝迢遞竹兜過百頃張園似錦窩四十餘年筋力盡主人看少客看  
多

歐羅巴脩士利瑪竇墳在白石橋西

慈壽寺在阜成門外八里莊明神宗爲慈聖太后建左有永安壽塔高十三級寺久圯塔  
尙存

宸垣識略稱寺殿後有九蓮閣內塑孝定皇后所夢授經九蓮菩薩像像爲菩薩跨一鳳而九首云

明陳萬言慈壽寺詩帝城門外剝舍衛國中臺初地三摩入慈宮萬壽開午鐘招雉雀夜雨積莓苔怪底花間客浮名逐夢來

清王士禎登九蓮閣詩憑闌試聘望遠近一寒林不見西山色蒼茫雲外深

摩訶菴在八里莊慈壽寺東明嘉靖丙午中官趙政建前後多松檜菴小而頗脩潔寺內舊有三十二體金剛經石刻今尙存

清王士禎遊摩訶菴詩西院枕迴溪青山滿高閣祇園天氣佳苔砌餘紅藥鳥如迦陵響梵是魚山作微雨急來過紛紛幾花落東院更幽絕蒼苔引深處修篁蔽籬欄風聲在高樹恍惚思舊遊繾綣未能去誰賦洞庭詩清如杼山句

清高士奇摩訶菴看杏花詩青郊路轉見芳菲日暖園林燕子飛別圃乍經山杏落僧厨新煮藥苗肥繁花舞蝶迎人面細草輕烟上客衣更向層台高處望千峯螺黛送春暉

法藏寺又名永慶禪林在摩訶菴右爲摩訶別院

明馮琦宿法藏菴詩妙諦聞龍藏清談過虎溪更從雙樹杪借我一枝棲法界心常  
淨名琴手自携曲終人境寂殘月竹房西

元福宮在摩訶菴西明正德年建今無存

慈育院卽碧霞元君廟在十里莊今無存

報誠寺在十里莊今無存

靈感觀音菴 寶華菴在田村今均無存

顯應寺卽皇姑寺在黃村比邱尼居之相傳明正統間呂尼諫阻英宗北征不聽被捶死

復辟後念之封爲御妹建寺賜額故俗呼爲皇姑寺云

清王士禎皇姑寺詩皇姑寺前風日晴畏吾村畔草痕生山桃堤柳自春色粥鼓鐘

魚非世情鐵券南宮憐將相黃沙北狩誤公卿獨慚叩馬輸巾幗天市星文幾夜明

清宋犖皇姑寺詩叩馬名高巾幗中斜陽幽寺帶芳叢黃沙翠輦當時恨畫幔雲旗

異代崇流水若教能納諫奪門奚事更論功淒涼尼子迎神曲不少人間烈士風

雙林寺明萬歷初大璫馮保營葬地造寺曰雙林雙林馮之別字也後西竺印度僧足克

戡古爾居之寺宇尙存惟已廢爲民居

清葉映榴雙林禪院觀荷詩勝侶尋幽剌芳筵對水張宿紅窺鏡影高翠捧珠光雨  
後人尤愛觴傳我亦狂相看塵土氣俱付碧雲鄉

清湯右曾過雙林寺詩高柳鳴蟬已到門小橋雨壞畫昏昏茶香一勺知新味鴻爪  
何年識舊痕乍落槐花秋夢冷自翻荷葉午風暄痴人未用痴相惜寶帶華纓一笑

論

神虎橋在雙林寺西二里橋有四石虎明萬歷中一虎夜逸遂名三虎橋

西直門在內城西之北清因明舊門外昔日修石道四十里直達頤和園今已易爲柏油  
路

高粱河在西直門外半里爲玉河下游玉泉山諸水注焉自高粱橋以上謂之長河

高粱橋在西直門外石道轉北有坊二

明朱茂昉清明日過高粱橋詩高粱河水碧灣環半入春城半繞山風柳易斜搖酒  
幔岸花不斷接禪關 看場壓處掉都盧走馬跳丸何事無那得丹青尋好手清明  
別寫上河圖

清王士禛小憩高粱橋詩昔日高粱道綺羅嬌上春依然挑菜渚不見採蘭人新水

生魚纈輕絲漾麴塵不妨成漫興青草正如茵

清張之洞高粱橋詩瓊瑰珂馬滿長堤水過高粱又向西月鵲風蟬都解詠神仙日  
日聽朝雞

高粱閘在西直門外迤北一里許元至元二十九年建名西城閘

巡河廠在高粱橋稍西今無存

廣通寺在巡河廠北元之法王寺也舊亦春遊勝地

慈獻寺在廣通寺西係明刹

極樂寺去高粱橋三里明成化中建近加修葺并補種牡丹海棠多株

清李慈銘上巳日禊盦招集極樂寺看海棠携霞芬同往是日大風花尙未開詩簪  
盞春明慰寂寥重三携酒欸僧寮風聲挾樹全趨水山色浮青欲過橋弱柳低垂留  
客醉好花遲發避人嬌年年不負尋春約又向高粱趁錦鑣

又李慈銘暮春偕鏡予至極樂寺看海棠是日霞芬携其婦治具於此賦詩二首鈿  
車相約鳳城西千樹猩棠映玉溪塔影遠從田水落山光不礙寺墻低似聞曲徑通  
鶯語早有遊蜂趁馬蹄花雨一鐘齋杵動午香吹到碧玻璃 花外行厨花裡人低

枝時見罽紅巾落英豔點弓鞞窄纖朶嬌侵鈿額新池上衣香經月醉酒邊鬢影一  
家春多情不奈東風劣長爲羅裙碾麴塵

又李慈銘暮春十四日伯寅孝達招飲極樂寺賞海棠詩見後

清張之洞極樂寺海棠初開置酒會客詩今日不雨明日復不雨白日能笑花能語  
今日不出明日復不出迴風舞雪隨黃土火急邀客城西去絳雷如珠點碧樹莫嫌  
來早香未齊猶勝繁枝逼春暮當年合抱二十株主僧說去花亦枯一株儼然似房  
老新叢稚齒門娟好憶昔上林未罷時侍臣下直尋春嬉五侯七貴來覓醉棋子方  
褥青螺卮即今遊賞雖蕭索靜晝晴光亦不惡那須銀燭按涼州巾履徘徊到日落  
秦翁白髮非少年心情猶逐春風顛手裂冰縑寫艷骨醉來輒就花陰眠

其日秦誼亭  
被酒離席熟

睡君不見定惠院宇今寂寥碧雞坊底生蓬蒿畫成題詩付老衲要令來者思吾曹

又張之洞極樂寺詩萬穗紅雲伐作薪且澆瓜菜作僧珍凌霄無骨高三丈留待孤

行再到人

蓋清末海棠已枯  
備殘荷尙存藥注

天然博物院舊名萬牲園在西直門外西南二里許爲三貝子花園舊址清末設

清李慈銘暮春十四日伯寅孝達招飲極樂寺賞海棠酒畢復同遊三貝子花園詩

窮居不知春事至，亂書牀上雜堆置。滿庭積潦草不青，老槐盤婆乏生意。一昨街頭聞買花，典衣諧價鄰人譁。丁香紅杏亂栽插，短牆隙壤紛矢斜。侍郎好花復好客，南皮公子興尤劇。招邀共探蕭寺春，詩賭百篇酒一石。驅車爭出西直門，平疇萬綠開晴暎。青山婉孌向人笑，恍然身到江南邨。高粱之水玉河抱，翠色春陰接瓊島。時聞流出宮中花，浴鴨遊魚滿青藻。林陰梵宇沿流開，雜花千樹環講台。諸天色相現長晝，石幢雲采繽紛來。所惜海棠獨遲發，火急綠章奏何迫。坐失華鬢絕代姿，不遣紅妝勸浮白。董侯戎旃行入關，秦老酒半頽玉山。人生行樂那可極，看花幾度凋朱顏。隔湖灌木何王邸，亭館半傾花石徙。追涼池上林風長，暮靄遙隨晚鐘起。僕夫催返行躊躇，清遊不足留畫圖。城東歌舞列紅燭，豈知世上春光徂。

黃節萬生園賞菊呈節庵先生詩及秋來共賞花，尊已過重陽。花始繁，草木自榮霜。後氣澤陂能納國，中暄坐娛光。景宜吟醉暫，絕風埃得晤言。不似昔年詩社日，追陪重關抗風軒。

又黃節九日遊萬生園坐幽風堂作荷枯菊晚柳芸黃坐負佳時守，此堂西上一樓。凌磴道旁羅萬樹，對迴塘曾波已止。猶歎逝四海無歸，可望鄉意與水禽。秋浴淡不

憑高處過重陽

白石橋在西直門西里許舊有明萬駟馬白石莊亭榭古木爲附郭園亭第一今遺跡已

無可考

明劉榮嗣白石莊詩仙圃宜秋色相將戀夕曛松青新濯雨槐古舊侵雲竹牖池光

合山亭石翠分鳳簫遺韻在擬向月中聞

延慶寺即延壽菴在白石橋西二里許

廣源圃在西直門西七里元至元二十六年建傳謂清慈禧太后駐蹕頤和園時常於此

易舟泛昆明湖入園

萬壽寺在廣源圃西數十武明萬歷五年建殿宇極宏麗舊有華嚴鐘擊之聲聞數十里

清乾隆十六年移之於城北覺生寺焉寺今改爲佛教會

明朱國祚萬壽寺詩貝葉三車少華鐘萬石餘聲仍到長樂地合置精廬瀟灑入王

界莊嚴學士詩秋來霜落後流響更何如

萬壽寺西有長衢列肆北達暢春園名萬壽街俗稱蘇州街久廢

清魏之琇詩樓館青紅百貨俱水村山郭似姑蘇小人近市真堪羨翻作人間大隱



圖

昌運宮初名混元靈應宮在廣源關之西南里許明正德六年司禮太監張永建

清查慎行昌運宮詩老鸛巢占枝虛廊交冷翠淒涼前代塚傳是張常侍煌煌元老  
文苔蝕仆碑字賜域滿西山斯人或無愧

興勝寺在昌運宮西明萬曆中建今已無存

清查慎行興勝菴看杏花詩幸是韶光處處同勝遊隨意轉芳叢別開香界松林外  
遙指烟村杏社東黛色濃添三面綠日痕微減一分紅只須十步凌丹閣多少花頭  
在下風 及記當時載酒遊舊題幾壁拂塵留重隨客到僧猶識不待人言我欲愁  
牧笛聲中芳草路鞭絲影裡夕陽樓花開花謝年年事豈料傷春易白頭

三疇庵在半壁街相傳爲明代舊刹

廣仁宮碧霞元君廟在藍靛廠麥莊橋之西俗呼西頂

關聖廟在廣仁宮東清乾隆二十一年修

自怡園在海淀爲清大學士明珠別墅久廢

清查慎行過相國明公園亭詩名園多在苑東偏不數樊川及輞川綺陌東西雲作

障畫橋南北草舍煙鑿開邱壑藏魚鳥勾勒風光入管絃何似贊皇行樂地手栽花木記平泉 毬塲車埒互相通門徑寬閒五百弓但覺樓台隨處湧不知風月與人同紫駟臥草平沙外白馬穿沙細雨中一片近郊農牧地可容雞犬識新豐

暢春園爲明李武清侯清華園在海淀大河莊之北隸垣一千六十丈有奇清聖祖因其舊址改建錫以暢春之名因其在圓明園之前故又名前園咸豐十年八月二十二日爲英法聯軍所燬

清華大學在清華園爲清末美國退還庚子賠款所立

圓明園在掛甲屯之北距暢春園坐許爲清世宗藩邸賜園亦於咸豐十年爲英法聯軍所燬

暢春圓明兩園爲清代苑囿最華麗者同治年間曾擬修復以紙胎仿照舊日建置作有模型後未果修模型現存故宮博物院中

圓明園附近舊日尙有長春園法慧寺慧福寺善緣菴泰山聖母廟今俱無存  
澄懷園在海淀爲清大學士張廷玉賜園久廢

清沈德潛遊澄懷園詩名園水木互潏洄地近離宮絕點埃虞褚並官親禁掖鄒枚

分宅住樓台荷風入座香難散鷗侶依人夢不猜行到苑牆遙指點此間合稱小蓬萊

燕京大學在海淀其一部爲朗潤園舊址

覺生寺在曾家莊清雍正十一年建乾隆間移萬壽寺華嚴鐘懸於寺內故俗又稱大鐘寺

清沈德潛覺生寺大鐘歌牙角鬚鬚蟠老龍色相古黝兼青紅旋蟲蟻踞列衆獸旁  
羅鬼怪諸姦凶重逾萬石更萬石漢高廟器將毋同金泥傳自明永樂遷都北地仍  
燕封廟社既建鼎呂定次及梵宇成華鐘道衍監造役鳧氏數倍仙掌鎔金銅彌陀  
華嚴誓全部沈學士皮筆葳棱鋒懸之傑閣入雲表六僧舉杵齊撞春當年燕飛啄  
孺子南兵百萬爲沙蟲抄連瓜蔓凝碧血旣延赤族鋤羣忠憑仗佛力消黑業趨趨  
聲徹天門重恒河沙數至無算火燄滅燧刀輪空從來王者貴不殺豈緣象教尊禪  
宗神孫更創萬壽寺大璫勢力移其中熹宗以後委諸地龍臥沙草雲難從熙朝郭  
西建寶剎重樓複閣棟宇隆錫名覺生代木鐸警醒憤憤憐愚蒙鐘從廢寺徙新構  
萬牛回首駢徒工鯨鯨鳴整課誦響遠長樂隨天風我來郊原訪林麓一徑委折

趨靈宮諦脉古蹟決雙背偉觀一豁平生胸因思鷄鳴埭西北巨鐘蝕土眠高蓬摩  
挲永樂二年鑄兩地禱福邀天功一鐘淪棄聲久啞一鐘叩擊驚頑聾蒲牢亦等遇  
不遇何況士類分雌雄獨惜大鑄置佛地虛無祇伴金仙蹤今皇崇道講經學鴻都  
觀禮來耆童始終條理藉法物曷不輦載歸辟雍於論於樂頌聖德相和繼鼓聲達  
達

昆明湖舊名西湖景爲玉泉龍泉所潄此地最窪受諸泉之委匯爲巨浸土名大泊湖環  
十里清乾隆癸亥命加疏濬開拓周四十里命名爲昆明湖堤上有廓如亭亭北有崑  
崙石其旁范銅爲牛背鐫清高宗御製金牛銘

甕山在京城西三十里昆明湖當其前清乾隆十六年更名爲萬壽山清漪園在其山麓  
甕山相傳有老父鑿石甕上有華蟲雕刻文中有物數十種悉爲老父携去置甕於山  
之西留讖曰石甕徒貧帝里明嘉靖初甕不知所在嗣是物力漸耗云

清朱彝尊詩石甕久已徙青山仍舊名去都無一舍已覺旅塵清

清查嗣瑛雜詠詩少禹仙家久結鄰帝城佳氣有金銀誰移寶甕他山去從此三街  
九市貧

頤和園清德宗爲頤養慈禧皇太后就清漪園舊址所建較舊園拓大數倍以私挪海軍經費脩建致遭甲午之挫論者謂爲清亡之禍根

王嶧山同學桐齡弔頤和園詩海軍經費造離宮畢竟慈禧計劃工軍艦紛紛沒黃海離宮依舊在寰中

園門東向前有照壁入園門爲仁壽門內爲

仁壽殿南向殿後爲

德和園內爲

頤樂殿殿前爲大戲台仁壽殿西爲

玉瀾堂堂西爲

藕香榭堂北迤西爲

夕佳樓爲清德宗在園幽囚之所遺跡尙存

樓前而臨水後面廂房屋內橫砌磚牆以塞之防其逃逸

堂後爲月樓映日再

後爲烟霞獻彩最後爲宜芸館由玉瀾堂沿湖而西爲

樂壽堂堂前院中有巨石一名青芝岫爲米萬鍾奇石之一堂前爲水木自親沿湖再西爲長廊廊內數十武即有一座落日留住亭曰對鷗舫曰奇瀾亭曰秋水亭曰魚藻軒

曰清遙亭折而北曰石丈亭亭西爲寄瀾堂堂側湖內有白玉石造一火輪船名清晏舫俗稱石舫其後爲荇橋

長廊之北東起爲

養雲軒軒西爲

無盡意軒後爲意遲雲在再西爲

寫秋軒軒前爲國花台園中牡丹舊以此處爲盛今已一株無存又青芝岫旁舊有翠柏

兩大株葱翠可愛民國初元尙及見之其後不加愛護亦早枯死

沿長廊而西爲

玉華殿殿後爲

介壽堂沿廊再西則爲

排雲門內爲排雲殿門前臨湖有坊榜曰雲輝玉宇排雲殿在園正中昔爲慈禧太后所

居今其畫像尙存殿中

排雲殿後爲

佛香閣爲園中最高處閣左爲轉輪藏右爲五方閣後爲

古者遊山詩曰  
卷一  
智慧海

過排雲門沿長廊而西爲

雲錦殿殿後爲

清華軒軒西爲

山色湖光共一樓樓後爲邵窩爲雲松巢爲貴壽無極再西爲

聽鸞館館後爲畫中遊

入仁壽門折而北進赤城霞起爲

諧趣園西向園外登山而西爲

如意莊西上爲樂農軒再上爲益壽堂再上爲景福園

由石舫沿湖而北爲臨河殿相對爲穿堂殿爲斜門殿爲小有天爲延清賞樓再北爲

貝闕

元丞相耶律楚材墓在真壽山南麓頤和園修園時將其塚圍入園中塚甚大建屋以覆之在仁壽殿之南

明王嘉謨耶律丞相墓詩丞相遺邱湖水陰荒榛野草自蕭森亭前瀑布搖空穴雪

後寒禽啞大林慘淡尙思戎馬日艱難深仗哲人心雲龍鶴鶴眞餘事獨弔空山淚  
滿襟

清王士禎詩石甕山頭歸片雲望湖亭上倚斜曛紙錢社酒棠梨道誰到湖邊耶律  
墳

清查嗣琛雜詠詩隨身短鐻埋何用誓墓殘碑柱瘞銘丞相頭顱曾出土莫效翁仲

怨流螢

耶律丞相墓前翁仲天啟七年夏夜有螢火千百  
集其首七人譁爲石人眼光掣屣共踏而碎之

青龍橋在萬壽山西五里元明白浮堰之上流也其西通金山口其北斜界百望山

清查慎行青龍橋詩甕山西北巴溝上指點平橋接碾莊自整清渠成石碣盡迴流

水入宮牆殘荷落鱗魚鱗活高柳飄絲鷺頂涼不礙蹇驢行蹇蹇有人緩轡正思鄉

過金山口數里有谷頗幽邃上坡三里許度大壑又三里許爲

寶藏寺明正統四年西域僧道深建清內監張某重修寺側爲迴廊數十間頤和園景全

在望中

畫眉山由金山口度嶺自冷泉村泰州務後卽是山產石黑色浮質而膩理金宮用以畫

眉故名



黑龍潭在畫眉山有龍神廟清代遇旱時常於此祈禱雨澤

溫泉在黑龍潭之西昔爲寺今改爲飯店

玉泉山在萬壽山北青龍橋西金章宗建行宮於此元明以來皆爲遊幸之所清康熙間加以修葺名

靜明園

玉泉山以泉名泉出石罅瀦爲池廣數丈水清而碧細石流沙綠藻紫荇一一可辨民國二十年後泉源淤塞非復舊日之澄澈矣山頂舊爲金行宮芙蓉殿後就其故址建一塔可以登眺山陽噴泉處有清高宗御書玉泉趵突四字碑爲燕京八景之一

元王惲遊玉泉詩峰頭亂石鬪嵯峨水底浮光浸碧霞絕似蘇門山下路惜無修竹與梅花

明劉大夏玉泉道中詩晚來聯騎踏晴沙風景蒼蒼一望遐幾處白雲前代寺數村流水野人家鶯啼別墅春猶在馬到西山日未斜回首不知歸路遠九重宮殿隔烟霞

清宋犖玉泉詩清泉噴薄散瓊珠咫尺流爲裂帛湖常道寒淙穿大內新開水殿仿

三吳烟霞窟宅天留勝楊柳汀洲畫不殊森森恩波閱極目願同黃鶴一露濡  
龍王廟在玉泉山麓廟據泉上淳泓方廣數丈湧泉如珠名裂帛湖  
裂帛湖泉源仰射如珠串古榆蔭潭上極幽秀

清王士禎裂帛湖詩裂帛湖光碧玉環人家終日映潺湲分明一幅蔡侯紙寫出湖  
南千萬山

清朱彝尊詩裂帛湖流兩岸平柳陰風暖燕飛輕年光冷笑長安客開徧山桃不出  
城

清查嗣琛裂帛湖詩石迸珠光碎風磨鏡面平若教褒女聽應愛此泉聲

呂公洞在玉泉西二里觀音寺依山入門有洞深廣二尋亦曰觀音洞相傳呂仙憩此  
而去故名

清查慎行呂公洞詩只道山窮水亦窮忽攀石磴與雲通芙蓉殿底三重閣楊柳橋  
南一面風老去文人多入道從來絕境必凌空知君欲傲長江簿佛號曾呼禁苑中

玉泉山昔日尙有上下華嚴寺香岩寺

即玉峯塔影爲靜  
明園十六景之一

法雲寺諸勝今皆頽圯澡水亭

在玉泉山麓爲清明珠別墅其子成德嘗於此着大易雋義粹言今遺址已無可考

西山在北平城西三十里爲太行之首

宸垣識略謂西山諸蘭若白塔無慮數十與山隈青蘿相間流泉滿道或注荒池或伏草徑或散漫塵沙間春夏之交晴雲碧樹花香鳥語秋則落葉飄丹冬則積雪凝素信足賞心而雪景尤奇云

元許衡別西山詩大山如蹲龍小山如踞虎烟嵐鬱蒼翠遠近互吞吐我來薊門居遨遊成樂土策杖望朝雲卷簾看暮雨佳意豁塵腥勝概入談塵使我鬱陶消使我癆瘵愈生平鄙吝心一洗出千古回首聲利人何殊坐圜圜遠役非素懷况有跋涉苦吟鞭曩東風遲遲如去魯芳菲二三月追遊盛梅塢歸來願無違一觴期對舉

明李東陽西山詩日日車塵馬足間夢魂連夜到西山近郊地在翻成遠出郭身來始是閒雲裡盪胸看縹渺溪邊洗耳聽潺湲秋風忽散城頭雨先爲遊人一洗顏下馬溪頭散步行暑風絲綉入林清村肴野飯匆匆發碧水青山面面迎踏盡平隄憐綠草到來幽谷見雲生西湖勝事年年別幾日愁多不出城半嶺香臺石徑斜懸空縹渺散天花新開塔寺雄西郭舊賜經幢出內家避暑亭前泉帶雨回龍殿下水明霞太平天子閒巡幸頭白山僧誦法華

清陝元龍曉望西山詩春城景融融風日喜朗暢凌晨試憑眺使我心目曠鳳闕高  
嵯峨歷歷皇居壯西山峙其右勢若列屏嶂天青沆瀣合氣暖露華釀草樹鬱葱蒨  
巖嵐分背向朝霞淡猶明初旭露未上或時紫嶙峋或時青泯淥或時見山腰登靜  
却塵埃或時露峯頂微茫翳雲浪名勝杳難窮變幻不可狀神工蓄雷雨岩穴含寶  
藏千秋衛帝京環拱屹相向臥遊致足樂時來一騁望

清宋至西山道中詩鶯花三月漾春暉杏子開殘桑葉肥廢寺尋來碑半仆斷橋行  
處柳成圍抽芒小麥翻新浪掠水輕鷗鬪素衣望裡諸峯圖畫好吟鞭早喜謝塵鞮  
香山因香山寺而得名寺爲金大定間建歷代均加修葺清高宗時易名爲靜宜園舊有  
座落五十餘處有二十八景有清末葉大半傾圮民國元年喀爾沁王向清室請領創  
靜宜女校六年熊秉三總理希齡更設慈幼院欲以山之收入爲學校經費遂將山地  
出租任人建屋當時貴紳大賈先後擇地建築別墅雖不能恢復舊觀然亦少爲名山  
點綴而掩其頽殘痕跡矣

籍忠寅騎驢遊香山一周詩無盡清泉萬古流白雲不動千山秋偶隨雲影依依駐  
更戀泉聲緩緩遊遇樹低時頻屈背到峯高處屢回頭穩乘驢背登臨遍不必層巖

起石樓

瀑布崖在園門內左偏過石橋有小瀑布故名

瓔珞崖由小瀑布循大盤道而南兩旁松柏蒼翠不數武即爲瓔珞崖崖並非天然乃人工叠砌而成者

知樂濠在瓔珞崖至香山寺橋下昔爲寺放生之處今已平爲兩小池

雙清別墅舊名清勝境今爲熊氏別墅爲全山最佳處院之北端有二泉環繞院中泉甚清澈故名雙清

由雙清再上爲

香山寺今改爲香山飯店

清王士禎香山寺月夜詩明月出東嶺諸峯方悄然殘雪尙在地掩映西齋前竹色  
既閒靜松陰媚淪漣清暉一相照萬象皆澄鮮此時憩寂者宵分猶未眠

清宋琬宿香山寺詩黛色西山好年年馬上看茱萸逢九日樓被宿層巒拄杖松杉  
暝吹笙殿閣寒五陵回首處霜葉萬楓丹

由香山飯店折而東經無量殿來青軒中間有一過街門樓其上有一亭曰半山亭乃

就香山

來青軒在采

清施門

壁靈泉

清朱壑

樹幾書

由半山亭

闔風亭

由闔風亭

森玉笏爲一

由森玉笏

朝陽洞

由朝陽洞

由西山時

梯雲仙館爲南通張季直別墅

重翠崦爲莊樂峰別墅

玉華山莊爲上海劉氏別墅

芙蓉坪爲周作民別墅

由芙蓉坪而東爲

昭廟今爲紅十字香山天然療養院

由昭廟而東爲

見心齋庭中有一大水池正中水榭三楹三面繞以迴廊廊外松柏參天爲園中最幽勝處

玉乳泉在芙蓉坪西松柏茂密中一大石窟貯水常滿今水已涸蓋其上源被人截取之故

西山晴雪碑再上之極高峯傳爲清高宗重陽登高處舊名重陽亭并無亭僅於重陽臨幸時張以緞幄而已今土人呼其地爲

鬼見愁言其高也

眼鏡河在見心齋東南河之兩旁瀦爲池如眼鏡然故名

蟾蜍峯在雙清之南有巨石形如蟾蜍故名

園之東南隅山頂上有一亭曰

看雲起登此可瞰園中全景

絢秋林本在玉乳泉西山坡上今則寺之西南兩山坡櫓樹最多深秋時燦爛如錦最爲美觀可謂新絢秋林矣

狼兒澗在香山東四里許

明謝榛狼兒澗歌狼兒澗東扶杖行石工斧鑿無停聲太古樓身祇巖穴軒皇之後多有營漸傷元氣非今日三代相因棟宇成石工死石工生天地不老青山平

碧雲寺在香山西規模宏大爲西山諸寺之冠元耶律楚材之裔名阿利吉者捨寺開山淨業始構至明大璫魏忠賢擴而大之奢侈逾恆有五百羅漢堂十殿閻羅最高處五塔矗立今五塔及羅漢堂尙存相傳魏闖欲以爲葬地後不果而其徒竊以衣冠葬焉

民國十四年孫中山先生病故舊都曾停柩此寺

魏闖衣冠墓清康熙中御史張瑛奏請鑿平

籍忠寅雨中遊碧雲寺塔詩難逢山在雨中看病裡登臨分外難莫笑三年牀上客



今朝誰與我齊肩 烟嵐漠漠雨濛濛頃刻陰晴已不同窺見青山纔一半半山還在白雲中

玉皇頂在碧雲寺東北山腰中寺雖小頗幽夔今亦賃與天然療養院

籍忠寅登玉皇頂遠眺詩溝塍如罨水如鱗花眼疑看小字文萬壑千山明忽暗舉頭東北起烏雲

萬花山在碧雲寺之東僅一土阜有廟數楹殿供娘娘座旁一肉身童女名萬花聖母傳謂八歲坐化云

臥佛寺在碧雲寺之東傳爲唐時所建名兜率元名昭孝明日永安清雍正間改名十方普覺寺殿前娑羅樹二株後殿銅佛身長丈餘以手支頤而臥傳爲明憲宗時所造

清王士禎臥佛寺詩清晨越南磻畢景來東林石徑入幽闕稍聞鐘磬音禪房鴨脚古別院杪樞陰春夕月復佳微雲滅遙岑山氣自翳鬱天宇亦森沉道人淡相對松風灑衣襟夙懷清淨退因識妙明心寂寥無可說請君張玉琴

清朱彝尊臥佛寺詩路入晴雲北山欵臥佛前津梁疲已甚土木意能傳夜續林中磬春流枕外泉長安車馬客輸爾只高眠

退谷在臥佛寺右今爲周養庵先生肇祥別墅

臥佛寺附近舊有觀音堂隆教寺五華寺廣泉寺圓通寺太和庵廣應寺諸寺觀今皆廢圮

法海寺 法華寺在萬安山相傳爲弘教寺遺址清順治十一年修建改今名

晏公祠在弘教寺旁明正德中晏常侍忠建以祀孔孟諸聖賢及周程張朱諸大儒設五石龕以藏五經并建亭陳鐘簴千戚錢鏹弁裳之屬堂後累石爲洞洞壁標先儒格言及詠道詩詞仍以一僧守焉久已廢圮

弘教附近舊尙有梵香寺長齡寺寶誦寺寶相寺翠微寺龍泉禪林滕公寺諸寺觀今遺跡已無可考

門頭村在靜宜園東南二里許以其地爲西山門徑故名

西禪寺在門頭村東小屯村明正德年建

清查嗣琛小屯村詩萬頃綠楊烟波光暖接天分明兩堤水只少是湖船

循萬安山山趾而南有盧師山與平坡山亦名翠微山今人謂平坡翠微各爲一山者非並峙諸寺鱗次

以八剎最有名故俗稱爲八大處

盧師寺卽證果寺在盧師山以神僧得名寺西南隅卽秘魔崖爲師晏坐處寺元泰定三年建明正統中更名清涼寺成化間改今名

相傳師於隋仁壽中居崖數歲有二童子來謁師曰大青小青願侍師不去時大旱所司徹禱兩童子白師爲注一方乃知大青小青爲龍崖側塑二童子侍師像崖上一柏產石面幹甚矮不凋不榮傳是師所手植

明郭武雨中宿清涼寺詩遠來禪境宿深在濕雲層路險無人跡堂空有佛燈共聽青嶂雨對坐白頭僧話久何曾睡聞鐘客又興

清王士禎盧師山詩盧師夙昔經行地惆悵蒼崖古木風最憶深秋飛瀑下四山寒葉亂流中

清朱彝尊盧師山詩盧師說法已千霜石上松猶四尺強我亦曾尋二龍子夕陰點筆在莓墻

清宋舉盧師山歌塵跡卻掃尋名山渾如涸鮒投長川特訪盧師徑榛莽欣從法界相周旋惟師初自江南至扁舟容與凌重淵舟所止處便趺坐卓錫闢地茲山巔至今古洞留短柏還看繞座開青蓮左右二龍爲弟子行雨想像騰蛟始知是物具

佛性豈有達士譏參禪孤亭俯礪樹森立黃棟初發榆飄錢我來駐屐一長嘯鋪茵  
愛聽松風眠遠望麥畦作翠毯空天明滅飛鳥爲人生有涯樂且樂奚取白髮恆憂  
煎况我少無適俗韻每於邱壑求安便竟須誅茅隨衲子挹泉嚼蕊心陶然那能苦  
戀太倉米踟躕轅下嗟年年

秘魔崖在盧師山證果寺旁大石嵌空幾二丈下臨絕壑傳爲盧師晏坐處

清王士禎觀秘魔崖至龍潭詩山行逐藥若逕轉無人跡亭午逾高嶺道遙隨所適  
古寺披荒榛乍到如有獲盧師晏坐處猶存澗邊石石上留孤松終古不盈尺地僻  
山鬼隣鳥下蒼苔積孤閣臨寒溪林壑莽蕭槭灌木紛相糾陰崖互崩坼何當秋雨  
時驚湍若朝夕來此十日眠濯足蛟龍宅

清查慎行秘魔崖古柏詩連岡東北轉鬼物托幽秘瞰空飛一片石縫舒右臂老鴉  
含柏子偶向駢母墜飛泉難仰流長此攀拳翠相傳閱千載僅可二尺許勒龜誘佛  
力此語吾所鄙猥蒙雨露恩竟負栽培意兒童斤斧脫大匠棟梁棄寧非干霄姿吁  
嗟守憔悴

清寶廷遊秘魔崖詩我遊滴水岩造化駭靈怪茲岩雖低小奇險亦足愛凡物貴越

俗成器豈在大頑石空萬丈塊然晒荒穢

又寶廷癸未秋季重遊秘魔岩詩夏遊水未來秋遊水已往觀瀑愧無福勝概徒夢想凡事貴未得留取再遊賞

又寶廷詩奧區聚靈秀祈雨久傳聞倒控千年樹橫拖萬丈雲腥風枯石骨凍雪斷苔紋獨據西山勝標奇迥出群

清翁同龢秘魔岩懷寶竹坡詩衰衰中朝彥何人第一流蒼涼萬言疏悱惻五湖舟直諫吾終敬長貧爾豈愁何時霜葉下同醉萬山秋

清陳寶琛秘魔岩感懷寶竹坡師詩滄海橫流事可知秋山惆悵日斜時貞元朝士凋零盡冷落懸岩數首詩

清鄭孝胥秘魔岩下讀竹坡先生題詩作腹痛前朝寶侍郎來尋遺墨耐思量猶留孤女非無後縱識門生亦可傷士氣幾時成黨錮弢翁垂老自靈光翠微此日仍重九試掬愁腸問彼蒼

清林紆遊秘魔岩觀偶齋師詩愴然爲題其後題名忽及偶齋師漢上如臨墜淚碑八口寧忘泉下痛廿年猶泚壁間詩豈無風概宗先輩忍對滄桑話盛時日晚商量

校遺草門生亦感鬢邊絲

香界寺舊爲平坡寺在秘魔崖西名翠微山寺山因平坡寺故亦名平坡山寺創於唐明  
仁宗時易名圓通清康熙十七年重修改名聖感乾隆十四年易今名

寺左有行宮爲清帝臨幸處殿宇尙完好廳中懸有清高宗御題扁額

明姚廣孝題平坡寺詩平坡杳杳挹西湖徑斷樵行敗葉鋪泉落石河深愈急雲歸  
沙樹遠疑無夜堂風靜紆帷幔曉井霜寒響轆轤那得餘生辭世網捲衣來此坐踟  
跌

清王士禎翠微寺詩澗西翠微寺迢迢翠微裡蒼茫採樵路似有微鐘起山風冷吹  
烟斜日亂溪水紛紛飛鳥還行人去何已

清宋攀翠微寺詩一徑穿林樾看山向翠微松門過微雨塔院得清暉絕壁蒼松掛  
閒階碧篠圍老僧辦粗糲知我澹忘歸

清高宗題香界寺詩西山至此更無山故是以當結局處南臨平野千里餘北鮮林  
鬱蔽太素我詣精藍禮佛罷山齋雖小足清趣窮月何須百尺樓因迴爲高萬景赴  
夙聞聖感結遐想不見雲窺見烟樹今朝峯幌俯帝畿瀛海蓬山如筆露因知見不

貫拘墟天高鑿卑理則固

寶珠洞當山之翠微處洞深廣丈餘洞石黑白點滲之如珠故名中供肉身坐化和尙名海岫禪師俗稱鬼王菩薩

龍王堂在寶珠洞山右有泉甚甘階下鑿方池以蓄之池畔舊有一松甚茂高逾重樓惜於民國廿二年爲風所折前英使朱爾典每歲必居此避暑

清端方己巳重陽遊龍王堂詩初過雙十又重陽菊綻東籬晚節香此日登臨來絕頂相逢良友盡俠腸風吹落帽傳佳話樽酒言歡聚一堂且喜良辰風景好管他人事幾滄桑

清聽泉小榭鋤月老人甜水歌我來翠微陟其巔上有古剎名龍泉松柏鬱鬱布濃蔭千尺百尺森參天蒼皮黛色四十圍虬枝盤曲生風烟四時不放日光入盛暑不熱風冷然誰鑿石罅瀉石髓涓涓汨汨流清泉蓄以方池承以石跳珠憂憂鳴琴弦汲來烹茶香且冽調羹炊黍味彌鮮或曰飲之令人壽揆之於理宜有焉笑我飲此嗜而貪自夏徂秋常流連隆冬畏冷返廬舍忽思此水口流涎輕塵十丈風怒吼京師苦水鬻論斗安得移此一勺泉甘美芳馨潤衆口

大悲寺在龍王堂東舊名隱寂寺清康熙年間改今名

寺有凌霄一架殆百餘年物着花甚繁石階兩旁有黃竹兩池幹粗逾寸

靈光寺在翠微山寺剏於唐大曆間金易名覺山寺明成化二十五年重修改今名清光緒庚子之亂燬於八國聯軍聖安和尚發願重修二十餘年始竣工有民國十二年重興靈光寺碑

寺之西院西北角有一石洞有泉出焉匯而爲池池內畜金魚甚夥大有逾二尺者遊人每投以餌嗚呼之輒率群而來毫不畏人名金魚池亦名蓮池

金魚池上一亭名水心亭亭內有清譚學斐詩額

池北有屋五楹名歸來庵爲清端午橋方被議後所築壬壬秋先生閩蓮爲題楹聯云田園松菊豈無意魏闕江湖同此心今尙存

魚池東南隅舊有塔高數十級燬於聯軍後由徐敬宜捐資就其基建一亭徐菊人先生世昌爲命名咸雍以其舊日之塔本遼咸雍年所建也塔下有娑羅樹一株

清譚學斐古歌翠微八大刹靈光居其一翠微非山亦非僧乃是元朝公主化生物公主誕生大蔡時號爲翠微美容姿奈何天年竟不永葬身乃在山之湄山以人得



名此寺所從出勅曰靈光動帝顏人乎寺乎期不滅靈光何所有寶塔峭壁峙其中  
呼吸烟霞插天起塔頂下有十三重其他靈貺皆後出石泉鑿下非前功歷明迄滿  
清廟勢益式廓山僧坐化塚壘壘物力人血互相錯無何庚子禍變生匪團嘯聚勢  
縱橫盤據此寺觸夷怒千百年物付一轟佛其無知耶香火歷已久佛其有知耶無  
以殲其醜大抵景物有廢興歸諸造化佛何有僧人聖安子覺悟若性生平昔念佛  
不絕口住持此寺挾萬能當時抱大願興復靈光寺朝醮萬錢夕計工西竺神道有  
如此我來寺復立爲我下榻迎回首昨遊十年事而今又作翠微行陟彼翠微山不  
識翠微面青山猶是白骨非我吟此語重續絕

魚池南端由石道西上約三數丈爲舊韜光菴今名潛廬爲徐敬宜別墅

三山庵在靈光寺後創建年月不詳

寺內大殿廊下有石一方上有花紋如水雲然故名水雲石

對大殿一楹供木雕關公武裝立像甚精美傳係明代物

長安寺在盧師山下西南平地上明弘治年建寺中有栝兩株甚古

西山飯店在翠微山麓

天然療養院在虎頭峰北

八大處以離城較近民國以來交通日便故都人士來此營別墅者甚夥計有二十七處之多曰

益壽園爲益壽醫院院長虞誠別墅

方園爲首善醫院院長方石珊別墅

王家花園爲王金鈺別墅

蘭谿別業爲西山飯店主人趙谿隱別墅

虞氏別墅爲虞和卿別墅

劉氏別墅爲劉敬輿別墅

洪氏別墅爲洪鑄生別墅

幻住園爲葉譽虎別墅

友山園爲路氏別墅

靜園爲沈默齋別墅

堆雲山莊爲史俊民別墅

青廠爲阿利幹教會所建

孫氏別墅爲孫某別墅

袁氏別墅爲袁滌庵別墅

王氏別墅爲王儒堂別墅

宋氏別墅爲宋發祥別墅

滴翠山房

孫氏別墅爲中孚銀行孫某別墅

夏園爲夏仲衡別墅

柳溪山房爲田明志別墅

救世軍別墅

鍾氏別墅

錢氏別墅爲錢俊驤別墅

陳氏別墅

王氏別墅爲王孟群別墅

馮氏別墅爲馮故總統公子別墅

由秘魔崖三叉口度西嶺折而北舊有

善應寺有清龔鼎擎碑寺內四松最奇門列天兵十狀極詭異廡下有五百羅漢又有昌化寺壁有明吳小仙所繪五百阿羅漢穿崖渡海神通遊戲窮極怪詭今二寺均無存嘉禧寺在方氏別墅之東

明朱國祚嘉禧寺詩山門圍作化人城榆柳陰濃信客行始信精廬風日好秋深猶

綠牡丹坪

獅子窩在秘魔崖北青龍山上有寺曰

福慧寺爲明之太平院清同治間由劉張張三內監購而有之建築宏麗舊日東面有長

廊凡四十八間後傾圮深秋時紅葉至美

天太山在翠微山西北有寺曰

慈善寺後殿供肉身坐化和尚俗稱魔王菩薩和尚相傳卽清世祖龍旁懸一黃綾寫詩

寺僧謂爲世祖遺蹟惟詩語過於顯露恐爲後人所僞託

萬壽寺卽戒壇寺在馬鞍山唐武德中建曰慧聚明正統間改名萬壽寺有傳戒壇遼咸

雍間僧法均始開明正統中勅如幻法師說戒寺中立壇焉

寺中古松甚多舊有活動松其樹終日搖動故名松久枯死惟清高宗御製詩碑尙存又有九龍松爲一白皮栝一樹九幹故名九龍

清施閏章宿西山戒壇詩清境歷懸磴飛塔浮雲端桂旗時上下百靈集丹壇舉首見宸翰光怪生林巒入門二松石匝地雙龍盤攫拏廣庭隘憂拂青天寒谿訝有崖洞迢遞穿巉岼不知客行疲但惜春風殘移觴未敢酌高望生清歡精廬坐山月誰解棲長安

仰山棲隱禪寺金大定間建元泰和中萬松老人曾住持此寺

滴水巖在黃牛岡  
金章宗詩金色界中兜率景碧蓮花裡梵王宮鷄鷲清露三更月虎嘯疏林萬壑風

清朱彝尊黃牛岡詩亂石侵花當奔沙擁樹根黃牛岡上月橫笛過前村

大雲寺在西山萬峯之巔最高

岫雲寺卽潭柘寺在羅喉嶺平原村去京城西北九十里晉曰嘉福寺唐名龍泉燕人諺曰先有潭柘後有幽州此北平寺觀之最古者

寺內倚松齋延清閣漪珩亭皆昔日皇帝臨幸憩息之所

嶺西叢棘中一道仰天如線可五六里許頰山四合古栢絕壁復里許山開九峯寺在其間山故海眼佛殿基即潭也唐華嚴師在山說法龍王施潭爲寺一夕潭成平地今潭徙而涓涓者不絕栢久枯僅餘尺許護以鐵絲網

殿中供二蛇名大青爺二青爺藏小龕中號護法龍王出沒無定

清施閨章潭栢寺詩良遊欣素侶越嶺騁幽暇眷茲雲外峯塵嬰策駕緣階瀉碧泉古樹臥殘栢舊聞此海眼真僧奪龍舍靈蹟信有無蜿蜒見猶乍陽塢竹還青春渚梅未謝棲宿偷岩扉潺湲響清夜

黃節宿潭栢寺與同遊諸子拈韵分得佳字詩勞踪不補平生事博得緇塵汗六街獨對西山尋晚約要令今夕屬吾儕曾知花徑因誰掃未寤茅庵此處佳涼月疏星試回望宣南燈火夜無涯

雀兒菴在潭栢後山五里相傳金章宗幸此彈雀彈無虛發即行幄爲菴名雀兒云

百花山在京城西一百二十里山下有立女廟今無存

百花山中小五臺山花多目所未覩紅黃紫翠不可名狀

瑞雲寺在百花山即五代時李克用建亭故處俗稱百家寺

燕山從史家營石澗而上甚險峻巨石巉巖仰視欲墜

石塘以山頂泉出其下今稱聖米石塘

西湖山在京城西一百里下有溪潭

百望山南阻西湖北通燕平背而去者百里猶見其峯故名

大覺寺在西北望村西杏樹成林以管家嶺爲最茂密寺甚宏壯有泉甚清澈

湯山舊名湯泉在北望西北六十里傳爲遼后浴處清有行宮民國五六年間貴官皆建

別墅於其地今多廢圯惟湯山飯店尙存

德勝門在內城北之西清因明舊

清梁鼎芬出德勝門口號健德門開曉日光篋車未暇數興亡千軍箭簇岡頭盡青

草秋波似故鄉

松林閘在德勝門外城河北閘水自玉泉山發源由高梁橋東北流至德勝門分爲二

由水關入內城是爲御河一出松林閘東流經安定朝陽兩門歸通州與白河合

龍王廟在松林閘今已無存

宏慈寺有前後二寺在德勝門外東北前寺已廢後寺尙存

上城關在德勝門外相傳是古薊州遺址亦曰薊邱土阜旁有清高宗御書薊門烟樹四字碑爲燕京八景之一

明正統十四年十月額森奉上皇車駕登上城以通政王復太常少卿趙榮出見上皇即此地

明姚廣孝薊門詩雲樹依依接遠邱時來飛雨灑征裘不知銅馬坊何在惟見桑乾水自流

明金幼孜薊門烟樹詩野色蒼蒼接薊門淡烟疏樹碧氤氳過橋酒幔依稀見附郭人家遠近分翠雨落花行處有綠陰啼鳥坐來聞玉京竟日多佳氣縹緲還看映五雲

明吳寬長至出上城詩馬上衝寒出北門豁然平曠識乾坤地連周圍民猶小天作燕山勢獨尊看月未忘黃土寺披烟仍見白浮村百官令節常來此籩豆如流習駿奔

清施閏章薊門詩薊門風當雨風定是初晴北闕雲中迥西山馬上明長楊春出獵



細柳暮移營儒術漸疏闕爲郎白髮生

華嚴寺在德勝門城關

大壽元忠國寺元托克托建爲皇太子祝釐在上城今已無存

臥虎橋今稱大石橋遺址尙存

多寶佛塔禪院在德勝門外西北里許舊名千佛寺明萬歷年慈聖皇太后建

北極寺在上城外今無存

碧霞元君廟在北極寺東俗稱北頂

功德林在上城西北里許清雍正元年重修今已廢爲北平第二監獄

慈度寺即黑寺建於清初爲喇嘛所居寺已廢遺址尙存

慈救寺舊名五聖庵在曹八里屯今已無存

西紅廟在德勝門外教場北

東紅廟在西紅廟東舊稱團營關帝廟清順治十二年重建

宸垣識略載按明景泰間于謙選三大營兵分十營團練號曰團營成化間復增爲十

二營此廟乃明代團營所祀之神云

滿井在德勝門外泉水甚甘今泉僅一窪將就涸矣

安定門在內城北之東清因明舊

方澤壇在安定門外北郊形方象地方折四十九丈四尺四寸深八尺六寸闊六尺澤中貯水方丘北向二成上成方六丈下成方十丈六尺均高六尺每成四出階各八級每

歲以夏至日祭焉

東黃寺在安定門外教場北清順治八年就普靜禪林所建今已無存

西皇寺在東黃寺西清雍正元年建

清淨化成廟在西皇寺側清乾隆年間建

資福院在雙黃寺西北清康熙六十年聖祖賜名

護國天仙廟在土關之北大屯村

高井在安定門外東行五里許井徑五尺清泉突出冬夏不竭

見日下舊聞帝京景物略及長安客話

明林堯俞滿井詩寒泉凝碧螿一酌冷人心素練無妨短銀床半欲沈蛙渚魚藻入

林影鳥巢深偶值堤邊叟悠然似漢陰

清朱彝尊滿井訪崑上人詩郊行方澤外路轉古城窪小雨乍撥火輕風無聚沙青

蓮過橋寺紅杏隔牆花一笑遠公在催停轂棘車

按宸垣識略謂安定門外東行五里觀音寺側有高井一潤百畝四時流溢或即其地德勝門外西北東鷹房村始有稱滿井者廣可丈餘云今詢之士人亦然故曰下舊聞諸書及林朱兩詩恐爲高井之誤

東直門在內城東之北清因明舊

望京村墩台在東直門外明景泰間築

望京館在城東北五十里孫侯村（後訛孫河屯）遂建爲南北使宿息飲餞之所宋王曾上契丹書曰出燕京北門至望京館即此

春場在東直門外一里許昔爲順天府尹立春日迎春之所舊日尙有迎春亭久廢  
華光寺在東直門外之北

金鉉墓在東直門外六里金公係明崇禎甲申之變盡節玉河者

碧霞元君廟在東直門外俗呼東頂

朝陽門在內城東之南清因明舊門外築石道直達通州

東嶽廟在朝陽門外元延祐中建歷代均加修葺羽士居之

東嶽廟塑像傳爲元正奉大夫劉鑾手製廟內有趙文敏所書碑

清查嗣琛詩阿哥尼後孰知名活脫爭傳正奉精昔日黃冠今紫綬莫將搏換等閒輕

清勞宗茂謁東嶽行宮詩絳闕東郊近神功仰大生祀隆三代典化治萬方平肅肅衣冠侍森森羽衛榮緬思劉正奉妙手發精誠

昆吾公廟在朝陽門外金天德中建

白虎廟在官窰場元道士吳全建

元真觀在朝陽門外明大璫劉瑾建

淨住寺在朝陽門外清乾隆三十二年修

漱芳亭在朝陽門外元道士吳全建初燕地未有梅花閑閑嗣師從江南移至護以穹廡

扁曰漱芳亭久廢

朝日壇在朝陽門外東嶽廟南數武壇制方西向一成方五丈高五尺九寸面蓋金磚陛四出各九級圓壇周七十六丈五寸高八尺一寸厚二尺三寸壇正西三門東南北各一門每年春分日祭焉

黑松林在朝日壇外古松萬株森沉蔽日

隆壽寺在朝陽門外

謠糧台在朝陽門外六里舊傳唐太宗東征高麗虛設困倉以誘敵人俗因呼其地爲謠

繹台

慈雲寺在朝陽門外八里莊

清肅親王豪格墳在朝陽門外架松其墳園有矮松四株虬枝夭矯可蔭數畝以數十楮柱架之故其地因此得名

東便門在外城之東北隅清因明舊

大通橋在東便門外大通河舊名通惠河自大通橋起至通州石壩四十里中間設慶豐等五閘以蓄水岸側有清高宗御製閘五閘詩碑

大通河河源自昌平縣白浮村引神山泉西折南轉過雙塔榆河一畝泉玉泉諸水至西門入都城南匯爲積水潭東南出崇文門東至通州高麗莊入白河總長一百六十四里一百四十步元世祖三十年告成賜名通惠河

明徐階夏日遊通惠河詩頗憶三江遠乘流意若何水深秋氣入樹密雨聲多熟果

當尊落驚禽拂棹過柳陰催繫纜欹枕聽漁歌

二閘即通惠河第二道閘地清代爲都人消暑勝地兩岸別墅多所民國後皆廢圯

清勞宗茂遊二閘詩紅舟白板綠烟絲好句揚州杜牧之何事大通橋上望風光一  
樣動情思 慶豐纜過又平津立遏通渠轉遞頻莫謂盈盈衣帶水勝他多少犢輪

辛

雙清亭在通惠河上爲元都水監張經歷園今遺址已無可考

元宋嬰春暮雙清亭小酌懷張孟功詩吏退公庭雁鷺行持杯暫對水雲鄉山開罨  
畫涵清影花落胭脂漾晚香酒幟隔津標柳陌漁舟避浪向蒲塘懷人不得同相賞

空賦停雲第二章

金章宗鹿囿遺跡在大通橋東

大通橋東舊有方廣十餘里地平如掌古樹葱鬱與高冢相錯傳是金章宗鹿囿故址  
三忠祠在大通橋東里許地名槐村爲義士周珍創建祀漢諸葛武侯宋岳武穆王文信  
國公

明何景明三忠祠詩三忠祠在帝城東檜栢陰陰沙院風朝暮衣冠頻下馬春秋香

火一開宮中原涕淚江山遠異代精靈廟宇同漢業崩摧如宋業古今南北恨無窮  
瓠瓜亭元趙參謀禹卿別墅久廢今莫詳其址

元王惲瓠瓜亭詩築台連野色架木繫瓠瓜舍後開三徑壺中自一家愛吟歌白苧  
釀酒脫烏紗更喜南窗下秋風菊半華

宸垣識略謂日下舊聞載瓠瓜亭於右安門之南因帝京景物略於草橋下有趙參謀  
之瓠瓜亭在彌望間循元志之舊舊聞考則謂去城十里移於東便門外本王秋澗詩  
陽春門外望東臯句云

廣渠門在外城之東清因明舊俗呼沙河門

清尤侗過都城詩沙河門外草蕭蕭落日西山影寂寥空繞紫城尋陌路祇看白塔  
起雲霄天邊大老施行馬月下孤兒出射鵬三過長安緣底事使車不爲午門朝

神木廠在廣渠門外二里許今廠已圯而永樂時神木尙有存者

神木廠大木皆刻字爲記有王二姊張點頭嫌河窄混江龍之名皮爛心存對面猶不  
能見

延壽寺在馬坊去廣渠門十八里

圓覺寺在廣渠門外二十里明正統中司禮監金溶建

蒯徹墓在廣渠門外八里莊古阜高可四尺

宸垣識略稱原按于欽齊乘蒯徹墓在臨淄東二里而漢書徹范陽人高祖曰徹齊辯士故卒葬此未知孰是

左安門在外城之東南清因明舊俗呼江擦門

宏善寺在左安門外迤東魏村社明正德中太監韋霽所建久已廢圮

韋公莊昔有柰子古樹婆娑數畝春時花開望之如雪

明王世貞集韋氏水亭詩偶成春服始挾侶問幽蹤芳草近寒食空林聞午鐘驚波雙鳥出迷路一僧逢欲盡名園賞停杯感慨重

清王士禎宏善寺看海棠詩韋社城南十萬家東風處處酒旗斜不知冷節匆匆過猶見僧樓一樹花 木魚聲靜佛香遲日午風簾自在垂好是維摩方丈室恰逢天女散花時

清宋竿過韋公寺詩竟阻尋幽興空携作賦才開樽思兔苑杖策看香台畫棟秋雲隔松關暮雨催南征聞奏捷飛蓋會追陪



清查嗣璫雜詠詩一株柰子數畝雪六丈蘋婆萬朵霞少借山僧囊中酒來看宮監  
寺前花

隆福寺在左安門外東阜村明弘治年間太監李興建

忠佑寺在左安門外迤西馬回甸舊爲關帝廟創建年月不詳民國廿五年岫淵和尙加  
以修葺

## 附錄

### 奏事處

肅亭雜錄載國朝鑑明季科臣紛囂每致政務叢脞特設立奏事處遴選六部內務府司員之能書寫者爲奏事官十年一爲更易統屬於御前大臣又命御前侍衛一名總統其事凡外庭章奏許其傳達蓋以其官職卑末不敢壅塞耳目（中略）仿周官小臣致命之意也

### 批本處

肅亭雜錄載國初鑑明季秉筆太監專擅弄權之弊特簡滿翰林官一員滿內閣侍讀一員滿中書舍人六員在內廷行走專司批發之責凡本章大學士稟擬上經上批覽畢即交用清字批示然後交付內閣發抄故機宜慎密從無敢遲滯刪改者實當代之善政俗謂之紅本云

### 何義門南書房軼事

肅亭雜錄載何義門先生值南書房時嘗夏日裸體坐仁皇帝膝至不及避因匿爐坑

中久之不聞玉音乃作吳語問人曰老頭子去否上大怒欲置之法先生徐曰先天不老之謂老首出庶物之謂頭父天母地之謂子非有心誹謗也上大悅乃舍之

上諭館

肅亭雜錄載本朝列聖家法相承諭旨頒自樞府或每諭萬言或一日數旨綸綍式昭積累繁富恐有所遺漏故特立上諭館設主事二人筆帖式若干人專司恭錄清漢諭旨每數月後彙奏一次交起居注收藏特簡閣臣二人綜理其事

國史館

肅亭雜錄載國初沿明舊制惟修列聖實錄附載諸勳臣於內祇履歷官階而已康熙中仁皇帝欽定功臣傳一百六十餘人名曰三朝功臣傳藏於內府雍正中脩八旗通志諸王公大臣傳始備然惟載豐沛世家其他中州士族勳業茂著者仍缺如也其所取材皆憑家乘筆詞臣又復視其好惡任意褒貶（中略）純皇帝夙知其弊於乾隆庚辰特命開國史館於東華門內重簡儒臣之通掌故者司之將舊傳盡行刪雍正惟遵照實錄檔冊諸籍所載詳錄其人生平功罪案而不斷以待千古公論真修史之良法也（中略）嘉慶庚申上復命補修列聖本紀及天文地理諸志乘儒林烈女等傳

附之一代之史舉矣續錄以十年爲則陸續修之

### 翻書房

嘯亭雜錄載定鼎後設翻書房於太和門西廊下揀擇旗員中諳習清文者充之無定員凡資治通鑑性理精義古文淵鑑諸書皆翻譯清文以行其深文奧義無煩註釋自能明晰以爲一時之盛


### 清字經館

嘯亭雜錄載乾隆壬辰上以大藏佛經有天竺番字漢文蒙古諸翻譯然其禪悟深遠故漢經中咒揭惟代以翻切並未譯得其秘指清文句意明暢反可得其三昧故設清字經館於西華門內命章嘉國師經理其事達天蓮筏諸僧人助之（中略）凡十餘年大藏告藏然後四體經文始備焉

### 雨華閣送崇

清宮述聞臘八日中正殿在雨華閣內下之左設小金殿聖駕御焉御前大臣左右侍衆喇

嘛於殿下唵經達賴喇嘛章嘉呼圖克圖至聖駕前拂衣冠申祓除之義佛爭舉乃散謂之洞黎清語吉祥也清寶文靖鑒有詩云雨華峻閣插青冥法鼓金鏡震白靈佛意



依優待條件遜帝應居頤和園當局慮湖園僻遠恐有他虞故得久居大內甲子歲某軍曠政府迫令遷出遂奔北邸嚴曠香有感事詩云翠輦倉皇出上闈池殃奚恤舊盟寒辟人鐵騎排闥入委地銅駝忍淚看戶鑄重重九天闔扉稜嶸五雲端可憐日下黃金闕獨照西風承露盤

### 西苑賜釣

宋牧仲筠廊二筆載康熙二十一年六月初三日上諭部院諸臣朕因天氣炎熱特奉兩宮避暑瀛臺今幸天下少安四方無事然每日侵晨御門總政未嘗暫輟卿等各勤職掌特來啟奏曾記宋史所載賜諸臣於後苑賞花釣魚傳爲美談今於橋畔懸設罾網以待卿等漁釣可於奏事之暇各就水次舉網得魚隨大小多寡携歸邸舍以示朕一體燕適之意誰謂東方曼倩割肉之事不可見於今日也特諭清時殊遇載筆者猶榮之納蘭成德有西苑雜咏云香引輕颺散玉除下簾聲徹退朝初馬前此日承恩數也逐清班許釣魚即紀其事

### 清德宗幽囚瀛臺

德宗自戊戌政變後退居瀛台台與岸接以弔橋可以隨時啟閉兩側設瀛者板舍

遺今

跡繪 無異囚禁葉伯高有瀛台詩云紫光閣下接麟坳中峙瀛台水外包畫地爲宮規  
存 狴犴刺闔在戶有蟪蛄上書待復房陵辟演易類觀羨里爰試問乘轡誰賦納瑤池珍  
饌自充庖汪哀甫亦有太液二律云太液秋光動綠萍五雲樓閣人微冥玉虹帶雨參  
差影壁水涵天上下青作戲魚龍寒未歇宮闕虎豹晚還醒禁中更擬南薰曲多恐儀  
鸞不忍聽碧海輕機去似萍石橋回首浪冥冥蒼涼落日猶疑紫咫尺神山忽隱青託  
月嫦娥能不老隔河靈匹共長醞瑤池自弄雲和管那識人間掩淚聽微婉深至尤見  
楚騷忠愛之遺

### 蕉園

十朝詩乘載明代實錄例於蕉園焚稿（中略）順治中於此改建佛宮榜以萬善延  
名僧講法其中世祖上賓聖祖不恒臨幸外人或與僧有舊得入瞻覽海鹽徐滄浮以  
選貢入都有宿始上人房詩後二十年作懷蕉園舊遊二律蕉園池島舊西清二十年  
前向此行身到尙疑來夢寐追思真覺異平生千章檜識前朝物萬善宮懸聖代名讀  
罷昔賢西苑什滄江懷舊不勝情園殿凌風翠霧凝曲闌曾記晚來憑銀臺坐水環華  
月玉鏡行天太液冰霄漢昔年身偶到江湖此日夢誰能瀛洲詞客還相詫慙媿書生

一度登

壽皇殿

嘯亭雜錄載壽皇殿在景山門內正北殿凡九室重簷金楹一如太廟之制供奉列聖御容上遇元旦歲暮及聖誕忌辰之日皆行親謁禮（中略）其旁永思殿即列聖苦廬地

皇史宬

嘯亭雜錄載皇史宬在東華門外迤南與普度寺相近蓋明南內地也殿廡七楹扉牖以石代之內貯金漆櫃數十蓋古人金匱石室之意凡列聖實錄玉牒聖訓皆藏其中堂子

嘯亭雜錄載國朝起自遼瀋有設竿祭天之禮又總祀社稷諸神祇於靜室名曰堂子實與古明堂會祀羣神之制相符猶沿古禮也卽定鼎中原建堂子於長安左門外建祭神殿於正中即彙祀諸神祇者南向前爲拜天圓殿殿內正中設大內致祭立杆石座次稍後兩翼分設各六行行各六重第一重爲諸皇子致祭立杆石座諸王貝勒公等各依次列均北向東南建上神殿南向相傳爲祀明將鄧子龍位蓋子龍與太祖有



舊誼故附祀之歲正朔皇上率宗室王公滿一品文武官詣堂子行拜天禮凡立杆祭神於堂子之禮歲以季春季秋月朔日舉行祭日懸黃幡繫采繩綴五色繒百縷楮帛二十有七備陳香燈司俎官於大內恭請神位由坤寧宮以綵亭舁出行中路至堂子安奉於祭神殿內東向陳糕餌九盤酒盞三圓殿陳糕餌三酒琖一楮帛如數司俎官以贊祀致辭行禮（中略）凡月祭孟春上旬三日餘月朔日大內遣司俎官率堂子官吏於圓殿奠獻糕酒行禮如儀（中略）凡出師展拜堂子之禮皇上親征諒吉起行內府官預設御拜褥於圓殿外及內門外御營黃龍大纛前兵部陳螺角鑾儀衛陳鹵簿均如儀皇上先詣圓殿次詣靈前均行三跪九叩禮六軍凱旋皇上入都門先詣堂子行禮命將出師皇上率大將軍及隨征將士詣堂子行禮儀與親征同凱旋日詣堂子行告成禮均與古之禱禱告功明堂之禮相同

### 正陽門城樓

正陽門城樓燬於庚子拳亂余時居南城日觀之亂定興修閩縣陳玉蒼璧實董其役以估費過低致木商有虧累不貲被迫自盡者而陳反以此見知慈禧膺懋賞汪子賢述祖曾有城門高樂府嘲之云都門夜夜鳴城狐燦闕一炬驚群鳥語請出出城上呼

虹梁虬柱灰無餘六龍西幸還舊都舊觀規復恢黃圖工師求木走海隅展轉萬里連  
舳艫大者機棟小構榱施以刻鏤采碧塗帝恤民力無征輸羣臣匡績來于于或出金  
資佐國儲輸將慷慨卜大夫樓成行賞帝曰俞穹官顯秩紛拜除金印煌煌佩絳魚紆  
荷拖紫及斯輿吁嗟乎脩城紀功功不虛守城受賚將何如

### 榮仲華之先見

榮祿故居在東廠胡同郭春榆先生有過故相榮文忠東廠舊第感賦詩云沙隄舊蹟  
未全蕪猛憶遺言重感吁作柱持荷嘲太枉成圍種柳計終迂蛟龍豈是池中物螻蟻  
先爲地下驅今日朱門誰是主夥頤富貴亦須臾其自注云項城初任直督卽求兼領  
山東公詢余故事余舉年羹堯鄂爾泰李衛以對且云此康雍時事非今日所宜援公  
首肯因言此君志望甚奢吾常裁抑之然環顧無人異日恐終執持朝局又辛丑回鑾  
後中外復言變法孝欽亦欲藉是鎮羣議時公已抱病間談及謂茲事體大非吾力能  
勝其成其敗幸病軀當不及見耳言次皆太息不已

### 餘園軼事

餘園開設於光緒末年址在東四牌樓六條胡同爲懷塔布故第當時南妓初北來有

謝珊珊者親貴多眷之天潢某尙書在餘園宴客自登場演劇珊珊侍側爲之傅粉張  
貞午時爲御史疏劾之尙書尋乞休郭嘯麓有餘園曲云餘園花草春無價銀河曾照  
徵歌夜鳳管吹成旖旎香龍盤傳賜逍遙炙是時海宇方清宴洛京初置敦宗院青瑣  
郎君譽少年白頭上相論殊眷八百輕鸞擁鈿車拳帷初識宋尙書臨川聲律宜都射  
早有才名動玉除半酣催試山香舞研光帽上花如雨一曲檀槽一束綾仙韶翻盡開  
元譜第一風流數謝娘親調粉墨伴諸郎燈屏時露驚鴻影鏡閣儉摹警鶴妝妝成一  
笑拳珠箔紫蘭曲罷添懽譔壓倒同時菊部頭策勳競進黃金勺孔江狎客各翩翩艷  
曲新添相府蓮行樂渾忘花萼貴尋春拚放柘枝顛朱門自昔誇聲伎卻語南園驕北  
里儘多朝貴拜恩王一任都人呼浪子干卿甚事春池緘封章曉向通明奏闕下羞看  
傅粉郎台端今見埋輪守諫牘何堪例謗函魚頭自築退思岩紅衫更莫招王黼白筆  
終應重賀咸浮名換取金尊酒曠懷誠似宜城柳軼事流傳夜宴圖近時恨少徐黃手  
淡粉輕烟一夢闌珊珊環珮隔蓬山清元小殿香塵冷愁煞新豐謝阿蠻

國子監故事及南學

十朝詩乘載故事國子監生於司成必以贊謁見捐納寢廣其例遂廢伯熙盛昱爲祭

酒令貢監應京兆試者考到錄取後一律修謁以杜假冒而不取其贊貢監錄科得憑同鄉官印結入場免其起文一以數名實一以恤勞費其自紀詩有云久矣春秋榜私門盛桃李寥寥六館生草草三拜禮橫舍強半虛姓名一律詭蓋國學久等具文矣惟南學賜舍舉人貢監得考取肄業膏獎頗厚寒畯多就之伯熙任祭酒六年仿胡安定法令於經史外兼治天文輿地兵事農政造士頗衆（中略）伯熙既歿南學生之官京朝者爲請宣付國史列儒林傳

### 太平湖醇王舊邸園亭

十朝詩乘載太平湖醇賢親王舊邸爲德宗龍潛之地旁有適園池台花木甲城西李文忠有游適園詩六十韵其記園中題額云中開頤壽堂獨表東平書宣贊高七德福祿應九如東西列層樓雅稱仙人居窗前萬竿竹不羨洋州腴流觴有曲水名蹟連秦吳導來鳳尾泉激同龍首渠小試神禹功卽此見鑿疏上探星宿源萬派咸東趨風月更雙清如水明階除落落見長松凡卉皆芟鋟但存正直意自有神明扶空山太古春醞釀冰雪敷築館名寒香歲暮還相於春秋多佳日雲霞憑寫據旁入彘畫軒花綺而石癘別尋小幽趣逸韵追髣蘇入室得退庵靜坐萬緣祛九州爲一室舒卷常有餘既

擬逸少亭更作淵明廬二子皆人豪何止達士模園有宣贊七德額爲毅皇御書又頤  
壽堂榜爲恭邸書又有東樓西樓竹林脩禊亭問源亭風月雙清樓撫松草堂寒香館  
罷畫軒小幽趣處退菴陶廬諸勝

定王府梅

定王府在缸瓦市院中有梅一株爲鏡月華朗貝勒所手植著花以春仲冬日則架玻  
璃屋深護之貝勒嘗著燕梅花候記具言培護之法每花時招客賞之曾有賞梅詩云  
報道庭梅已半開東君火速賞春來莫教零落隨風絮點盡閒階寸寸苔北地看花客  
詫奇小窗二月見橫枝憑君試問春消息雪北香南立片時定府易主梅亦久萎

廣濟寺蠟梅

廣濟寺後院佛閣前有蠟梅兩大叢殆百餘年物以佛閣高西北風不到故能滋榮但  
着花亦在二月孫惺菴曾有同郭嘯麓遊廣濟寺賞蠟梅詩云誰遣佳人降朔方檀心  
微吐已迴腸智瓊剪蠟應難比沾到酥黃是佛香後寺僧於閣前作露台梅陷地中途  
致枯萎

都中劫案

昔日警政不修明仗持杖擄人勒贖之事卽都城內亦時有之光緒中年范陸兩書吏聯姻聘僭競侈盜涎之乘新婦內城觀劇歸伺於途劫以去盡掠衣飾委婦冷巷中遇巡更者爲之送歸踰月案始破當時都人有詩嘲之云夜半香車出禁阿何來醉尉一聲呵釵環零落空街冷去去如聞得寶歌至城外娼寮賭局擄人掠貨尤屬數見不鮮

### 正陽門東車站炸彈

清光緒季年有詔籌備立憲命載澤那桐徐世昌端方紹英爲考察憲政大臣周歷東西洋諸國啟行日甫及車次而炸藥發蓋烈士吳樾謀刺五人五人未傷而烈士自斃五人亦不果行楊清丞曾紀以詩云龍節東西五使星征輶臨發又迴輪城南挾彈誰家子車下空餘碧血腥周泊園亦有詩云蛇年壯月月下弦絕國使者登華軒車中有物轟霆發響若坻隕人沸然一彈迸裂萬星落已有橫尸當道邊邏卒獸散達官避紛紛毀面傷中肩回旆歸來奏天子砍案拔刀天爲起暴客自斃餘黨存詔書大索咸陽市要離妻子先自燔轟政面目誰能指任俠謬欲驚世人書盜終竟煩良史訛言日夕滿都門九門警衛羅萬兵沙中似覺短狐出白晝疑有罔兩行袖中鐵椎妨不得頭上氈帽空崢嶸大人作事要定力常由艱險趨寬平水蛟陸兇兩無畏烏用咄咄稱怪事

廠甸竹枝詞

十朝詩乘載風俗變遷不期然而然夏蔚如先生兩作廠甸竹枝詞其光緒中年詩云  
玻璃一尺亞輕紗灼灼釵光溜鬢鴉浪蝶遊蜂誤相逐車簾斜挿象生花迨末年所作  
則云窄袖長袍結束新蠻鞵細碎盛香塵女兒愛作男兒樣撲朔迷離辨未真又云無  
遮會裡競時新切利華靈現色身遊興未闌閒闖若大家齊上上林春廿年之間遷變  
乃如此

商品陳列所謠

汪子賢述祖陳列所謠五絕云傑閣凌霄漢經營費萬千何人師卜式慷慨納金錢百  
丈鵝黃錦千金狐白裘明珠光百琲更列最高樓制器師前代猶傳景泰名蔚藍天一  
色仿造及東瀛采綠多休暇同占五日期遊觀不辭遠日暮禮城歸

戊戌六君子授命菜市

十朝詩乘載戊戌政變六君子駢戮西市唐照青烜時官刑部作紀事詩哀之云皇帝  
廿四年戊戌秋八月其旬有三日國乃有大罰我時官西曹折獄實濫職是日天嚮午  
旅進綴班列突來高車客並肩趨上謁密語人不聞掉頭卽揖別衆僚先屏退行遲獨

居末似傳中旨至滿堂氣慘慄處分要異常舉動何倉卒私心妄揣揣口語互藉藉或  
言事慮囚或言行伏闕事在三日前聖主下天綽歸政東朝廷新政官悉奪東海大鱧  
魚早驚金鈎脫深宮含深怒鈎黨窮誅滅罪甚八司馬一一付縲纆衆論方快心有識  
甘卷舌外間誼譟聲禁旅雜御卒傳呼丞相來肩輿兩飄忽入門坐堂皇鬚張面凜鐵  
趣召主者至速縛六人出勅旨星火催決不待時畢獄吏走且僵伍伯整巾袜須臾各  
就縛衣冠尙絳繚峨峨四新參入朝三旬劣妄思大廈扶竟觸天柱折其一職監察抗  
疏氣鬱勃同官側目久飛語相詆訐更有粵布衣未膺簪與綬壯志不一伸連坐太突  
兀我時迫近前木立如朽質故人乃面之顏忤心初但傳詔官人來天憲口爲述爾等  
皆逆黨左左皆曰殺跪聆宣讀畢臣當伏斧鑕林君最年少含笑口微映譚子氣未降  
餘怒衝冠髮二楊默無言俯仰但蹙額劉子木訥人忽發大聲詰何時定爰書何人爲  
告密朝無來俊臣安得反是實抗辯語未終羣吏競牽摔但聞官人言汝去不得活相  
將赴西市生死此決絕揚揚如平常目送腸內熱步騎夾道擁圍闌車填咽丞相親蒞  
刑事與往昔別並有覆巢懼妻孥不敢訣引領就白刃夏侯色可匹今日身橫尸前朝  
語造膝幸賴喬公賢爲收無家骨吏人訖事返流涕向我說役卒呈數紙云是獄中筆



我時但憫默反覆難終閱人生遂到此頃刻化異物徒步歸寓廬人門忘飢渴家人怪我狀疑是感夙疾約撮告之知相對亦氣噎嗟我祖宗朝欽哉惟刑恤近臣罕別黥况此皆才傑求治或太急論事或過烈罪狀在疑似性命快讎嫉逝者倘有知咄嗟天聽徹唐與二楊同年劉同官故其詩語激切

丞相剛子良詩  
公謂茂實提牢

黃公度有詩云金甌親卜比

公卿領取冰銜十日榮東市朝衣真不測南山鐵案太無名亦爲哀六君子之作  
南下窪葦塘妖鳴

十朝詩乘載陶然亭在京師南窪康熙中水部郎江藻所建亭下有潭曰野兔四周皆窪葦光緒甲午三月葦葦中忽有怪聲如牛鳴或疑爲蛟鼉之屬偵之無迹市兒妄繪爲圖呼曰大老妖（中略）擾攘經月始息顧印伯大令甲午感事詩云災異何當問董生九門宣令止牛鳴不聞周史夸群望坐笑班書志五行北斗遐瞻天上象南窪信有地中聲葦間今日延緣路舊事蒼茫足暗驚（中略）張豫荃其淦紀以長歌云右安城門當晝晴野畦池水蘆葦平忽有怪物如牛鳴路人千萬皆聞聲喧傳遠近草木腥街衢入夜無人行或圖其象如蛟鯨似虎搖尾龍轉睛巨鱗修鱗腹彭亨罔兩罔象莫識名日午健兒敲銅鉦戈矛森立車衝鞠擊以巨礮雷霆旬如臨大敵心怦怦登刀

蹋火道侶迎敕詔六甲與六丁呼星喚鬼與怪爭怪殊不懼反自矜若鳴得意聲無停  
健兒咋舌雙目瞠拖泥帶水如履冰道人執劍走野亭護身符咒嗟無靈我亦隨衆來  
郊垌鳳城景物爭春榮麥芒漸綠柳眼青輕風轉薰晚照明鶯歌燕語調鳳筆萬人如  
海身伶仃枳籬薤隴側耳聽鳴蛙噪蚓集衆蠅心知其詐笑語傾嗟哉危坐高官形柳  
陰歧路支涼棚更資彈壓列陣兵忽欲紛調神機營舉國若狂誰使令解人難索繫我  
情石言蛇鬪傳所稱妖不自作由人興見怪不怪真典型是冬中日覺起又數年而拳  
禍作蓋亂徵也

潘張龍樹寺宴客軼事

潘文勤公祖蔭在朝務宏獎嘗約張文襄同招公車知名士宴城南龍樹寺函札往復  
客單至數易及期客至乃未具行厨倉卒於酒家致之而座客已枵腹久矣傳以爲笑  
夏閏枝藏文襄與文勤選客札七通裝潢成帙桂林王幼霞鵬運題四絕句云槐龍突  
兀老秋霜猶護當年選佛場二十七年談舊事依稀墨瀋姓名香月旦偏從下第新尙  
書冰鑑重人倫牛心未啖周郎炙慚負平生託耗身材用由來爲世儲諸賢遭際定何  
如可憐憔悴風塵底付與荊州數鱗魚益都清驪從佳話吳縣風流剩斷箋極目烟塵

壇坵冷朱門槐柳自森然

白雲觀老人堂

十朝詩乘載觀中老人堂耆年脩道者所居有劉老人者中州人年百四十矣鬚眉奇古翁文恭公見之贈以詩云秋槐古觀夕陽黃偶遇仙蹤問禁方舉世但知君子館故應遺却老人堂齟齬梨顏百卅翁掉頭萬事付虛空要知揭地掀天業都在尋常言語中

孔有德祠

嘯亭雜錄載定南武壯王祠在阜成門外春秋遺太常祠享蓋順治辛卯王殉節桂林時所建立也近日祠宇頽壞襍俦傾折丹青墜牖無人奏請修葺者蓋有歲修祭田爲祠官所侵蝕故不能揭報恐破其奸也履端親王永城有孔王祠長律一首格調遒勁故備錄之其詩曰王本尼山裔支分遼水東風雲霈際會草澤見英雄皮島才初展吳橋計漸窮天教授上國時至樹宏功締造膺皇眷招徠錫命隆師仍提舊部銜獨授元戎袍解豐貂暖筵張秘殿融直將心腹待應竭股肱忠兵特稱天祐恩尤出聖衷鼓鞞勞乍效銀幣賚何豐國號承基大宗王拜爵同威揚平壤外聲震塞垣中降將開山海

偏師佐鄧馮賊氛旋拉朽明業已飄蓬定鼎邀殊賞爲屏冠上公自茲頻討亂所向輒  
橫空捷屢馳吳楚銘兼勒華嵩定南封更晉攘外獎宜崇疆圉偏多事干城合鞠躬蠻  
方琛未獻粵微道宜通遠統貔貅往親蒙矢石攻桂林除跋扈梧野起疲瘡反側行看  
盡功名惜未終潢池妖復熾萑澤藥濟訂大帥成孤注危城倚上穹來援音杳杳出戰  
勢匆匆冠裂肝俱碎袍沾血盡紅肯將身落賊爭覺氣如虹素帛全忠節丹忱報稟聰  
盟無慚帶礪軍盡化沙蟲馬革酬專閫牛眠勅考工烈名標武壯曠典荷旃幟我偶紆  
吟轡人來說殲宮由來能擇主浩歎緬英風

暢春園前溪蚌產綴珠

灤陽續錄載暢春苑前有小溪每雲陰月黑輒見空中朗然懸一星共相詫異尋視乃  
見光自溪中出知有寶氣畫計取之得一蚌徑四五寸剖視得二珠綴合爲一一大一  
稍小巨似棗形似壺盧不敢私匿遂以進御至今用爲朝冠之頂此乾隆初年事也嘯  
亭雜誌所載內湖珠兆者亦指此珠而言綴此珠頂之朝冠於古物陳列所開所時曾  
陳列予數見之今不知何往矣

福海競渡

福海在暢  
春園內

嘯亭雜錄載乾隆初上於端午日命內侍習競渡於福海中皆畫船簫鼓飛龍鸞首絡繹於鯨波怒浪之間蘭橈鼓動旌旗蕩漾頗有江鄉競渡之意每召近侍王公觀之以聯上下之情

山高水長殿看烟火

嘯亭雜錄載乾隆初定制於上元前後五日觀烟火於西苑西南門內之山高水長樓樓凡五楹不加丹堊前平圃數頃地甚爽塏遠眺西山如髻出苑墻間渾如圖畫是日申刻內務府司員設御座樓門外凡宗室外藩王貝勒公等及一品武大臣南書房上書房軍機大臣以及外國使臣等咸分翼入座圃前設火樹棚外圍以藥欄上入座賜茶畢凡各營角伎以及僕侏兜羅之戲以次奏畢上命放瓶火花樹崩湃入雲霄洵異觀也膳部大臣跪進果盒頒賜上方絡繹不絕凡侍座者咸預焉次樂部演舞燈伎魚龍曼衍炫燿耳目伎畢然後放烟火火繩紛繞若如飛電俄聞萬爆齊作轟雷震天逾刻乃已

朗潤園議官制

十朝詩乘載光緒丙午詔王大臣議官制於朗潤園始盡裁九卿直督袁慰廷更議裁

台諫謂不合憲政衆唯否而已壽州孫文正師家軍稱疾以書至曰台諫爲朝廷耳目自非神奸巨慝孰敢議裁慰廷爲氣阻（中略）汪袞甫參議嘗預議官制與人追話朗潤園舊事詩云金鑾舊夢總無痕密記猶餘朗潤園倚檻露花秋澁濕繞池風葉夜喧太平妄欲堪文致官禮終須有本原盡道當時新法誤誰知新法已陳言是年八月有詔改巡警部爲民政戶部爲度支兵部爲陸軍刑部爲法部工部併商部爲農工商理藩院改部大理寺爲院即朗潤園所定也

### 頤和園之興建

十朝詩乘載德宗親政醇賢親王以慈聖深居不樂謀別拓園或曰甕山大報恩寺爲乾隆時奉母后祝釐而建於以繩祖制奉慈娛誰曰不宜費無所出則醇邸筦海軍以儲餉息金陸續撥用初未動及正饗其地舊有玉瀾堂諸勝完者葺之頽者補之稍有增建遂成鉅觀即今之頤和園也光緒甲午聖母六旬萬壽先期頒詔舉慶典備園亭點景尋中日變啟而罷吳摯甫甲午冬日詩所謂可憐榆塞長征士斥盡瑤池賜宴金者指此黃漢甫有西苑曲而實紀頤和園事有云官家務悅璇闈意齊囿無妨四十里畫棟迴環萬壽山瑀廊迤邐昆明水佛香高閣鬱崔巍俯視香山翠幾堆重欄不碍金

輿出步履都隨翠蓋來述其勝也又云宮市西園供悉索藉辭防海官儲涸事後徒聞  
責備臣豈知涓滴歸將作謂移海軍經費也成澹堪多祿昆明曲云昆明湖邊春草生  
昆明湖上春波平一波一草皆春夢却灰誰與談昆明昆明開鑿當全盛瀛寰風靜澄  
天鏡側聞車駕騁宸遊南巡歸仿西湖盛西湖勝處對西山山色湖光縹緲間偏是魚  
龍邀夜舞也如鷓鴣點朝班翠華當日流連地淀北淀南盛車騎無限嬉春曲水情卻  
存習戰滇池意玉泉絕頂萬泉飛萬壽回看烟霧霏不獨九成夸避暑年年還打木蘭  
圍倉皇劫火圓明後明德遂稱天下母侍臣方進遊仙詩海客又斟祝釐酒奇肱車與  
宛渠舩經營不惜水衡錢費盡水師四百萬好歌慈壽億千年長廊幽閣排雲殿寶月  
瓊花開夜宴歌管春燈燕子詞綵繒夜火螢兒苑濯龍門外好樓台趨直車聲曉若雷  
記得羽林仙仗外曾從舅氏入園來蓬瀛清淺呼仙吏幾輩金鑾留秘記引見開元各  
一時回頭二十餘年事宮中歌舞召黃巾鼓擊驚破湖天春秋詞那忍談庚子國變無  
端又甲申六龍歸後山河改空鎖離宮對三海漱玉泉沉石舫迷滲金山冷銅牛在我  
亦茫茫百感增何須松柏怨山陵一天春水容消長百代蒼烟閱廢興其詩一唱三歎  
託感尤深

德和園觀劇

德和園爲頤和園內觀劇之所與諧趣園鄰林畏廬作諧趣園秋陰圖自題云內宴傳呼供奉班歌台斜面玉泉山恩恩記得渾陀舞弟子於今改盛顏雙垂紫袖列朝儀日午東朝出殿遲錦帕御床龍袞侍天顏憔悴有誰知徵歌多在德和園勸善金科久不存御輦無聲秋草合西風徹夜舞清軒舊柳蕭疏傍岸斜一泓御水長蘆芽八年玉笛收聲久殘譜何曾問月華

碧雲寺明闡魏忠賢衣冠墓

十朝詩乘載碧雲寺魏忠賢墓爲其生壙後伏誅不果葬甲申後其黨爲置衣冠墓康熙中張蘧若瑗由詞曹遷諫議巡城過碧雲寺見魏墓有碑備載官階且著字曰完吾碑後刊孝官孝孫等六七十人遂疏請毀墓并剗平其碑一時稱快蘧若有詩紀事云彰瘴表天道誅賞昭王綱伊誰實職之蘭臺橫秋霜道惟鋤奸迹庶以全善良奉命咨民事巡警思激揚攬轡出郭門陟陟西山岡廬舍匝阡陌各各營耕桑厥俗一以樸民氣尤悅康榛莽化蘭蕙無復嗥虎狼尋憩古佛刹紺碧何輝煌背負諸墓碣累累如北邙異哉碧雲寺封樹皆貂蟻魏闡冢險制陵園相頡頏穹碑矗霄漢長松繞垣墻以彼



稔凶惡萬死烏足償搏噬縱鷹犬湯鑊烹鸞鳳天地盡冥晦白日無輝光古多內侍禍  
茲禍逾漢唐國步倏隳脆社稷隨淪亡彼身已寸磔慕胡留山陽父老切齒言豎黨皆  
兒郎以其生前壙封之爲幽堂惜無勇敢士措之使其僵我聞髮上指冠衝心激昂及  
此不椎雍無乃忤蒼蒼繕疏請明旨聖德奮乾綱碑仆墓亦毀狐兔安所藏堯舜除四  
凶海宇稱平章誅惡及勝國來者心自感巖壑湔穢濁草木回芬芳聊以佐史筆憲紀  
於焉張

靈光寺歸來菴

端午橋自直督被罷斥後於西山靈光寺築歸來菴若有終焉之志後以未能忘世再  
起督川至資州軍變與弟端錦同死於難平生禮敬文士人多惜之李桃源題其所葺  
焦山松寥閣云苦愛高官遂不歸猶專一壑欲奚爲西山亦有歸來路豈但松寥足淚  
垂

獅子窩

十朝詩乘載光緒間內監擅權者人但知安李而不知有印劉劉名連印爲總管聲勢  
與蓮英埒有別墅在西山獅子窩地當山口長廊架空畫壁精絕下瞰玉泉昆明如在

足底有碧雲天三字題額先文安公山遊絕句有云眞見秦頭壓日偏孤亭突兀倚層巔碧雲已蟻衣冠墓此地誰知別有天卽詠其地

嚮塘廟

十朝詩乘載西山福順寺向無僧衆爲內監退休之所俗稱嚮塘廟恭忠親王爲易今名書額寺有退思室額亦王手書貝勒載溥爲王次子有福順寺詩云居山最宜深登山最宜曲曲則幽趣多深可遠塵俗我愛福順寺柴門隱山麓盤旋石徑長坦步如平陸原野望無窮山景攬全局最宜首夏天入戶羣峰綠去年初識途今來踪跡熟公然作主人住持皆舊僕先澤餘蔭長名稱居士屋退思伴烟霞幽懷散花竹得句呈佛看開窗讓雲宿倚石聽礪泉過雨拾園蕪安排自在身天假清閒福知非尙未能已得從所欲

醇親王園寢銀杏樹

十朝詩乘載醇賢親王園寢有銀杏樹甚古或云有龍氣爲慈聖所伐葉伯高紀詩云五陵王氣古來鍾松柏交枝欲化龍鬱鬱佳城天子拜丸丸寢廟大夫封藩垣迫處無滋蔓堂密相驚有美樅莫問葛藟先縱斧有如此樹翦強宗王小航方家園雜詠有云

甘棠餘蔭猶知愛柳下遺邱尙禁樵濮國賢王天子父南山莫保一株橋自注謂有英年者以少府兼步軍總兵習堪輿嘗爲慈聖選定萬年吉地即今定東陵也忽乘間言於太后謂醇賢親王園寢古銀杏樹高十餘丈蔭數畝形如翠蓋按地理非帝陵不能當况俗名白果以白加王上是皇也當伐太后卽命英伐之戒勿告上內府密陳於帝帝堅持不可諸臣復詣太后勸阻太后亦堅持一日帝退朝聞內侍言太后黎明率內府諸臣往伐樹矣上亟命駕出經紅山口伏輿中大哭蓋往時幃幃如蓋者至此卽觀之今不存矣抵園寢太后已去樹身倒臥數百人方斫其根周遭十餘丈掘爲池以石炭沃水徧灌之慮滋蘖也上無言繞行數周頓足拭淚而返此丙申年事後數年拳亂作英年以袒拳伏誅小航嘗過園寢聞村人言其樹七人合抱不交掘根時出大小蛇千百或謂拳匪卽蛇之附身報復則齊東野語也

按醇王園寢予曾一再往遊銀杏樹身尙在寢右山側樹根在寶頂後稍偏跡尙存蓋以磚徑丈餘高五六尺園寢左側有亭園園中有醇王碑記敘述選擇葬地之經過卽因此樹之風水云詢之守園寢人謂戊戌政變後醇王府奉慈禧命所伐未言太后自往伐及德宗往阻事與王注異又言伐時有黑氣一縷衝東南去且出蛇千

百則與王注同予謂慈禧與醇王福晉爲姊妹醇王墳之有此樹及此樹之有關風水爲碑記所詳載當無不知之理且在丙申年慈禧與德宗尙無惡感英年小臣應不敢進讒况昔日帝后出入除微行外不能如是之輕易王說恐不足據此必戊戌後慈禧怨恨德宗之所爲也

### 北郊齋宮

嘯亭雜錄載自明嘉靖中更定祀典分祀天地北郊因循未建齋宮純皇帝念祀典至鉅未宜二郊異宜因建北郊齋宮規模一如南郊然後二郊之制始備